ÂŞIK ÇELEBİ DÎVÂNI

Hazırlayan

Prof. Dr. Filiz Kılıç



(C

T. C. KÜLTÜR VE TURİZM BAKANLIĞI KÜTÜPHANELER VE YAYIMLAR GENEL MÜDÜRLÜĞÜ

3184 KÜLTÜR ESERLERİ

435 ISBN 978-975-17-3405-1

www.kulturturizm.gov.tr

e-posta: yayimlar@kulturturizm.gov.tr

ÂŞIK ÇELEBİ'NİN HAYATI VE ESERLERİ

A. HAYATI

Âşık Çelebi, tanınmış Türk şair ve münşilerindendir. Asıl adı Pir Mehmed olup namı Es-seyyid Pir Mehmed bin Çelebi'dir. Şiirlerinde Âşık mahlasını kullanmıştır. Doğumuna, babası Seyyid Ali'nin düşürdüğü *feyzullah* tarihinden anlaşıldığına göre H926/ M1520'de bugün Kosova sınırları içinde kalan Prizren'de doğmuştur. Soyu aslen Bağdatlıdır. Büyük dedesi Seyyid Muhammed Nattâî XIV. yy.ın sonlarında Bursa'ya gelip yerleşmiştir. Burada I. Bayezıd'in yaptırdığı Ebû İshâk zaviyesinde şeyh ve mütevvelli olan ve seyyidlere ait işlere nezaret vazifesi de kendisine verilen Seyyid Muhammed'den sonra oğlu Zeynelâbidin de Fatih ve II. Bayezıd zamanlarında aynı görevlerde bulunmuştur. Oğlu Seyyid Ali muammacılıkta ve tarih düşürmekte mahir olup bazı müfretler de söylemiştir. Seyyid Ali, silsilesi Ebu İshak Kazarunî'ye çıkan ve II. Bayezıd devrinde büyük bir nüfuz sahibi olan meşhur şair ve âlim kazasker Müeyyedzâde'nin kızı ile evlenmiştir. Seyyid Ali çeşitli kadılıklarda bulunmuş ve Filibe kadısı iken H 941/M 1534-35'de ölmüştür. Âşık Çelebi babasının teftiş sebebiyle Prizren'de bulunduğu sırada doğmuştur¹. Önce annesini, ardından on dört yaslarında babasını kaybeden Âşık Çelebi, çektiği sıkıntıları şöyle dile getirir:

Valideyn öldi na-tüvân kaldum Erş ile habbe değmedi kat'a

Geçdi zilletle altı yıl 'ömrüm Fark olunmadı gamla subh u mesa

K2/18, 19

Seyyid Ali'nin beş oğlu olmuştur. Âşık Çelebi dışında, Muhammed Şah da Hakî mahlasıyla şiirler yazmıştır. Çelebi, on beş yıl süren Rumeli'deki çocukluğundan sonra H941/M1535'de İstanbul'a gelir². Bütün zorluklara rağmen küçük yaşta tahsiline başlayan Âşık Çelebi, burada devrin ünlü hocalarından dersler alır. Sürurî Çelebi, Taşköprîzâde, Arabzâde, Abdülbaki Efendi, Saçlı Emir Efendi, Karasılı Hasan Çelebi, Ebussuud Efendi, Fenarî Muhyiddin Efendi gibi zamanın meşhur âlimlerinden aldığı derslerle tahsilini tamamlar. Bu arada İstanbul'da devrin tanınmış şair ve belli başlı âlimleriyle de tanışır. Hiç şüphesiz Müeyyedzâde'nin

-

¹ Âşık Çelebi, a.g.e, Vr.50a, 260a

²Fuat Köprülü, İstanbul'a gittiğini açıkça söylemez ve tarih vermez. Bkz. Âşık Çelebi mad. İslâm Ans., c.l, s.696.

torunu olması, babasının çevresi ve Fenarî Muhyiddin Efendi ile yakınlığı münasebetlerde yardımcı olmuştur³.

H948/M1541'de tekrar Bursa'ya gelir, şair Sayî ile birlikte mahkeme kâtipliği yapar; ardından Emir Sultan vakıflarına mütevelli tayin edilir. 1546'da İstanbul'a geri döner. O sırada İstanbul kadısı olan eski hocası Saçlı Emir Gîsû Efendi'nin himmetiyle İstanbul mahkemesinde kâtip olur. Daha sonra bir ara Ebussuud Efendi'nin fetva kâtipliği görevinde de bulunur.

Bundan sonra Âşık Çelebi'nin kadılık hayatı başlar. İlk olarak, H957/M1550'de Silivri kadısı olur. Ardından pek çok şairle tanışacağı Piriştine'ye kadı olarak tayin edilir. H964/M1556'dan önce Serfice'ye nakledilir. Âşık Çelebi Serfice'de Divan'ını tertip eder. Buradayken daha önce üzerinde çalıştığı tezkiresini de tamamlamak isterse de birden bire azledilmesi üzerine, bu isteğini gerçekleştiremez. Ardından Narda, Alaiye, Niğbolu ve merkezi Rusçuk olan Çernovi kadılığına tayin edilir. Üsküp'te kadı iken yakalandığı zatülcenp hastalığından kurtulamaz ve H979/H1572 Şabanı sonlarında vefat eder.

Âşık Çelebi'nin fizikî yapısı hakkında kaynaklarda fazla bilgi bulunmamaktadır. Yalnız, büyük babası gibi lüknet (kekeme) olduğunu kendisi söylemektedir. Ayrıca, bu hususu bir beytinde zikreder:

Lüknet-i zillet zebânum itmeseydi küng ü lal Devletünde olsam olurdı sühandân-ı şeref

K8/28

Bütün kaynaklar onun cömert, açık sözlü, rint tabiatlı, güzellere ve şaraba düşkün, neşeli bir yaratılışa sahip olduğu konusunda hemfikirdirler. Aldığı mahlas da bunu açıkça göstermektedir.

Divanında yer alan şiirlerine baktığımızda, kaynakların vardığı sonucun doğruluğunu görebiliriz. Bilhassa, gazellerinde şahsiyetinin hususiyetleri görülmektedir. Şu beyitte onun rint, dünyayı hiçe sayan mizacı ortaya çıkmaktadır:

Ne gam cümle cihân bed-h*â*h u düşmen olsa ey Âşık Benümdür mülk-i istigna cihânda ne gamum vardur

³ Zatî, Taşlıcalı Yahya, Hayalî, Rahikî, Aşkı, Kandî gibi şairlerle tanışması bu devreye rastlar.

Âşık Çelebi, H94-5/M15381 de ölen Müfti Sadî Çelebi için tarih de düşürmüştür.(Aynı e., Vr.1Ş7b)

Âşık Çelebi, kendisi de güzellere düşkün olduğunu söylemekten çekinmez:

Dogaldan vasfı ismine muvâfık Güzeller mübtelası ya'nî Âşık

Şiire ve musikiye fazlaca alakası olan Çelebi'nin latifeleri, nükteleri, hezel yoluyla yazdığı manzumeleri ellerde ve dillerde dolaşmıştır. Âşık Çelebi, özellikle kasidelerinde peygamber sülalesinden geldiğini sık sık zikreder. Ancak, seyit olduğu halde kendisine yeterince değer verilmediğinden, çok sıkıntılar çektiğinden yakınır ve bu durumdan memnun olmadığını açıkça söyler.

Kapunda lutfun umar bende gerçi var bin bin Muhammed âline rahm it binini gör birin al

Kime itsün iltica âl-i Nebi sen var iken Dînine rükn-i rekin ü şer'ine hısn-ı hasîn

K11/102

Âşık Çelebi küçük yaşlardan itibaren kıymetli hocalardan ders alarak yetiştiği için kuvvetli bir edebî kültüre sağlam bir medrese bilgisine sahiptir. Yaptığı tercümeler ve Arapça Şakaik Zeyli bunun göstergesidir. Âşık Çelebi'nin Divanı dışında, Meşâirü'ş-şu'arâ adlı şairler tezkiresi, Ravzâtü'ş-Şühedâ, Şakaiku'n-nu'maniye, Et-Tibre'l-mesbûk, Ravzu'l-ahyâr, Miracu'l-ayâle ve Minhacü'l-adâle adlı tercümeleri ile Zeyl-i Şakayık'ı, Mecmua-i Sükûk adlı ilâmları ve elimizde bulunmayan Sigetvarnâme ile Şehrengiz-i Bursa adlı mesnevileri yardır.

B.ŞİİRLERİ

1. Vezin ve Sekil

Divanda vezin olarak en çok Remel bahrinin Fâ'ilâtün Fâ'ilâtün Fâ'ilâtün Fâ'ilün vezni ve ardından Hezec bahrinin Mefâ'îlün Mefâ'îlün Mefâ'îlün Mefâ'îlün Mefâ'îlün kalıbı kullanılmıştır.

Âşık Çelebi'nin, bir iki kusur sayılmazsa aruz veznini kullanmada başarılı olduğu iddia edilebilir. Sık sık rastlanılan vasl ve imâleler, bu asırda bir ahenk unsuru olarak çokça görülen bir özelliktir.

Âşık Çelebi'nin kaside, gazel ve mesnevilerini beyit sayıları itibariyle şöyle değerlendirebiliriz: 14 kasidenin büyük bir çoğunluğunun beyit sayısı 30-50 arasında değişmektedir. Bunun yanısıra, 14 beyitlik bir kasidesi olduğu gibi 113 ve 303 beyitten meydana gelen birer kasidesi de vardır.

Gazellerin en kısası 5 en uzunu 9 beyit olup büyük bir çoğunluğu 5 beyitten meydana gelmektedir. Altıncı gazel müselsel gazel hususiyeti göstermektedir.

Kaside ve gazellerin bir kısmı müreddeftir. Kasidelerinin altısı, gazellerinin 53 ü rediflidir. Rediflerin tamamına yakını Türkçe kelimelerden seçilmiştir.

Kasidelerin bininde (K12) matla beyti bulunmamaktadır. Âşık Çelebi, kasidelerinin büyük bir kısmında tecdîd-i matla yapmıştır. Matla tekrarı, yakın aralıklarla yapıldığı gibi (K10/31, 34-K14/10, 12), bazen ardı ardına birkaç beyitte de görülür: Kll/78,79,80-K12/17,18.

Âşık Çelebi'nin kasidelerinin çoğunda klâsik kaside şemasına uymadığı söylenebilir. Onun kasidelerinin büyük bir kısmında klâsik bir kasidede sırasıyla bulunması gereken nesib, girizgâh, medhiye, tegazzül , fahriye ve dua bölümlerini bir arada bulmak mümkün değildir. Biri hariç diğerlerinde tegazzül bölümü yoktur. Bölümleri tam olarak tespit etmek hemen hemen mümkün olmamakla beraber, genelde nesib ve medhiye bölümleri aynı uzunluktadır. Fahriye bölümleri kısa tutulmuş ve klâsik anlamda bir fahriye özelliği taşımamaktadır. Dua da genellikle birer beyitten meydana gelmektedir.

Kasidelerinde yer alan bölümler genel olarak şöyledir:

Nesib:1, 4, 6, 7, 8, 9, 11, 13, 14. kasidelerinde bulunmamaktadır.

Girizgâh: 1, 5, 6, 7, 8, 9, 11. kasidelerde vardır.

Medhiye : Biz. redifli kasidesi hariç bütün kasidelerinde bu bölüm vardır. 3

ve 12. kasideleri de tamamen medhiyedir.

Tegazzül: Sadece 7 kasidede vardır.

Fahriye: 2, 3, 11 ve 12. kasideleri hariç diğerlerinde fahriye bölümü vardır.

Biz. redifli kasidesi, tamamen fahriyedir.

Dua:, Biz redifli kasidesi hariç hepsinde bulunmaktadır.

2. Dil ve Üslûp

XVI. yy. Türk şiirinde yerli nitelikler göze çarpar. Bu nitelikler bilhassa Rumeli şairlerinde görülür. Divanlardaki şiirlerin konuları genellikle eski konular olup, din, tasavvuf, hikmet, övgü, rintlik, aşk, tabiat vb.dir. Bu konular işlenirken yapılan benzetmelerde kullanılan mecazlarda çevrenin ve yerli unsurların şiire çokça girdiği görülür Gelenek ve göreneklerle ilgili benzetmeler, deyimlerin mecazlı anlamlarından yararlanılarak yapılan sanatlar, çevre ile ilgili somut tasvirler ve benzetmeler gibi. Bir Rumeli şairi olan Âşık Çelebi'de de bu özeliklere rastlıyoruz. Onun şiirleri, nesrinin aksine oldukça sade, basit bir dil ve çok tabiî bir üslûp ile yazılmıştır. Deyimlere, atasözlerine, devrin âdetlerine çokça yer verir. Bilhassa, gazelleri deyimler açısından son derece zengindir.

Âşık Çelebi, kelimelerin değişik anlamlarını ustalıkla kullanarak tevriye ve cinas sanatına şiirinde fazlaca yer vermiştir.

3. Muhteva

Âşık Çelebi, şiirlerinde aşktan ve talihten yakınmıştır. Kadılıktan hiç memnun olmamış, seyitliğine yeterince değer verilmemesinden yakınmıştır. Hemen her kasidesinde de bu memnuniyetsizliği dile getirmiştir.

Âşık Çelebi kasidelerini çeşitli kişilere takdim etmiştir. Muhtevalarına dayanarak yedi kasidesinin zamanın padişahları Kanunî Sultan Süleyman ile II. Selim'e takdim edildiği anlaşılmaktadır. Diğerleri Hace Çelebi, hocası Muhyiddin Efendi, Müfti-zâde Efendi, Nişancı Bey, Defterdar Şerife-zâde

Efendi, İznikî Ali Çelebi'ye takdim edilmiştir. Bunların dışındaki iki kasidenin kime sunulduğu belli değildir.

Kasidelerinden biri, naat özelliği taşımaktadır (K ll). Bu naatta peygamberden bahseder, ondan kendisi ve ümmeti için şefaat diler. Biz redifli kaside tamamen fahriye özelliği taşımaktadır.

Kasidelerin bölümlerinin konuları ise şöyledir: Nesib bölümünde, genellikle tabiat tasvirlerine ve kozmik unsurlara yer verir. 14. kasidesinde görüldüğü üzere, felsefî konulara değindiği gibi bu bölümde kendisine de yer vererek, bahtından, zavallılığından, sıkıntılarından bahseder (Özellikle 11. ve 14. kasidelerde)

Girizgâh bölümünde, genellikle öveceği kişinin bir hususiyetinden bahseder.1. ve 7. kasideler de ise övdüğü kişinin ismini zikrederek medhiyeye geçer.

Âşık Çelebi'nin medhiyeleri fazla abartılmış değildir, övdüğü kişiyi başka şairlerde olduğu kadar göklere çıkarmaz. Bu kişilerin bilgisini dinî yönünü veya kahramanlığını, cömertliğini över. 4. kaside de olduğu gibi bazen tabiat unsurlarından faydalanarak öveceği kişinin üstünlüğünü dile getirir veya tarihteki din büyüklerine benzetir (K5).

Fahriyede kendini övmekten çok, bahtından, çaresizliğinden, sıkıntılarından bahsederek, seyit olan bir kişinin bunları çekmesinin doğru olmadığını söyler ve övdüğü kişiden yardım ister. Bazen sanatını, şiirini, mana gücünü ve faziletini kısaca över (K2).

Dua kısmında da, klâsik bir şekilde övdüğü kişinin ömrünün uzun, mutluluğunun sürekli olması konusunda dua eder.

Gazellerine gelince, bunlarda tamamen Rumeli şairlerinin ve Âşık Çelebi'nin mizacının özelliklerini bulmak mümkündür. Gazellerinin asıl konusunu aşk ve güzeller teşkil etmektedir. Bunun yanında Serfice ve Narda'yı anlattığı tabiat tasvirine yer veren gazelleri orijinaldir.

Aşkı ifade ederken samimiliği, sadeliği dikkat çekicidir. Bazen halk koşmalarında ve dörtlüklerde görülen bir sadelik ve samimiyet vardır:

Dilde uşkunla dag uyandurdum Yine ben bir çerâg uyandurdum Yâr sevmez dimiş beni cândan Cân virüp yoluna utandurdum

G31/1-2

Âşık Çelebi aşk elinden bir yandan hoşnut iken bir yandan da yeri gelince acısının şiddetini dile getirmekten de duramaz;

Cigerde âteş-i 'ışkunla yanmış taze dâgum var Er ocagı gibi dâim söyünmez bir çerâgum var G83/1

Îlâhi isterem gözde gönülde eşk ü ah olsun Hemîşe münkir-i 'ışka iki sâdık güvâh olsun

G69/1

Bunları söylerken, çektiği acıyı da bir gazelinde şöyle dile getirir:

Sanmamız ağlar Müselmân hâlüme kâfir güler

Kâfir ağlar böyle kalursam bana itler güler

N'ola gülsem âhiretde dünyâda çok ağladum Düşde ağlayan kişi uyanıcak dirler güler

G99/1, 2

Onun aşkı genellikle cismânîdir. Fuat Köprülü Âşık Çelebi'nin tamamiyle sûfiyâne bir ilham ile yazan vahdet-i vücûdcu şairlerin aleyhinde bulunduğunu söylemektedir⁴ Ancak bazı beyitlerinde tasavvufî unsurları bulmak mümkündür. Şu mısrada tasavvuf ehli bir insanın söyleyişini görmekteyiz:

Cihanı hiçe şatdum şimdi yokluga huzurum var Şu beyitlerde de tasavvufa yer vermiştir:

Yine cuyâ-yı zülâlün vaşlı kim gark-âb iken N'ola dinse aşinâ-yı kulzüm-i vahdet bana

Şol kadar müstarrakam nur-ı tecellin ile kim

⁴ Fuat Köprülü, a g e, s.699.

Yâr u agyar adını anmak gelür gayret bana

G6/3-4

Fuzûlî'yi hatırlatan şu gazelinde aşkın yanında yalnızlık acısını da çektiği görülür:

Ne açar var bana zahm-ı hadeng-i yârdan gayrı Ne aglar bulunur bu dîde-i bîdârdan gayrı

G15/1

Şiirlerinde bütün bu sıkıntılarından mesul olanı aramış ve talihini suçlu bulmuştur:

Tali itdi beni serkeşte-i 'ışk-ı cânân Tali' itdi beni meftûn u belâ-yı hicrân

TB/I-4

Âşık Çelebi'nin divanında, kaside ve gazellerine göre küçük bir yer tutan musammatlarında da gazel ve kasidelerindeki üslûp ve muhteva hususiyetleri görülür.

Yine devrandan şikâyetçidir. Daima mesleği olan kadılıktan ayrılmayı düşünmüş, mesleğinden hiç hoşnut olmamıştır:

Geçdi emân-ı safa vü gitdi devranı-ı vefâ Geldi eyyâm-ı belâ vü irdi hengâm-ı 'ana

Bize sensin eskiden hem-dem kadimi âşinâ Ey felâket 'âlemî ehlen ve sehlen merhabâ

M 1/I

Murabbaları bestelenmeye müsait bir yalınlıktadır. Bunların birinde $\hat{A}h$ elinden kızlarun feryâd elinden kızlarun gibi son derece sade, tamamen Türkçe kelimelerle örülmüş mısralara çokça rastlanır.

Âşık Çelebi Divanı'ndaki son manzume olan II. Selim'in tahta çıkışına dair yazdığı murabba şeklindeki culûsiyye ise, padişaha övgü niteliğindedir.

Sonuç olarak, Âşık Çelebi, diğer şairlerin kullandığı konuları kullanmakla birlikte, onlardan fazla kendi hayatı ve mizacını yansıtmakta, daha çok gerçek hayatı ifade etmektedir diyebiliriz.

BİBLİYOGRAFYA

Barak, Faruk, *Âşık Çelebi Divânı*, Ankara Üniversitesi DTCF, TDE Böl. Mezuniyet Tezi, Ankara 1971.

Beyzâdeoğlu, A.Süreyya, *Âşık Çelebi Tezkiresini Tetkik*, İstanbul Üniversitesi Edebiyat Fak. TDE Böl. Mezuniyet Tezi, İstanbul 1968.

Canım, Rıdvan, *Latifî Tezkiretü'ş-şuarâ ve Tabsıratu'n-nuzemâ*, Ankara 2000.

Ergün, Saadet Nüzhet, Türk Şairleri, C.1, İstanbul Tarihsiz.

Gökyay, Orhan Şaik, "Âşık Çelebi Tezkiresi", İstanbul Üniversitesi Edebiyat Fakültesi Dergisi, S.30, 1976.

Gözübüyük, Faik, *Âşık Çelebi ve Tezkiresi*, İstanbul Üniversitesi Edebiyat Fakültesi, TDE Böl, Mezuniyet Tezi, İstanbul 1952.

Köprülü, Fuat, "Aşık Çelebi", İslâm Ansiklopedisi, C.1, İstanbul 1965.

Kurnaz, Cemal, "Âşık Çelebi'ye Göre Hayali Bey", *Türk Kültürü Araştırmaları* (Prof. Dr. İbrahim Kafesoğlu'nun Hatırasına Armağan), C.23, S.1-2, 1985; (Aynı yazı) *Divan Edebiyatı Yazıları*, Ankara 1997.

Kutluk, İbrahim, *Beyanî Mustafa bin Cârullah Tezkiretü'ş-Şuara*, (Eski Yazılı Tenkitli Metin), Ankara 1997.

Mehmet Süreyya, Sicill-i Osmanî, İstanbul 1311.

Mehmed Tahir, Osmanlı Müellifleri, C.2, İstanbul 1333.

Meredith G.-Owens, *Meşairü'ş-şuarâ or Tezkere of Âşık Çelebi*, London 1971.

Nev'izâde Atâî, *Şakayık Zeyli*, C.1-2., İstanbul 1286.

Okan, Sabahat, *Tezkire Sahibi Âşık Çelebi'nin Hayatı ve Divânının Transkripsiyonu*, İstanbul Üniversitesi Edebiyat Fak. TDE Böl. Mezuniyet Tezi, İstanbul 1951.

Savaş, Mehmet, *Âşık Çelebi'ye Göre Kuzey Karadeniz Havalisi*, İstanbul Solmaz, Süleyman, *Ahdî ve Gülşen-i Şuara'sı*, Ankara 2005.

Songun, Burhan, *Âşık Çelebi'nin Mirâcü'l Eyâle ve Münhâ-ce'l Adale'si*, İstanbul Üniversitesi Edebiyat Fak. TDE Böl. Mezuniyet Tezi, İstanbul 1966.

ÂŞIK ÇELEBİ DİVANI

1

Mefâ'îlün Mefâ'îlün Mefâ'îlün Mefâ'îlün

- 1 Seher-geh Hüsrev-i mesned-nişîn-i kal'a-ı mînâ Geyindi bir zemînî âsumânî hil'at-ı dîbâ
- 2 Süvâr-ı hınk-ı zerrîn zeyn olup itdi 'alem ber-dûş Şuâ'ından çeküp bir tîg-i âteş-tâb u berk-âsâ
- 3 Neberd itdi fezâ-yı çarh-ı târemde yüz agartdı Girîzân oldı ceyş-i reng-bârû oldı nâ-peydâ
- 4 Buyurdı safha-i sîm-âb-ı sîmâya debîr-i çarh İdüp nîlî tabakda hall-i zer-menşûr ide inşâ
- 5 Görinen sanmanuz kavs-i kuzahdur âsumân üzre Düm-i tâvûsdur kim oldı bu menşûra ol tugrâ
- 6 Buna kerrubiyânı sebt-i şâhid eyleyüp cümle Umûr-ı 'âlemi tefvîz kıldı ana külliyâ
- 7 Cenâb-ı Muhyî-i dîn mâhî-i gam hâmî-i İslâm Şeh-i erbâb-ı fetvâ h*â*ce-i dîn dâver-i dünyâ
- 8 Eyâ dânâ vü âgâh-ı rümûz-ı *alleme'l-esmâ*⁵ Eyâ müşkil-küşâ-yı nüktedân-ı sırr-ı *mâ evhâ*⁶
- 9 Birûnun vâridât-ı zü'l-celâle manzar u mazhar Derûnun pertev-i envâr-ı Hakka mehbit ü meclâ
- 10 Makâlun matmah-ı efkâr u enzâr *üli'l-ebsâr* Kelâmun meş'arü'l-hak *kadd ya'lû velâ-yu'lâ*⁷
- Zihî mu'ciz ki 'âlem mürde halk efsürde olmışken İrişdün 'adl ile mânend-i 'Îsâ eyledün ihyâ

⁵ Âdem'e bütün isimleri öğretti. Bakara 31.

⁶ Kuluna vahy etti. Necm 10.

⁷ Hak daima yücedir, hiçbir şey onun üzerinde olamaz.

- 12 Şu'â'-ı mihr-i 'âlem-tâb ile mektûb idüp irsâl İder her subh-dem kâdî-ı gerdûn senden istiftâ
- 13 Ri'âyetle getürür nâme-i fetvânı başında Degül gerdûnda görinen meh-i nev gurre-i garrâ
- Belî hakk olmaz idi nakş-ı hestî levh-i 'âlemden Eger sakk-ı hayâtun sıhhatine eylesen imzâ
- Hümâ-yı fikretün pervâz-ı sahn-ı lâ-halâ eyler Olur mı mâ-'adâ-yı küngür-i 'arş-âşiyân hâşâ
- 16 Tufeylîdür sa'âdet isme lâyıkdur müsemmâsı Bi-hakkı 'alleme'l-esmâ⁸ bi-hakkı sırr-ı mâ evhâ⁹
- 17 Fevâzılle fazâyılle olupdur mecma'ü'l-bahreyn Müsahhar olsa tan mı zâtına fetvâ ile takvâ (2a)
- 18 Eger 'ilm-i tefâsîri hadîsün olmasa Keşşâf Meşârikle Mesâbih olmaz idi gün gibi peydâ
- 19 Beyânundur bedî' ile ma'ânî bâbına Miftâh Kelâmun rûh-perver mantık-ı 'Îsâ durur gûyâ
- 20 Hidâyet irişüp muhtâr olup kenz-i 'ulûm oldun Bu fazl-ı bî-nihâyetle vücûdun Ekmel ü evlâ
- 21 Mesîh-âsâ kelâmundan olurken mürdeler zinde Ne cânı var ki hikmetden dem ura Bû 'Alî Sînâ
- 22 Mutavvel eyleme Telhîs kıl evsâfını anun Niçe kez irişe rûz-i hesâb olınmaya ihsâ
- 23 Sühan-senc ü füsûn-ger nükte-dân u mû-şikâf-ı dehr Eger cem' olsalar tafsîl olunmaz medhün icmâlâ
- N'ola ben zerre-vârı pertev-i mihrünle toprakdan

⁸ Âdem'e bütün isimleri öğretti. Bakara 31.

⁹ Kuluna vahy etti. Necmm 10.

- Eger ref' eylesen mânend-i hûrşîd-i cihân-ârâ
- 25 Şefâ'at kıl bana dâr-ı na'îm-i lutfun it me'vâ Niçe bir veyl-i gamda diyeyüm feryâd-ı vâ-veylâ
- Ne yerde kim ser-i âb anladum buldum serâb anı Beni sîr-âb kılmadı mey-i câm-ı sürûr-efzâ
- 27 Karâr u 'akl u sabr u dil gidüp nâ-çârum ihsân kıl Kerîmâ fâzılâ gerdûn-medârâ âsumân-kadrâ
- 28 Beni eller ayaklar dest-gîr ol al elin elün Cihâna lutf u cûdun şâmil u 'âm oldı külliyyâ
- 29 Nitekim devlet-i dünyâyı zâtına tufeyl itdün İlâhî sen müyesser kıl kemâl-i devlet-i 'ukbâ

2

Fe'ilâtün Mefâ'ilün Fe'ilün

Hâce Çelebi Efendi'ye virilmişdür

- 1 Ey güzîn-i mu'âşir-i 'ulemâ Serv-i ser-hayl-i zümre-i fuzelâ
- 2 Eşref-i halk u ekmel-i mahlûk Hâce-i dîn ü dâver-i dünyâ
- 3 Efdal-ı dehr ü müftî-i sakaleyn Merci'-i küll ü elyak-ı fetevâ
- 4 Zâtun oldı esâs-ı hâne-i şer' Fikretündür o hâneye bennâ
- 5 Zihnün olmış durur usûl-i usûl İltifât itmesen fürû'a n'ola (2b)
- 6 Ola kavl-i esahh üzre 'amel Bî-reviyyet ger eylesen imzâ

- 7 Dem-i âhirde nitekim 'Îsâ Eyledün şer'-i Ahmedî ihyâ
- 8 Hâce-i 'ilm-i nakd u fazl u kemâl Hâce-i küll ehl -i fazl u behâ
- 9 Şeyh-i İslâm görse 'irfânunCân u dilden mürîd olurdı sana
- 10 A'zamısın bülend-pervâzunHîç olur mı sana şebîh hümâ
- 11 Ey ki 'akl u 'âkîlde mümtâz V'ey ki 'ilm ü nühâda bî-hemtâ
- 12 Tab'un âyîne-i serâyir-i gayb Vâridât-ı İlâhîye meclâ
- 13 Fukarâya penâh babundur İşigündür garîb olanlara câ
- 14 Niçün ide tabîb-i hâzıkdan Hâlini derd-mend olan ihfâ
- 15 Ben ki bir derd-mend ü nâ-çârem Zâr u dil-haste vü garîb ü gedâ
- 16 Efkarü'l-hâl-i firka-i fukarâ Ez'afü'l-bâl-i zümre-i zu'afâ
- 17 'Âşık ibn-i 'Aliyy-i Nattâ'î Bende-i kemterîn-i âl-i 'abâ
- 18 Valideyn öldi nâ-tüvân kaldum Erş ile habbe degmedi kat'â
- 19 Geçdi zilletle altı yıl 'ömrüm Fark olınmadı gamla subh u mesâ
- 20 Şugl iderdüm yine bu hâletle

Câna râhat gelürdi zecr ü 'anâ

- 21 İstifâde idüp medârisde Eyledüm hayli hizmet-i 'ulemâ
- 22 Kimi benden yeg ise akrânun Kimisinden degül idüm ednâ
- 23 Zevk-i şugl ile sabr-ı fakr ile Geçinürdüm ne ise bâl ü belâ
- 24 Âh kim men' idüp tarîkümden 'Âkıbet yolum urdı fakr u fenâ (3a)

 3^{10}

Mefâ'îlün Mefâ'îlün Mefâ'îlün

- Vekîl-i mutlak-ı sultân-ı 'âlemsin cihân içreN'ola ni'me'l-vekîl ismiyle nâmun bulsa 'unvânı
- 2 Sana ey 'akl-ı evvel Âsaf-ı sânî diyen kimdür Ki görse 'akl-ı evvel re'y u tedbîrün olur sânî
- 3 Nevâl-i dest-i dür-pâşun haseddür agladur bahrı Kef-i gevher-feşânun gayretidür inleden kânı
- 4 Pür itdi kâse-i hırsı toyurdı çeşm-i âmâli Nevâl-i bî-kerân u lutf u ihsân-ı firâvânî
- 5 Yiridür nâme-i ser-beste-i tedbîrüne dinse Kilîd-i feth-i ebvâb-ı mühimmât-ı cihân-bâni
- 6 Sıyup bir 'askeri bir kişveri bir re'yün eyler feth Zihî tevfîk-i Yezdânî zihî te'yîd-i Rabbânî
- 7 Getürdün taht-ı Belkîs-ı murâdı şâh yanına Yine tecdîd itdün Âsafâ tavr-ı Süleymânı
- 8 Zevâl irmez ana bir zerre 'uhdende havâdisden

Yaprak kopması sebebiyle kasidenin başı yoktur.

- Zen-i mihr alsa zerrîn sîni başa itse seyrânı
- 9 Sitanbul içre Kâgıd-hâne suyı gibi tedbîrün Cihâna mülk-i zulmetden getüre âb-ı hayvânı
- 10 Cinân-âsâ yapıldı hışt-ı sîm ü zerle beytü'l-mâl Ana mi'mar-ı mi'yâr-ı sahîhün olalı bânî
- 11 Kaçan kim berk-i tîgün ebr-i hışmundan ola zâhir Yaga hûn-ı 'adû-yı hâk-sârun yire bârânı
- 12 Asılmışdur kılıcun küngür-i 'arş-ı mu'allâda Güneş zer şemsesidür mâh-ı nev ucında yalmanı
- 13 Ne 'asker ki mukâbil oldı sana tîg-i bürrânun Siper-veş gözlerine teng itdi sahn-ı meydânı
- 14 Ne kal'a ki hisâr itdün misâl-i kulle-i hâver Dikildi gün gibi burca livâ-yı feth-i sultânî
- 15 Tutup sıyt u sadâ-yı satvetün âfâkı ser-tâ-ser İrişdi şark u garba mâ-hasal tîgün hirâsânı
- Olupdur hûn-ı küffâr ile destün pençe-i mercân N'ola dirsem sana bahr-i şecâ'at ey gazâ kânı
- 17 Yiridür olsa cârûb-ı harîm-i hassı zülf-i hûr Revâdur şehper-i kerrûbiyân olsa meges-rânı
- 18 Yüri firsat senündür Hak kılıcın sal sola saga Disün bâzûna kuvvet âsumândan cavk-ı rûhânî
- 19 Muhammed sırrı vardur sende Hak olsun nigeh-dârun Ne gam yüz bin Ebû Cehl olsa tutsa rûy-ı devrânı (3b)
- 20 Virildi sana çevgân-ı sa'âdet cânib-i Hakdan Sa'âdet tûpın ur aldun bugün fırsatla meydânı
- 21 Kemend-i hîle ile ana irgürmez gezend a'dâ Olupdur 'arş ile hem-tâk kasr-ı kadrün eyvânı

- Zebûnundur senün dîv-i 'âdû ins-i ehibbâ hem Elünde mûm-veş râm oldı çün mühr-i Süleymânî
- 23 Kudûm-ı paküne bîdâr idi mânend-i nergis-zâr İki yıl olmış idi ehl-i hakkun çeşm-i giryânı
- 24 Bi-hamdi'llah irüp tîr-i du'â ûmâc-ı maksûda İrişdi 'âleme sehm-i sa'âdet lutf-i Rabbânî
- 25 Egerçi kevkeb-i ikbâl u devlet râci' olmışdı Yine buldı şeref burc-ı sa'âdet mihr-i rahşânı
- 26 Hazân-ı hüzn ile pejmürde idi dehr gülzârı Bahâr itdi esüp yine nesîm-i feyz-i Sübhânî
- 27 'Arûs-ı bahta virmişken talâk idüp yine ric'at Nişân içün konıldı hâtem-i mühr-i Süleymânî
- 28 Yürek oynaması tutmışdı dehri ıztırâb ile Sadâret sadrına geçdün oturdı yirine cânı
- 29 N'ola gitdiyse elden bir iki gün hâtem-i devlet Ki dirler dîv almış bir zemân mühr-i Süleymânı
- 30 Bulurken câh u 'unvânı sa'âdet ehli mansıbla Senün zât-ı şerîfünle sa'âdet buldı 'unvânı
- 31 Kudûm-ı pâküne gökden melekler zer nisâr itdi Seher-geh sanmasunlar şu'le-i mihr-i dırahşânı
- 32 Cihân-ı mürde 'Îsâ-veş demünden tâze cân buldı Hayât-ı tâze tutdı 'âlem-i ecsâd u ekvânı
- 33 Dinür er devleti er öldürür gerçi meseldür bu Diriltdi devletün mürdeyken ammâ cümle insânı
- Ne feyz-i 'âm olur yâ Rab bu lutf-ı bî-kerânun ki Bunun âsârı tutdı 'âlem-i emsâl u a'yânı

- 35 Ne câm-ı râhat-encâm-ı safâ-bahş u ferah-zâdur Ki bir cur'ayla mest itdi ser-â-ser halk-ı devrânı
- 36 Mu'attâr şemme-i bûyıyla bunun 'âlem-i ervâh Münevver tâb-ı şevkıyle anun bezm-i heyûlânı
- 37 İletdi 'ilmi 'ayna cür'asıyle kesb-i erbâbı Getürdi vecde bu neş'eyle ehl-i keşf ü vicdânı
- 38 Ne ni'metdür ki erbâb-ı savâmi' şükr-gûyâsı Ne devletdür ki ashâb-ı medârisdür senâ-h*â*nı (4a)
- 39 Nesîm-i iltifâtunla şüküfte 'ilm gülzârı Nem-i bârân-ı lutfunla mutarrâ şer' bûstânı
- 40 Eger dâmân-ı re'yün irişüp fânûs olmasa Söyündürür idi tünd-bâd-ı fitne şem'-i îmânı
- 41 N'ola sûz-ı derûnın yana yana aglasa 'Âşık Ki şem'ün aglamak yanmak yakılmakdur ezel şânı
- 42 Figân kim dest-i mihnetden alınmadı girîbânı Dirîgâ ki ilişdi kaldı hâr-ı fakra dâmânı
- 43 Dem-i 'adlünde âzâde vü âsûde cihân halkı Revâ mıdur Muhammed âli itmek âh u efgânı
- 44 Cihân bir gülsitândur deste-i reyhândur âl anda Nem-i bârân-ı lutfun eylesün ser-sebz o reyhânı
- 45 Egerçi âsumânda encüm-âsâ hadden efzûndur Hudâ bu yir yüzinde lutfunun şem'-i fürûzânı
- 46 Çerâg idin Muhammed âlini eyyâm-ı 'adlünde Ki ekser ulularun sebz olur şem'-i şebistânı
- 47 Yalınuz şi'r ü inşâdan dem urmaz 'Âşık-ı şeydâ İder hem da'va-i fazl u kemâl u 'ilm ü 'irfânı
- 48 Kitâbet hizmetin emr it mükâtib kulun olayın

- Cihânun beglüginden yeg bilürem Hak bilür anı
- 49 Şeh-i hûrşîd-kadrün müşterî-rütbet vezîrisin 'Utârid olsa lâyıkdur debîr-i çarh-ı dîvânı
- 50 Meded öldüm gam-ı 'azl ile derd-i fakr u fâkayla Kapun dârü'ş-şifâsından demidür eyle dermânı
- 51 Zebân-ı nâtıka lâl olsa n'ola vasf-ı zâtunda Dem-i i'câze gelse nakşa sûret viremez Mânî
- Nice pervâz ide şehbâz-ı dil medhün fezâsında 'Alayık riştesi bend eylemişdür bâl-i iz'ânı
- 53 Karînün evliyâ ervâhı yârun himmet-i aktâb Mu'înün yümn-i te'yîd-i Hudâ tevfîk-i Yezdânî

4

Fâ'ilâtün Fâ'ilâtün Fâ'ilün

Pâdişâh-ı 'Âlem-penâh Hullidet Hılâfetuhu Hazretlerine

- Döymeyüp subh-ı tecellîde dem-i dîdâra gül Tûr-ı Mûsâ gibi kendin itdi pâre pâre gül
- 2 Subh-dem dem urmasa sırr-ı Ene'l-hakdan eger Gâlibâ Mansûr-veş asılmaz idi dâra gül
- 3 Nev-bahâr oldı açıldı gonce-lebler gülşene Yir yok yapışa penbeyle meger dîvâre gül
- 4 Lâleler la'lîn-surâhî câmlar zerrîn-kadeh 'Iyş içün geldi gül-efsûn içmege gülzâre gül
- 5 Cilve eyler nûrdan şehperle kâh-ı şâhda Cennet-i gülşende benzer Ca'fer-i Tayyâra gül
- 6 Bâd Düldüldür benefşe önce yürür Kanberî Surh-ruhsâr oldı döndi Haydar-ı Kerrâra gül

- Berg sanma sebz ile eyler 'alamet başına
 Benzeyelden hayr-ı âl-ı Ahmed-i Muhtâra gül
- 8 Mâlîk-i Dînâr gibi mâlik-i dînâr iken Jende-pûş oldı giyüp bir hırka-i sad-pâre gül
- 9 Bülbüle geh Gülsitân geh Mantıku't-tayr okıdur Gâh Sa'dîye ider taklîd geh 'Attâra gül
- Zehr-i cevr ile helâk olsa 'aceb mi 'andelîb Beyzası jâle dönüpdür halka olmış mâra gül
- Jâleyi her şeb sürer başına mânend-i gül-âb Âh-ı bülbülden sudâ'ı var dönüp bîmâra gül
- 12 Her gice şeb-bûylar yakar buhûr-ı Meryemi Deyrdür sahn-ı çemen anda büt-i Ferhâre gül
- 13 Ser-be-ser gûş olmaz idi bülbülün efgânına Lutf-ı tab'ından eger meyl itmese eş'âra gül
- 14 Elden ele vara vara oluban âvâre gül Çâk-dâmân oldı döndi şâhid-i bâzâra gül
- 15 Kullugunca eyledi her pâresin bâd-ı seher Çünki koyup hüsnün itdi gülşene nezzâra gül
- 16 N'eylerem sensiz gülistân seyrini 'ışkunda çün Eşk müldür nâle bülbül âh sünbül yâre gül
- 17 Saklanursa hattun içinde n'ola gül-gûn ruhun Konılur evrâk-ı mushaf içre ey meh-pâre gül
- 18 Girye vü şebgîrüm eyler tâze vü ter hüsnüni Buldı şebnemle tarâvet ey kamer ruhsâre gül
- 19 'Âşıka bir gül yeter lâzım degül tekrâr çün'Âşıka lâzım degül gül besdür ol ruhsâre gül
- 20 Gâh zahm-ı tîr-i hicr ü gâh dâg-ı derd-i 'ışk

- 'Âşıkun gönlini açar ara gonce ara gül
- 21 Derhem olup gonce-veş pîçîde-rûluk eyleme Gül gibi handân olup ey baht gül bir pâre gül
- 22 İrmedi mi gûşına bâd-ı sabâdan 'adl-i şâh Nice bir âzâr eyler 'andelîb-i zâre gül
- 23 Jâledür alnı deri hûn-ı cigerle kesbidür Geldi anı bâb-ı şâha itmege îsâre gül
- 24 Sensin ol sultân-ı kişver-gîr tîg-i 'adlüne Yazılupdur mihr-i 'âlem-tâb bir zer-kâre gül
- 25 Server-i serdârısın şâhân-ı dehrün hüsrevâ Nitekim sultân olupdur cümle-i ezhâre gül
- 26 Bâd-ı 'adlünle gülistân-ı zemân her dem bahâr Tâb-ı hurşîd-i cemâlünle cihân hem-vâre gül
- 27 Tâb-ı tîgünle dil-i kâfirden îmân urdı berk Virmedi bâg-ı cihânda gerçi seng-i hâre gül
- 28 Meclis-i hâsunda bülbüller ser-âgâz eylese Dâyire tutar yanınca nagme-i edvâre gül
- 29 Kîse idüp gonceyi jâleyle urdı mühr ana Pîş-keş göndermege sen server-i serdâre gül
- 30 Bâg-ı kadründe felek bir kûze-i pür-âbdur Solmamaga konmış anda seb'a-i seyyâre gül
- 31 'Âlemi ser-sebz ü handân eyleyen 'adlün durur Su içinde tâze vü ter saklanur hem-vâre gül
- 32 Serv sancak lâle bayrak tîg sûsen tîr şâh Hâzır olmışdur rikâbunda şehâ peygâre gül
- 33 Haymeler kurmış alâylar baglamış ezhârdan Dirnegi var bâgda benzer sipahsâlâra gül

- 34 Sıklugı dindi dem-i 'adlünde sâz erbâbınun Devr-i insâfunda varmaz hâne-i hammâra gül
- 35 Götürür tûmâr-ı şi'rün başı üzre ehl-i dil Takınurlar ziynet içün nitekim destâre gül
- 36 Der-miyân itmiş zer-i sürhını açıkdur eli Öykünür dest-i güher-pâş-ı şeh-i serdâre gül
- 37 Kâdir iken niçe kîse dirhem ü dînâre gül Jâlelerden lü'lü'-i nâb u dür-i şehvâre gül
- 38 Şeh-levendâne diyüp dilde niyâz elde piyâz Berg-i sebzeyle diler şâh işigine vara gül (5b)
- 39 Rişte-i cân ile bagla deste eyle gülleri Yâd ide elvâre ahvâlün yalvara gül
- 40 Tab'-ı nâzük pâdişâha 'Âşıkâ virme sudâ' Bülbül-âsâ nâliş itme döyemez âzâre gül
- 41 'Arz-ı eş'âr âsitân-ı pâdişâh-ı 'âleme Fi'l-mesel 'âşık iletmek gibidür gül-zâre gül
- 42 Gonce-veş kan tolmasa peykân-ı mihnetle yürek Bir gül-i sad-bergdür dir idi bu tûmâra gül
- 43 Dil tolu hûn-âb etrâfında her sû tîr-i gam Gûyîyâ gül-zârda düşmiş miyân-ı hâre gül
- 44 Bûy-ı fazlum itdi yirüm âteş-i zillet benüm Şimdi mi oldı gül-âb içün salınmak nâra gül
- Nahl-i güldür bûy-ı ma'nâ ile pür her mısrâ'ı Gülsitândur şi'rüm açılmış der ü dîvâre gül
- 46 Cilve idüp niçe kim gülşen bahâr irüp ola Serv kâmet zülf sünbül gonce leb ruhsâre gül

47 Solmaya güler cemâlün gül yüzün handân ola Nev-bahâr irüp niçe kim fer vire gül-zâre gül

5

Mefâ'ilün Fe'ilâtün Mefâ'ilün Fe'ilün

Pâdişâh-ı 'Âlem-penâh Hullidet Hilâfetuhu Hazretlerine virilmişdür, Edirne'de.

- 1 Eyâ sipihr-i sehâ âfîtâb-ı burc-ı celâl Huceste-tâli' ü ferhûnde-fer u ferruh-fâl
- 2 'Atîk-i sıdk u 'Ömer-ma'delet 'Alî-'irfân Hasan-mahâsin ü 'Osmân-hayâ Hüseyn-hısâl
- 3 'Alî-sehâ vü me'âlî-medâr ü 'âlî-şân Hasen-hısâl u hasen-hulk u sâhibü'l-efzâl
- 4 Kalâyid-i minenün tavk-ı gerden-i gerdûn Cevâhir-i suhenün 'ıkd-ı dürr ü la'l u le'âl
- 5 Zihî ki mün'akis âyînei-i dirâyetüne Nukûş-ı sûret-i encâm u çihre-i âzâl
- 6 Eyâ mü'essis-i bünyân-ı 'adl u hâmî-i dîn Eyâ mu'ammer-i vîrân-ı musahhih-i ahvâl
- 7 Müzîl-i zulm u elem mâhî-i zalam-ı sitem Mu'în-i şer'-i nebî *bi'l-guduvvi ve'l-âsâl*¹¹
- 8 Vücûd-ı eşrefüne çâr-'unsûr olmakdur Dem-i elestde 'irfân u fazl u 'ilm ü kemâl (6a)
- 9 Cihânı 'adl ile itdün Mesîh-veş ihyâ Cefâ vü zulmı götürdün çü fitne-i Deccâl
- 10 Bahâr-ı ma'deletünle riyâz-ı şer'-i şerîf Açıldı verd-i tarî gibi güldi gonce-misâl

_

¹¹ Sabah, akşamüstleri Nur 36.

- 11 Sürûş-ı 'âlem-i gaybî didi *cezâke'llâh* Sitâyiş eyledi aktâb u evliyâ vü ricâl
- 12 Sürûr-ı şâdiye gark oldı halk ser-tâ-ser Safâ vü'işret ile oldı dehr mâl-â-mâl
- 13 Cihâna meslik olup râh-ı rüşd ü menhec-i hak Tutuldı himmetün ile tarîk-i zulm u zalâl
- 14 Çü oldı tâze vü ter dîn-i Hakk u şer'-i Nebî Demidür eyleyesin hâl-i âlî istikmâl
- 15 Revâ mıdur ki zemân-ı 'adâletünde ola Resûle müntesib olan müşevveşü'l-ahvâl
- 16 Benem ki itdi bana dehr kahr-ı gûn-â-gûn Benem ki itdi bana devr cevr ü hîle vü âl
- 17 Garîb ü müflis ü ser pâ-bürehne vü 'uryân Ne hân-mân u ne tâc u kabâ ne mâl u menâl
- 18 Ham itdi kaddümi bâd-ı melâlet u endûh Hilâl gibi yirüm oldı şimdi saff-ı ni'âl
- 19 Tefevvuk itdi zahîr u nasîr ile akrân Tekaddüm eyledi mâl ile mülk ile emsâl
- 20 Dirîg subh gibi çâkdur girîbânum Meger ki şâm-ı belâ ola egnüme kara şâl
- 21 Vücûd-ı kişver toldı 'asâkir-i endûh 'Alîlük eyle demidür meded iriş at sal
- Zebûn iderdi beni küşt-gîr-i fakr u fenâZebûnum olsa şecâ'atda niçe Rüstem-i Zâl
- 23 Dirîg eger bu dirîg ile 'ömr iderse güzer Figân eger ki figânla geçerse hefte vü sâl
- 24 Yakamı kurtaramam dest-i gussadan dönüp

- Yakama dikilü devlet gibi bu derd ü melâl
- 25 Halâs-ı hâtıra oldukca baht-ı şûm ider Zihî tasavvur-ı bâtıl zihî hayâl-i muhâl
- 26 Tebessüm eylemeye gonce-i murâd-ı derûn Pür olsa cümle yemîn ü yesâr-ı bâd-ı şimâl
- 27 Bu tîre bahtuma irmez benüm sa'âdet eger Açılsa cümle cihân ehline mübârek-fâl (6b)
- 28 Ne denlü katı gönüllü vü taş bagırlu ise Enîn ü nevham işitse figânlar ide cibâl
- 29 Yabana atdı elüm aldı tîr gibi sipihr Belümi bükdi sitem kabzasında kavs-misâl
- 30 Çü tab'-ı âyîne-i vâridât-ı gaybîdür Ferâgat eyle ko tafsîli kıl sözi icmâl
- 31 Şikâyetüm kapuna 'arz iderdüm eylemese Eger bu tâli'-i meyşûm u baht-ı bed-ihmâl
- 32 Nisâr itmek içün ayagun türâbına Pür oldı kâse-i la'lîn dîde dürr ü le'âl
- 33 Eger sahîfe-i dil tolmasa fütûr-ı gumûm Ne mümkin idi k'ideydüm medâyihün icmâl
- 34 Olurdı dem-be-dem evsâfun ile gûyende Zebânum eylemese 'ukde-i melâlet-i lâl
- 35 Ayaklar oldı beni fakr ile görüp iller Ayakda kalmışun ol dest-gîri gel ele al
- 36 Kapunda lutfun umar bende gerçi var bin bin Muhammed âline rahm it binini gör birin al
- 37 Terahhum eyle bakup fakruma siyâdetüme Be-hakk-ı zât u sıfat-ı Hudâ-yı celle celâl

- 38 Cihânda devlet ile ol mükemmelü'l-ahvâl Musahhihü'l-hasenât u muhassılu'l-âmâl
- 39 Şu kim hükûmetüne cân ile boyun virmez Takılsun ana kıyâmetde âteşîn aglâl
- 40 Şu zât ola mu'înün ki cümle-i mahlûk Yusebbihûne lehû bi'l-guduvvu ve'l-âsâ¹²l

6

Fe'ilâtün Fe'ilâtün Fe'ilün

Müfti-zâde Efendi Hazretlerine

- 1 Hamdü-li'llâh yine eltâf-ı Hudâ-yı müte'âl Devha-i 'ömrüne şâh eyledi bir tâze nihâl
- 2 Çarhı batdı güneşün yılduzı düşdi kamerün Ayun on dördi gibi eyleyeli 'arz-ı cemâl
- 3 Dem urup bâd-ı bahâr-ı kerem-i Kuddûsı Gül gibi güldi açıldı yine her gonce-i bâl
- 4 Bu sürûr ile felek raks ider döne döne Bu neşât ile cihân oldı yine hurrem-bâl
- 5 Şehr-i bâgı tonadup bir yire geldi ezhâr Oldı 'âlem ferah u şâdîyile mâl-â-mâl
- 6 Gonceler derisine sıgışamaz şevkınden Yaka çâk eyledi gül 'âşık-ı şûrîde-misâl
- 7 Eyledi mutrib-i bülbül güle karşu âheng Başladı nâz ile raks itmege her tâze nihâl
- 8 Serv hayrân ugut nergis ise kör bengî Lâle kanzîl kadehin elde tutar pür-mey-i âl

¹² Sabah, akşam O'na (Allah'a) tesbih ederler. (O'nu) yüceltirler. Nur 36.

- 9 Bir ayag üzre turup hizmet ider serv-i çenâr Yil yöpük oluban eser savurur bâd-ı şimâl
- 10 Su gibi ezber okur bu gazeli murg-i çemen Akıdur reşkden agzı suyını âb-ı zülâl
- 11 Gam-ı ebrun ile inceldi nizâr oldı hilâl Derd ile kâmeti ham oldı teni za'f ile nâl
- 12 Şem'-i tâcın felege atdı meger şevkınden Güle bakdı yüzine dün gice ol ruhları al
- Boynuna saldı vebâlini niçe pâ-mâlünZülfünün bendini kim didi sana boynunâ al
- 14 Gerçi ki dikkat ile bir kılı kırk itdi hıred Kimse bu mûy-miyân'eylemedi kılca hayâl
- 15 Zerrece kılca dehânıyle miyânı sırrın Kimse fehm eyleyemez n'itsün ana kîl ile kâl
- 16 Mihr kıl encüm-i eşke ki benüm hayfum alur Müşterî-rây u kamer-tal'at u hûrşîd-hısâl
- 17 Nûr-ı çeşm-i fuzelâ nûr-ı riyâz-ı 'ulemâ Sadef-i bahr-ı hüner gevher-i asdâf-ı kemâl
- 18 Döşedi ayaguna sebz-i çemenden dîbâ Aldı çünkim haber-i makdemüni bâd-ı şimâl
- 19 Olmaga gülşene geldükce ayaguna nisâr Bir tabakdur gül-i pür-jâle tolu dürr ü le'âl
- 20 Rıf'atün tâkına bir pâye sipihr-i nüh-tak Âsitânunda hilâlün yiridür saff-ı ni'âl
- 21 Çarh urur kasr-ı refî'ünde senün çarh-ı felek Şem'-i hûrşîd ile ey mâh çü fânûs-ı hayâl
- 22 Serverâ pîr-i felek nakd-ı nisâb-ı hüsnün

- Mâh-ı nevden eline keçkül alup itdi su'âl
- 23 Zerrece lutfun olur yıllar ile kâna nevâ Katrece cûdun olur niçe zemân bahre nevâl
- 24 Olmasa 'ilm-i tefâsîri hadîsün Keşşâf Kimse kılmazdı Meşârıkla Mesâbîhi hayâl
- 25 'Akl-ı küll cüz'î su'âlünle senün mülzem olur Mantıkun işidicek ehl-i kelâm olur lâl
- 26 Medhini kılma Mutavvel ko sözi Telhîs it Kimde var bulmaga ol bahr kenârını mecâl
- 27 Eb ü ceddüne göre cümle mevâlî-i cihân Diz çöküp dirler önünde radiya'llâhu Te'âl
- 28 Ben nice vasf ideyüm sen gül-i bâg-ı fazlı Medhüne 'âciz olup sûsen olupdur çün lâl
- 29 Bulamaz medhi fezâsına nihâyet bir kes İremez çünki o vâdîye gönül peyk-i hayâl
- 30 Bâg-ı 'âlemde müdâm açup elün çün 'ar'ar 'İzzet ü devletine eyle du'â her meh ü sâl
- 31 Benem ol mihnet-i devrân ile nâlân u zebûn Benem ol gayret-i akrân ile zâr u pâ-mâl
- 32 Dest-i gamdan yakamı kurtaramazın dönüp Yakama dikilü devlet gibi endûh u melâl
- 33 'Asker-i fakr u felâket beni maglûb itdi Vaktidür erlik idüp nat'-ı 'atâya at sal
- 34 Gerçi var lutfun umar bende kapunda bin bin Mustafâ âline rahm eyle binin gör birin al
- 35 Merhamet kıl bana ki eller ayaklar oldı Dest-gîr ol kerem it başun içün gel elüm al

- 36 Tîre-baht ola revâ mı kara günli 'Âşık Sürh-rû ola sürûr ile kamu zümre-i âl
- 37 Gülbün-i nev-resüni eyleye Hak ber-hordâr Tuta nev-bâveni ter tâze Hudâ-yı müte'âl
- 38 'Ömrüni devletüni 'izzetüni rıf'atunı Dem-be-dem rûz-be-rûz artura Allahu Te'âl (8a)

7 Fâ'ilâtün Fâ'ilâtün Fâ'ilâtün Fâ'ilün

Nişancı Beg Hazretlerine

- 1 Eyleyüp sevdâ-yı Hızr-ı hattunı rehber kalem Girdi mülk-i zulmete mânend-i İskender kalem
- 2 Matla'-ı nûr-ı cemâl u mazhar-ı sırr-ı celâl Olmasa olmaz idi lutf u safâ-güster kalem
- 3 Mebde-i isbât u mahv u merci'-i havf u recâ Kâr-ı bahşîş nef' ü zarr kassâm-ı hayr u şer kalem
- 4 Hayme-i dîne sütûn eyvân-ı İslâma 'imâd Devr-i eflâk-ı kemâl u dânişe mihver kalem
- 5 Künt-i kenzenden nümûne genc-i mahfîdür kemâl Hıfz içün anı tılısm-ı ejdehâ-peyker kalem
- 6 Barmagından akıdur halka zülâl-i ma'rifet Isbı'-ı mu'ciz-nümâ-yı Ahmedi ohşar kalem
- 7 Ger *nefahtu fîhi min rûhî*¹³den urmaz ise dem Mehd-i mahberden Mesih-âsâ niçün söyler kalem
- 8 Yirüdür dirsem eger mîzâb-ı feyz-i Hakk ana Halka isti'dâdına göre çü feyz eyler kalem

¹³ Ona ruhumdan üflediğim zaman Hicr 29, Sad 72.

- 9 Cem' olur zîr-i livâsına ümem gibi hutût Nâme mahşerdür livâü'l-hamde hem benzer kalem
- 10 Tûbî-i cennet dürür ki dâim olur ser-nigûn Sâhir-i Bâbildür asılmış yâhûd ber-ser kalem
- 11 Gâh mânend-i sabâ handân ider cân gülşenin Geh hazân eyler bahâr-i kalbi çün sarsar kalem
- 12 Anun ile kâyim olur çünki a'râz-ı hutût Lâyık oldur ki kelâm ehli diye cevher kalem
- 13 Gerçi el üzre tutılur nâme 'izzet ehli¹⁴
 Togrulukla itdi andan kadrini ber-ter kalem
- 14 Virmez idi dest-i kâtibde kerâmet olmasa Şâh-ı huşk iken hat u ma'nâyı berg ü ter kalem
- 15 Her ne denlü olsa çıkmaz sâkına bahr-ı midâd Gam degüldür zâhirâ olursa gâhî ter kalem
- 16 Geh lisân-ı vahy olup geh tercemân-ı gayb iken Vasf-ı zâtın eylemekde âciz ü ebter kalem
- 17 Zât-ı 'âlî-şân Nişâncı Beg ki adın yazmaga Meh devât u mihr kâgıd şu'le-i hâver kalem
- 18 Levh-i mahfûz üzre vasfun yazmaga Rûhü'l-emîn Târ-ı zülf-i hûrı itsün rişte-i mıstar kalem
- 19 Nâme irsâl eyleyüp her gün şu'â'-ı mihr ile Âsitânundan debir-i çarh eyler cer kalem
- 20 Yazdıgun her nâme ki bir gülşen-i inşâ olur Hat şükûfe nokta jâle satr cû 'ar'ar kalem
- 21 Dili tolaşur önüne gelse hengâm-ı sühan Taht-ı 'irfâna geçerken server-i kişver kalem

¹⁴ Vezin bozuktur.

- 22 Lezzet-i güftâr-ı şîrînünle yarıldı dili Eyleyelden şi'r-i şekker-rîzüni ezber kalem
- 23 Başını kat' eyleyüp bin kerre yararsan dilin Hükmüne baş indirür emrüne fermân-ber kalem
- 24 N'ola bâb-ı Hayber-i 'irfânı feth itdünse ger Çün elünde Zülfekâr-ı Haydar-ı saff-der kalem
- 25 Mûsa-i lutfun yed-i beyzâ ider geh nâmeyi Gâh kahrunla olur âteş-feşân-ejder kalem
- Şâ'ir-i sihr âferîn-i pür-füsûnsun eylesen Bir işâret barmagunla ser-fürû eyler kalem
- 27 Dest-i 'adlün kesdi destin sokdı katrana anun El uzunlığını resm idindügiyçün her kalem
- Vasfınun yüz binde birin yazmaga yüz binde bîr Olsa deryâ hep midâd u cümle bahr u ber kalem
- 29 Yazmaga dîvân-ı vasf-ı şân-ı 'âlî-kadrüne Bir gazel dise 'aceb mi tab'-ı 'Âşık ser-kalem
- 30 Yoluna baş vireni eylerse ger defter kalem Eylesün ben bî-ser ü sâmanı ser-defter kalem
- 31 Bûy-ı zülfün şemmesin vasf itmek olurdı eger Mümkin olaydı mürekkeb misk olup 'anber kalem
- 32 Nagme-i mutrib gibi olur sarîri dil-küşâ Çün gelüp bezm-i beyâna ola râmiş-ger kalem
- 33 Küngür-i eyvân-ı vasf-ı zülf-i yâre irmege Murg olup evrâkdan idinse bâl u per kalem
- 34 Ayagun topragına şerh itse 'Âşık sözini Tutuşa pûlâd<u>-ı</u> nâme aşına mermer kalem
- 35 Nüsha-i 'ilm ü kemâlüm görme lâyık serverâ

- 'Adlün eyyâmında şöyle nâkıs u ebter kalem
- 36 Halka erzâka ezel aklâm-ı kur'a salınup Sehm-i gayb olmış meger hisse bana mahber kalem (9a)
- 37 Lutf idüp kâtiblerün dîvânına yaz ben kulun Dime kim divâneye yokdur kalem yazar kalem
- 38 Safha-ı âfâka yaza şükr-i lutfun haşre dek Cism-i zârumda olup her muy ser-tâ-ser kalem
- 39 Fakr ile görüp beni yeg görme ehli câhı kim Ney tururken mu'teber olmadı sîm ü zer kalem
- 40 Kandadur ehl-i hevâ vü kanda ehl-i zevk ü fazl Bir midür insâf idicek nây u ney-şekker kalem
- 41 Yirini tutmaz kulunun bin gulâm-ı tîg-zen Her ne denlü olsa bürrân olmaya hançer kalem
- 42 Nitekim olup cihan içinde meşhûr-ı benân Ola geh 'irfân-nevâz u geh hüner-perver kalem
- 43 Hükmüne ola kalem-rev kişver-i ikbâl ü câh Emrünün fermân-güzârı tîg ü fermân-ber kalem

8 Fâ'ilâtün Fâ'ilâtün Fâ'ilâtün

Şerîfe-zâde Efendi defterdar oldıgunda virildi. Envâ-ı esâ'et u ehânet câ'ize sadaka itdiler

- Subh-ı devletden togup hurşîd-i rahşân-ı şeref 'Âlemi pür-nûr idüp irişdi devran-ı şeref
- 2 Al güller bitdi ser-sebz oldı bâg-ı ıstıfâ Gül gibi güldi açıldı verd-i handân-ı şeref
- 3 Lücce-i deryâda kalmış nice dürr izhâr idüp Mevc urup cûş eyledi deryâ-yı 'ummân-ı şeref

- 4 Derd ü gamdan mürde-veş fersûde idi niçe yıl Yirine geldi oturdı şükr kim cân-ı şeref
- 5 Âldür gonce n'ola itse 'alâmet sebz ile Toldı asâr-ı siyâdetle gülistân-ı şeref
- 6 Zerre-veş eşrâf yir yir n'ola eylerse zuhûr 'Âleme togdı bugün hûrşîd-i tâbân-ı şeref
- 7 Kıdve-i erbâb-ı devlet zübde-i ashâb-ı câh Fahr-ı erkân-ı sa'âdet zeyn-i divân-ı şeref
- 8 Fahr-ı nesl-i fahr-ı 'âlem hayr-ı âl-i hayr-ı halk Kurre-i a'yân-ı insân 'ayn-ı a'yân-ı şeref
- 9 Nûr-ı çeşm-i Mustafâ çeşm-i çerâg-ı Murtazâ Ahter-i burc-ı siyâdet gevher-i kân-ı şeref (9b)
- 10 Vasf-ı zâtı zîver-i fihrist-i divân-ı celâl Nâm-ı pâki nâme-i ikbâle 'unvân-ı şeref
- 11 Safha-i mihr ü meh-i evrâk-ı çarha sıgmaya Yazsa vasfın tîr-i defter-dâr-ı sultân-ı şeref
- 12 Gaflet uykusunda fitne h*â*b-ı râhatda cihân Ebr-i 'adli 'âleme yagdurdı barân-ı şeref
- 13 Benzemişdi dâr-ı Bû Derdâya Beytü'l-mâl ezel Salmadın tarh-ı nizâmı dehre sultan-ı şeref
- 14 Hışt-ı sîm ü zerle ma'mur oldı 'adn-âsâ bugün Olalı mi'mâr ana üstâd-ı bünyân-ı şeref
- 15 Hânedân-ı Mustafâ vü dûdmân-ı Murtazâ Oldı senden rûşen ey şem'-i fürûzân-ı şeref
- 16 Adlinün mi'mârı ma'mûr u müşerref eylesün Müşrif olmışdur harâb olmaga bünyân-ı şeref
- 17 N'ola devründe şeref bulsa eger 'izz ü şeref

- Cümle 'âlemdür du 'â-gûy u senâ-hân-ı şeref
- 18 Sebze-veş sâyende hoş geçse n'ola eşrâf eger Gülşen-i 'âlemde ey serv-i hırâmân-ı şeref
- 19 Topun agsun göklere mihr-i cihân-ârâ gibi Dest-i kudretden virildi sana çevgân-ı şeref
- 20 Olmasun yanunda bir kıymetde gevherle hazef Tecrüben olsun mihekk-i fazl u mîzân-ı şeref
- Nüshalar yazmak mücerrebdür şeref buldukda şems Hâlümi yazsam n'ola irmişdür ezmân-ı şeref
- 22 Sebzedür her lafz her bir satr-ı serv-i sebze-pûş Bu kasîde oldı bir ser-sebz-i bustân-ı şeref
- 23 Tîg-i fazl ile müsellemdür bana mülk-i kemâl Hınk-ı tab' ile benümdür şimdi meydân-ı şeref
- 24 Hak bilür bin baş hakkumdur ri'âyet öndüli Ger olursa imtihân erbâb-ı 'irfân-ı seref
- 25 Pâymâlum jâle-veş hâk-ı mezelletdür yirüm Evce çek yine beni ey mihr-i tâbân-ı şeref
- 26 Hâr-ı fakr u fâkadan sad-çâk dâmân-ı vakâr Dest-i dâyinde keş-â-keşde girîbân-ı şeref
- 27 Ekser eşrâf u ekâbir şem'-i cem'-i sebz olur 'Âşıkı iden çerâg ey şem'-i eyvân-ı şeref
- 28 Lüknet-i zıllet zebânum itmeseydi güng ü lâl Devletünde olsam olurdı sühandân-ı şeref (10a)
- 29 Zümre-i âlî ri'âyet kıl binin gör birin al Gerçi bin var her taraf cûyâ-yı ihsân-ı şeref
- 30 Muhkem itsün Hak esâs-ı devletün olsun ana 'Ömr ü devlet câh u rıf'ât çâr-erkân-ı şeref

Mefâ'ilün Fe'ilâtün Mefâ'ilün Fe'ilün

İznikî 'Alî Çelebi Bursa Beyi iken 'îd-i kurbânda virilmişdür.

- 1 Sefîde-dem ki şafak âsumânda oldı 'ayân Döküldi hûn ki sanasın hamel olup kurbân
- Yahûd şafakdan idüp 'ârızına gül-gûne Özine 'îdde zînet virür 'arûs-ı cihân
- 3 Şu 'â-ı şemsden idindi kendüye ihrâm Tavâf-ı Kâ'beye kasd eyledi bu zâl-ı zemân
- 4 'Ale's-sabâh halâyık varup musallâya Tavâf-ı kûy-ı nigâra çekildi ehl-i dilân
- 5 İrişdi 'îd-i ganîmet bilün bu fırsatı kim Kişiye degmede virmez zemâne emn ü emân
- 6 'Ale-l-husûs ki devr-i emîr-i dânâdur Safâ vü 'işrete âgâz eylesün rindân
- 7 Emîr-i mülk-i ma'ârif şeh-i diyâr-ı hüner Müsemmâ Haydar-ı saf-der 'Alîyy-i 'âlî-şân
- 8 'Alî-sehâ vü 'Alî-nâm u Murtazâ-ahlâk Hasen-hisâl u hasen-hulk u sâhibül-ihsân
- 9 Görüp 'avâtıfunı müstefîd oldı bahâr Tonatdı 'âlemi hil'atler eyledi ihsan
- 10 Kapuna kâse-i mâh ile geldi 'îd-i sa'îd Meger vazîfe taleb oldı yâ nevâle-sitân
- 11 Şu'â'-ı mihr ana zencîr ü micmere hûrşîd Sipihr meclis-i 'îdünde micmere-gerdân
- 12 Zihî ki mün'akis âyîne-i dürr âyetüne

- Nukûş-ı sûret-i peydâ vü çehre-i pinhân
- 13 Hizebr-i bîşe-i heycâ peleng-i kûy-ı neberd Gazâda bebr ü gazanfer vegâda şîr-i jiyân
- 14 Sürüldi gûy-ı zulüm 'arsa-gâh-ı 'âlemden Olalı dest-i şerîfünde 'adlden çevgân (10b)
- 15 Kapunda benden idi mihr altûn üsküfli Big oldı başına şimdi urundı tâc-ı Keyân
- 16 Takındı kavs-ı kuzahdan ayagına halhâl Olalı bezmüne rakkâs gerdiş-i gerdân
- 17 Şecâ'at evcine hûrşîdsin n'ola olsa Elünde şa'şa'a mânend-i tîg-i hûn-efşân
- 18 Kimesne Rüstem-i Destân u Zâl adın anmaz Şecâ'atun haberi oldı 'âleme destân
- 19 Zihî salâbet ü savlet şecâ'at u şevket Göreydi kahrunı isterdi Kahramân amân
- 20 Yürürdi atun önünce piyâde Sâm süvâr Olurdi zîr-i rikâbunda Erdevân devân
- 21 Yanunca oldı silahdâr cenge âhengle Eline tîg-i zeberced-niyâm alup Keyvân
- 22 Eger ki kulle-i Kâf ola kelle-i a'dâ İderdi hurd anı darb-ı dest-i gürz-i girân
- 23 İtâ'at itdi bilüp rüstehîz ü peygârun Bahâr u sûsen u servi idindi seyf sinân
- 24 Götüre gonce-i zanbak gibi 'adû barmak Elünde kalsa temâşâ sinân-ı sûsen-i şân
- 25 Elünde hançer-i bürrânuna nazar salsa Vehimden ola 'adû berg-i bîd-veş lerzân

- 26 Sicill-i Hâtemî Tayy itdi dest-i ihsânun Berât-ı 'âtıfete nâmun olalı 'unvân
- 27 Şu kes ki hizmetüni farz-ı 'ayn idinmiş ola Pür ola desti zer ile çü keffe-i mîzân
- 28 Firâz-ı küngür-i medhine irmeye hergîz Hezâr sâl ki murg-i hayâl ide tâyerân
- 29 Kimesne 'arsa-i medhine bulmaya gâyet Eger ki tayy oluna râh-ı 'âlem-i imkân
- 30 Didüm ki nâtıka medhinde 'âciz ü kâsır İşitdi hâtif-i gaybî didi ki sad-çendân
- 31 Bugün tekâver-i tab'um fezâ-yı medhünde 'Aceb mi sürsem eger yügrügün durur meydân
- 32 Zahîr olursa bana himmetün kemâle irem Olam beraber Hâkân u hem-ser-i Selmân
- Zihî sa'âdet ü devlet ki 'Âşık-ı şeydâKapunda kim kulun olup ola emîr-i cihân (11a)
- Niçe ki rûz u şeb ola vü döne çarh-ı felek Niçe ki 'îd-i sa'îd ire vü bahâr u hazân
- 35 Gününi 'id ide 'îdün mübârek ide Hudâ Şebüni Kadr ide kadrün ziyâd ide Yezdân
- 36 Murâdun üzre döne çarh ola hevâdârun Kapunda gerdiş-i devr ola bende-i fermân
- 37 Tavâf-ı Ka'be-i maksûda olasın vâsıl 'Adû zebûnun ola her zemânda çün kurbân
- 38 İrişmeye ana âsîb-i tünd-bâd-ı hazân Bahâr-ı gülşen-i âmâlün ola câvidân

Fâ'ilâtün Fâ'ilâtün Fâ'ilün

- İtmeseydi ism-i sultânı eger der-ber-nişân Sadr-ı yarlıg-ı belîgi eylemezdi yer nişân
- Olmasaydı hükm-i şâhî bir şeh-i kişver-küşây Başına tâc olmaz idi zer-nigâr efser-nişân
- 3 Tâbi' ü fermân-berîdür halk-ı 'âlem hikmetün Yiridür mühr-i Süleymâna disem benzer nişân
- 4 Heft kişver şâh-râh-ı taht-gâh-ı hükmine Yidi tûde hâke benzer ki kona yer yer nişân
- 5 Üç 'alemdür üç elif olsun muzaffer dâ'imâ Der-pençe satrdan saf saf 'asker nişân
- 6 Almaga bir kişveri bir halka-i tevkî' bes Nev-'arûsa nitekim hâtem olur ekser nişân
- 7 Hükm-i şâhi bir zemîni ak kemhâdur dü-reng Vâkı' olmışdur kenârunda anun Ülker nişân
- 8 Dâire çekmiş ki ins ü cinni teshîr eyleye Eyleyüp dilde Süleymân nâmını ezber nişân
- 9 Genc-i emr-i şâhiyi hıfza tılısm-ı hükm ile Ejder-i bî-cândur itmiş kuyrugın çenber nişân
- 10 Yâ meger tâk-ı felekdür devre-i tevkî'-ı şâh Rîkler üstinde olmış câ-be-câ ahter nişân
- 11 Yâ meger bir nev-civân-ı nagz-ı hatdur hâl dâr Zer varakla eylemiş ebrûsına zîver nişân
- 12 Pîç pîç ü çîn çîn ü halka halka ham-be-ham Pür-kirişme 'işve-ger bir kâküle benzer nişân
- 13 Kadr ile bir şem'-i kâfûr berâtıdur hüküm

- Şu'le-i 'âlem-fürûzıdur yanar par par nişân
- 14 Peykdür yâ emr-i şâhî 'âleme iblâg içünVar tugrâdan miyân-bendinde hançer zer-nişân
- 15 Kendüyi çeker çevirür hükm-i şâha cest olur İki üç yirden miyânına kemer baglar nişân
- 16 Bir kalenderdür elif tâc ile seyr eyler berât San kemer-bendinde tugrâ bir kedû-yı zer-nişân
- 17 Turfetü'l-'ayn içre olur küngür-i 'arş-âşiyân Çün kanat büküp idüp pervâz aça şehper nişân
- 18 Kalb-i sahtın mûm ider gâhî niçe sengîn dilün Gâh olur kim sikkesini mermere kazar nişân
- 19 Gâh olur nâr-ı celâle vâdî-i Eymen olurGâh olur nûr-ı cemâle manzar u mazhar nişân
- 20 Gâh dûdı cânda işler cân bagışlar ki dahı Gâh sûr u gâh mâtemde olur micmer nişân
- 21 Geh kaşıkla aş virüp sapıyla geh göz çıkarur Feyz-i nef'ü zarr ider hem bahş-ı hayr u şer nişân
- 22 Gâh olur kim bir bege ma'zûl börkin giydirür Gâh olur bir bendenün başına tâc-ı zer nişân
- 23 'Âleme kef-i kifâyet şânın açup gösterür Kabza-i hükmümdedür 'âlem dimek ister nişân
- 24 Hûb-ı mâder-zâde çekmez minnet-i meşşâtayı Lâciverd ü hall ile ârâyişi n'eyler nişân
- 25 Ârzû-yı dest-bûsunla gezüp elden ele Der-be-der oldı cihân içre niçe yıllar nişân
- 26 Mîr-i mîrân Hüsrev-i devrân güzîn-i serv-revân Hâk-i pâyünden gözine tutiyâ ister nişân

- 27 Matla'-ı mihr-i ma'ârif menba'-ı nehr-i kemâl Dest-bûsunla senün 'unvân kesb eyler nişân
- 28 Turre-i tevkî' ile Hazret-i Fârûk-veş Zülfekâr hâmesi ile Haydar-ı saf-der-nişân
- 29 Sâye-i destinden ayru kara-pûş olup midâd Hâmenün kanı kurur düşer be-gâyet ter nişân
- 30 Hidmet idüp tîr-i bahtuna kazâ ile kader Cem külâhın Erdevan tâcın diküp eyler nişân (12a)
- 31 Nâm-ı pâkün itmiş idi hüsrevâ hırz-ı lisân Böyle itmezdi musahhar dehri ser-tâ-ser nişân
- 32 Benzemez her mîr-i mîrân sana kadr u câhda Nitekim tevkî'-i sultânî olimaz her nişân
- 33 Göz göz itmiş sînesini zahm-ı tîr-i intizâr Bunca gözle kapuna yüz sürmege gözler nişân
- 34 Ol gubârı hükm-i kadrine ide rîk-i nişân Bulsa tugrâyı itün izin kapuna ger nişân
- 35 Seyf-i kâtı'dur ki emrün varsa hükmi kat' ider Yazılı üstünde bir şemse zer-ender-zer nişân
- Hükm-i 'adlün şöyle münkâd itdi halkı şer'e kim Kâdılar ihzâr-ı hasma virmez oldular nişân
- 37 Kâr-fermâ-yı cihân fermân-revâ-yı dehr iken Zîr-i destünde senün mahkûm u fermân-ber nişân
- 38 Bir avuç toprak dahı virsen öper başına kor Keçgül alup destine cûdundan eyler cer nişân
- 39 Zülfine salup girih çîn eylemiş ebrûların Tâli'üm gibi bana kîn eylemiş benzer nişân

- 40 İki çâk idüp yakasını koyar başına hâk Dâde gelmiş işigüne 'Âşıka benzer nişân
- 41 Cism-i rîk-âlûdı pür-dâg ü elif gören sanur Meşk içün yazmış debîr-i 'ışk ser-tâ-ser nişân
- 42 Sahn-ı dilde nâvek-i bîdâdı bilinsün diyü Hûn-ı dille üstine nâmın yazar dil-ber nişân
- 43 'Âşıka çünki nişân u da'vaya ma'nâ gerek Bu kasîde 'Âşıkun da'vâsına yeter nişân
- 44 'Aşıkı bir ad içün kul idinüp iden çerag Ad içün komış cihânda çünki her server nişân
- 45 Kutlu güni togışından bellü dirler serverâ Şi'rimün a'lâlugına matla'um yeter nişân
- 46 Gayrı 'irfânuma eş'âr ile istidlâl kıl Her metâ'un eylügine çün olur Ülker nişân
- 47 Sîne-i vîranda genc-i ihtisâsun defn idüp Dâg-ı ihlâsunla ana eyledüm yer yer nişân
- 48 Behre-mend iken karâbetden kapun olmaz nasîb Hırsı hırmâne olur dimişler ulular nîşân
- 49 Kâyinâtı ser-te-ser nâm u nişânun ide pür Geh el üzre gâh başda eyledükce yer nişân (12b)

11 Fâ'ilâtün Fâ'ilâtün Fâ'ilün

Vele-hu

- Bu gice kim dil olup gam-dîde cân endûh-gîn Göz iderdi girye cân nâle gönül âh u enîn
- 2 Dehr sarrâfi niçe dürr zeyn idüp sandukına Gizledi koynunda bir berrak la'l-i âteşîn

- 3 Devşirüp pervâz-ı sîmîn-i livâ-yı zer-'alem Zâhir oldı mehce-i meh râyet-i sultânleyin
- 4 Keştî-i devrân düşüp girdâb-ı bahr-ı zulmete Bî-karâr olup dönerdi nitekim fülk-i zemîn
- 5 Hâlümi bilüp 'abûsü'l-vech olmışdı recül K'oldı 'aksinden siyeh mir'ât-ı çarh-ı heftümîn
- 6 Kara boya gök çivîd idüp metâ'ın müşteri Reng-zer dükkânına dönmişdi târ olup zemîn
- 7 Tîg-i Behrâm ile feth olup sevâd-ı mülk-i Şâm Feth-i mülk-i zengibâr itdi şeh-i magrib-zemîn
- 8 Çeşme-i hayvân gibi zulmetde kalmışdı güneş İrmemişdi ana Hızr-ı subh-ı İskender-leyin
- 9 Zühre saçın çözdi çeng-i nâleme dem-sâz olup Raks ider idüp terâne yirine âh u enîn
- 10 Ben kara yazulunun hâlin 'Utârid yazmada Dökdi hayretden devât oldı siyeh çarh-ı berîn
- 11 Şeş-der-i gerdûnda âhum mâhı itmişdi kamer Bulmayup bahtum gibi ol da küşâd oldı hazîn
- 12 Yûnus-ı hurşîdi benzer yutdı mihr-i âsumân Çâhda Yûsuf gibi oldı yahûd mesned-nişîn
- 13 Kişt-zâr-ı mihnetüm kiştinde olmakdan zebûn Düşdi sevrün 'anberi âfâk oldı 'anberîn
- 14 Mâtemüm şâm-ı mezelletde irüp gök ehline Sünbülin idüp perîşân Sünbüle çözdi saçın
- 15 Da'vet idüp kevkeb-i bahtum musahhar itmege Keffe-i Mîzân bahûre vezn iderdi müşk-i çîn

- 16 Gördi ki eşküm tolup fülk-i cihânı gark ider Çekdi anı delv ile mellâh-ı gerdûn-ı berîn
- 17 Kavse nüh çenberde hallâc idügün bildürmege Âh-ı âteş-nâk urdı sînesine tîr-i kîn
- Niçe yıl ger Zühre dem-sâz u tarab-engîz ola Görmeye şâdî yüzin bir dem dil-i endûh-gîn
- 19 Ger 'Utârid safha-ı mâha şu'â'-ı mihr ile Yazsa ta'vîz-i cünûn olmaz 'ilâca dil karîn
- 20 Zemzem acırdı göreydi yaşımun şûr-âbesin Nâlemi gûş eylese hannâne eylerdi hanîn
- 21 Geh sitâremden iderken isti'ânet âh idüp Geh iderken istigâse çarhdan idüp enîn
- 22 Gün gibi berk urdı dilden nûr-ı hûrşîd-i yakîn Tevbe idüp didüm *innî lâ 'uhibbü'l-âfilîn*¹⁵
- 23 Ka'r-ı deryâda semek cevv-i semâda mihr ü mâh Gördüm olmış bende-i fermân-ber-i cân-âferîn
- 24 Her biri gûyâ-yı şükr ü her biri tesbîh-hân Pür-sudâ' mülk-i melek pür-gulgule kerrûbiyîn
- 25 İrdi hâtifden nidâ-yı hevl-nâk-ı cân-güdâz K'ey zebûn-ı hâb-ı gaflet mübtelâ-yı ân u în
- Fe'nzurû¹⁶ emrini te'kîd itmek içündür sahîh 26 İki olduği vücûdunda bu çeşm-i hurde-bîn
- 27 Gûş-1 gülde penbedür jâle gider ey bâg-bân Tâ seher irişe çarha subha-i müstagfirîn
- 28 Toldı ol dem gün gönülden tâli' oldı mihr-i şevk Burc-ı cânda togdı bu matla' güneş gibi hemîn

¹⁵ Ben batan şeyleri sevmem. En'am 76. ¹⁶ Bakınız, Allah'ın kainattaki mucizelerine bakınız. Al-i İmran 137, Nahl 36,

Neml 69, Ankebut 20, Rûm 42.

- 29 Ey mekân-ı kevne zâtıyle şeref viren mekîn V'ey tufeyl-i fitrat-ı pâkün vücûd-ı 'âlemîn
- 30 Bihterîn-i evvelîn ü mihterîn-i âhirîn Pîş-vâ-yı enbiyâ vü muktedâ-yı mürselîn
- 31 Menşe'-i halk-ı şu'ûn u bâ'is-i tekvîn-i kevn Asl-ı îcâd-ı zevât-ı kâyinât u kâyinîn
- Nokta-i per-gâr-ı fıtrat merkez-i devr-i vücûd Zübde-i kevn-i halâyık asl-ı halk u mâ vü tîn
- 33 Mirvaha-cünbân ser-i vaktün per-i kerrûbiyân Perde-i halvet-serâyun târ-ı mûy-ı hûr-ı 'în
- 34 Şâhidü'l-hâl kıbâlih ki âyet-i *lâ-reybefîh*¹⁷ Sûret-i tevkî'-i menşûrun *hüden li'l-müttekîn*¹⁸
- 35 Kurbetün râhına *sübhâne'llezi esrâ*¹⁹ delîl Âyet-i 'azz u 'alân âyât-ı Kur'ân-ı mübîn
- 36 *Küntü kenzen*²⁰ genc-i mahfîdür ana sensin tılısm Sırr-ı $Levl\hat{a}k^{21}$ -ı vücûd-ı pâkün olmışdur emîn
- 37 Şemme-i zülf-i siyâhun zerre-i şems-i ruhun Hâyret-efzâ-yı dil-i her mû-şigâf u hurde-bîn
- 38 Efser-i zerdür nübüvvet dürretü't-tâc ana sen Hâtem olmışdur risâlet sen ana dürr-i semîn
- 39 Vahş-i tayra hâkim olduysa Süleymân-ı nebî Emrinün mahkûmıdur rûhiyân-ı kerrûbîyîn
- 40 Peyk-i Cibrîl oldı sana ger Süleymân Hüdhüd'e

¹⁹ Peygamberi gece Mescid-i Haram'dan Mescid-i Aksam'a götürdü. İsra 1.

¹⁷ Bu içinde şüphe olmyan bir kitaptır. Bakara 282.

¹⁸ Sakınanlar için hidayet kaynağıdır. Bakara 282.

²⁰ Gizli bir hazine idim, bilinmek istedim. İsmail b. Muhammed el-Aclûnî el-Cerrahî, Keşfû'l-Hafa ve Muziylu'l-İlbas, Halep, Tarihsiz, c.2, s.191.

²¹ Olmasaydın kâinatı yaratmazdım. Mevlana Aliyyu'l-kârî, Mevzuatü'l-Kübra, İstanbul, Matbaatü'l-Âmire, s.68.

N'ola dirse *fe'tinâ minhâ bi-sultânın mübîn*²²

- 41 Mûm-veş mühr-i Süleymâna n'ola râm ise halk Hâtem-i hatmîyyet olmışdur sana engüşterîn
- Ger Süleymân Rabbi hebli²³ mülkine sultân ise 42 *Lî-ma'allah*²⁴ ün makâmına sen oldun câ-nişîn
- 43 N'ola olduysa Halîlu'llâha âteş gülsitân Sen şefâ'atle idersin dûzahı huld-ı berîn
- Bu nice câh u 'uluvv olur bu ya nice huzû' Gökdeki 'arş-âşiyân yirdeki Bathâ-nişîn
- 45 Zîr-i na'lün oldığıyle fahr idüp 'arş-ı 'azîm Oldı mi'râcunda kem-pâye sipihr-i heftümîn
- 46 Bir zemânda olmadı sana olan tayy-ı mekân Ol zemân ki lâ-mekân eyvânına oldun mekîn
- 47 Eyledün bî-dârluk hîninde bir anda sefer Ol makâm-ı ünse ki yog idi anda ân u hîn
- 48 Olmadı pervâne Rûh-ı Kudsî bezm-i ünsüne Âferîn ey mahrem-i hâs-ı ilâhî âferîn
- Kellimînî yâ Humeyrâ²⁵ âgâh olup sâkî-i vakt 49 Mest olurdı cür'a-i câmunla ehl-i bezm-i dîn
- Geh *Erihnî yâ Bilâ*²⁶ olup nesîm-i bâg-ı ins Cân meşâmın bûy-ı ünsullâh iderdi 'anberîn
- 51 Eskidüpdür niçe yüz bin mûze-i mâh-ı nevi Yüz sürince işigün tozına eyyâm u sinîn
- 52 Nûr-ı şer'ün eyler irşâd-ı sırât-ı müstakîm

²² Dediğini ispat edeceksin, açık delil getireceksin. İbrahim 10, Neml 21.

 ²³ (Sultan Süleyman): Bana öyle bir mülk ver ki, kimseye verme!
 ²⁴ Benim Allah'la bir olduğum bir makam/an vardır ki.

²⁵ Ey Humeyra, benimle konuş!

²⁶ Ey Bilâl beni rahatlat! Tirmizî, Salat 126.

- Yoksa kalurdı şeb-i küfr içre 'âlem dâllîn
- 53 Hâr-keşdür bâr-gâh-ı hark-ı 'Âden'de şütür Mu'cizâtun hırmeninden âhû-yı Çîn hûşe-çîn
- 54 Mu'cizenle çûb nâlân u hasa tesbîh -hân Kasvet ile kalb-i düşmen seng mi yâ âhenîn
- 55 Olmasa şehd-i şehâdetle sana 'azbü'l-lisân Olmak olur muydı hîç nahlün lu'âbı engübîn
- 56 *Lâ-yenâmu kalbü*²⁷ sana devlet-i bî-dârdur Çok nazar anlar niyâm-ı 'aynıdan 'ayn-el-yakîn
- 57 Zâglanmış tîg-i gamzen sürme-i *mâ-zâg*²⁸ ile Lâ-yenâm-ı kalbi ol tîge niyâm-ı 'anberîn
- 58 Ceyş-i düşmenden ne gam hıfz içün a'dâdan seni Çünki cünd-i lem-ferûhâ baglamışlardur kemîn
- 59 Hışm u kîn ebrû-yı müşkînüne salmadı girîh Kimseye göstermedi sende gazab çîn-i cebîn
- 60 Derd-i küfre tîg-i şer'ün şerbet-i kattâldur Dâ'-ı zenbe şerbet-i lutfun şifâ çün engübîn
- 61 Basdı bagrına vücûdun gevherin hatem gibi Âsumân üzre tefevvuk itse yiridür zemîn
- 62 Gerd-i gird-i kûyun alnında hüveydâdur henüz Tavf idüp kûyun sürer her şeb kapuna meh cebîn
- 63 Döndi reşkinden didi *yâ leytenî küntü türâb*²⁹ Sîneye çekdi zemîn çünki seni çarh-ı berîn
- 64 Âlünün ashâbunun evlâdunun ezvâcunun Ruhuna bin bin tahiyyât u selâm u âferîn

²⁷ Gözüm uyur, kalbim uyumaz. Muhammed b. İsmail el-Buharî, Camiu's-Sahih, İstanbul, Tarihsiz, c.2, s.48; Teheccüd, bab 16.

²⁸ Gözü hedeften şaşmadı. Necim 17.

²⁹ Keşke toprak olsaydım! Nebe 40.

- El-bidâr u el-bidâr³⁰ ey sırr-ı pâk-ı Ahmedi *El-gıyâs u el-gıyâs*³¹ ey rûh-ı mu'ciz-âferîn
- 66 Âh eger mahşerde bizden olasın dâmen -keşân V'ey eger reddün eli salarsa bize âsitîn
- 67 Gerçi 'aybum bes buved 'aczem ez ân sad-bâr bîş 'Acz-i halimrâ niger 'ayb u kusûr merâm-bîn
- Ben kimüm 'arz-ı niyâz idem yeter devlet bana Cümle-i 'âlemdenüm yâ Rahmeten-li'l-'âlemîn
- 69 Yâ Resûla'l-lâh vasiyyet itdün âlün ümmete Didi anlardur size Kur'ân ile habl-ı metîn
- 70 Kendüm içün dimezem ben lîk çogı âlünün Kâ'inât-ı cûda bulmaz yimege nân-ı cevîn
- 71 N'ola bî-dâd irse bana ehl-i 'ilm ü şer'den Kendi perrinden irer kartala tîr-i sehm-gîn
- 72 Bir çerâgın ehl-i beytinün söyindürmek diler Bâd-ı zulmine penâh eyle şefâ'at dâmenin
- 73 Vir Resûlün hürmetine bana bu gamdan felâh Hizb-i âle çün didün Kur'ân'da hizbü'l-müflihîn
- Mekre âgâz eylediyse bana düşmen gadr idüp Hakka saldum ben anı vallâhu hayrü'l-mâkerîn (14b)
- 75 'Âşıka rahm it garîbündür yetimündür senün Yâ Resûla'l-lâh kapuna geldi pür âh u enîn
- Cevr-i gerdûndan ne pervâ mekr-i a'dâdan ne bâk 76 Himmet-i sultân-ı dehre hâlüm olursa karîn
- Âsumân-ı dîn ü dünyâ kâm-rân-ı 'adl u dâd

³⁰ Bize yardıma gel!³¹ Meded, meded!

Tev'emân-ı feth ü nusret kahramân-ı mâ vü tîn

- 78 Ey penâh-ı 'adl u dâd u merkez-i dünyâ vü dîn Âsitânun kehf-i mazlûmîn emânü'l-hâifîn
- 79 Vasf-ı elkâb-ı cemîlündür emirü'l-mü'minîn Na't-ı ahlâk-ı cezîlündür imâmü'l-müslimîn
- 80 Nev-bahâr-ı 'adl u dâdun nazreten li'n-nâzirîn Çeşmesâr-ı lutf u cûdun lezzeten li'ş-şâribîn
- 81 Zıll-ı Hakk makbûl-i Hakk mümtâz-ı halk oldıguna Bes degül midür bu hüsn-i hulk bürhân-ı mübîn
- 82 Gûş-ı çarha halka-i hükmün nişân-ı bendegî Dâg-ı ihlâsun ruh-ı âfâka hâl-i 'anberîn
- 83 Bulmaya harfine barmak komaga bir nokta 'ayb Nâme-i a'mâlüni yazan kirâm-ı kâtibîn
- 84 Cennet idüp dehri halkun halka 'adlün çagırur Hezihî cennâtü 'adnin fe'dhulûha hâlidîn³²
- 85 Sâye-güster üstüne perr-i hümâ-yı lutf-ı Hak Taht der- taht-ı tasarruf mülkdür zîr-i nigîn
- 86 Âsumân bustân-serâyun kehkeşândur cûy-ı âb Verd-i nesrîn mihr ü mehdür anda encüm yâsemîn
- 87 Bûy-ı hulkun şemmesine hem-dem olsun bir nefes Zemherîrün çillesinde çekmesün gül erba'în
- 88 Âyet-i *İnnâ fetahnâ*³³ da elifler gibidür Devletünde ser-firâz olmış durur a'lâm-ı dîn
- 89 Dâne-i hardalca gelmez kelle-i a'dâ ana 'Askeründür tîg-i minkâr ile murg-i dâne-çîn
- 90 Nev-'arûs-ı saltanat tîg-i gazâ fermân-berün

³² Bunlar Adn cennetleridir. Ebedî kalmak üzere buraya girin. Tâha 76.

³³ Sana açık bir fetih nasip ettik. Feth 1.

- Birisi mülk-i nikâh birisi mülk-i yemîn³⁴
- 91 Nüh sipihr ü çâr erkânı idinse nerd-bân Çıkmaga evsâfun eyvânına 'akl-ı hurde-bîn
- 92 Irmeye kim pâyesine kasr-ı kadr-i medhünün Tis'a tis'in erba'a olursa farzâ erba'în (15a)
- 93 Kanda ben kanda niyâz-ı hazret-i şâh-ı cihân Lîk ka'r-ı çehden olınur rasad çarh-ı berîn
- 94 Dilde sıdkun şöyle nakş itdüm ki didi her gören Alışınca şöyle alışsa zemân ile zemîn
- 95 Saklarum cân gibi mihrün virmezem dünyâya ben İşigün hakkı inan ki *el-emînü bi 'l-yemîn³⁵*
- 96 Telh-kâm itdi beni 'azl ile zehr-i kahr-ı dehr Olsun ol milh-i ücâce şefkatün mâ-i ma'în
- 97 İrdi kış kılıc gibi mîh elde tîg-i âb-gûn Döymeye âhen de olsa kalb hemçün âb-gîn
- 98 Hâliyâ irdi muharrem vakt-i mâtem devr-i gam Tâzelendi köhne derdi âl-i hayrü'l-mürselîn
- 99 Hep muharremde ola gelmişdür ihsânun bana N'ola mansıbla sevindürsen yine ey şâh-ı dîn
- 100 Herkesün bir mesnedi vü bir şefâ'at-h*â*hı var Bendenün bâb-ı Muhammedle Hadîs'-i Erba'în
- 101 Eylerüm lutfundan istiftâ senün iftâ buyur Sen dururken bî-kes-i evlâda kim olsun mu'în
- 102 Kime itsün iltica âl-i Nebi sen var iken Dînine rükn-i rekîn ü şer'ine hısn-ı hasîn

³⁵ Yemin edilene güvenilir.

³⁴ Vezin bozuktur.

- 103 Her şegâle Şîr-i Hak evlâdın itdirme zebûn Ey 'ata-yı Hak şikâristânına şîr-i garîn
- 104 Çün ezel dâr-ı na'im-i lutfun itdün bana câ Andan ihrâc itme olur cennet ehli hâlidîn
- 105 Her ne ihsân ki ider âl-i resûle pâdişâh Müntehâ-yı sidreden tahsîn okur Rûhü'l-emîn
- 106 Pâye-i devlet virür el herkese ammâ bana Öpmege virmez elin sunar bir elsüz âsîtîn
- 107 Gerçi dirler söylenür devlet kazâ yanındadur Kadı olaldan sürûra irmedi kalb-i hazîn
- 108 Râst oldugum bile çep bakup iden gûş-mâl Biline şol dem ki ashâb-ı şimâl ile yemîn
- 109 Umarum olam harîm-i istikâmet mahremi İrişüp Hakdan nidâ mümtâz olıcak mücrimîn
- 110 'Âmile virilmesün devründe 'âlim mansıbı Bulsun eyyâmunda rıf'at 'âlimîn ü 'âmilîn
- 111 Himmetün feryâd-res olup olursa dest-gîr Evc-i gerdûnda olam mihr-i münîre hem-nişîn
- 112 Saltanat sür dünyeler turdukca tur ol kâmurân Kâm-bahş ol âle âl olsun kapunda kâm-bîn
- 113 Müstefîz ol rûh-ı Ahmedden müfîz ol âline *Bi'n-nebiyyi ve evlâdihi et-tayyibîn et-tâhirîn*³⁶

12 Fâ'ilâtün Fâ'ilâtün Fâ'ilün Hace Çelebi Efendi'ye virilmişdür.

1 Cevr-i gerdûndan ne pervâ zann-ı düşmenden ne bâk Himmet-i monlâ-yı dehre hâlüm olursa karîn

³⁶ Peygambere ve temiz evlatlarına.

- 2 Sadr-ı 'ilm ü şeyh-i İslâm u imâmü'l-müslümîn Hâce-i dîn dâver-i dünyâ vü müfti'l-mü'minîn
- 3 Şems-i ibrâc-ı şeri'ât şem-i divân-ı takî Kutb-ı evtâd-ı mehâbet mihver-i eflâk-ı dîn
- 4 Muhyiü's-sünnet olup Hızr irmesün derdi cihân El-firâk ey ders ü fetvâ elvedâ ey 'ilm ü dîn
- 5 'Asruna şemsü'l-e'imme şeyhü'l-islâm irse ger Hâmene dirdi imâdü'd-dîn sana bürhân-ı dîn
- 6 Oldı bâbundan senün tacü'ş-şerî'a ser-bülend Makdemünle bulalı sadrü'ş-şerî'a zîb ü zeyn
- 7 Bahr-ı 'irfândur vücûdun anda bir dildür dilün Şâh-ı mercândur lisânun her sözün dürr-i semîn
- 8 Ser-nigûn tûbâdür ol esmârıdur fazl u kemâl Kilk-i fetvân ile 'âlem oldı firdevs-i berîn
- 9 Nevk-i kilkün zıfr-ı şehbâz-ı şikâristân-ı kuds Halka-i mîm-i midâdundur kemend-i 'anberîn
- Vecne-i beyzâda gûyâ şâme-i sevdâ durur'Aks-i kilkün kâgıd üzre ey şeh-i mülk-i yakîn
- 11 Nesh-i kavl-i kavme her harfün ki bir ta'lîkdür İbn-i mukle merdumündendür midâd-ı'anberîn
- 12 Ey midâdun vesme-i ebrû-yı nûn-ı nass-ı Hak Rik-i hattun sürme-i çeşm-i cemâl-i hûr-ı 'ayn
- 13 İtdi tefsîrün senün nesh-i tefâsîr-i selef Nitekim Kur'ânla nesh oldı suhuf-ı evvelîn
- 14 Oldı câ tefsîr-i Câru'llâha genc-i i'tizâl Sen tekellüm ideli tefsîrden ey şâh-ı dîn

- 15 Hükm iderdi şâfî'i eylese kâdı-ı hikem Nusret-i dîn-i Hanîf itdügüne 'ilme'l-yakîn (16a)
- 16 Lü'lü'-i manzûm boynı baglu çâker nazmuna Bende-i halka-be-gûşı nesrünün dürr-i semîn
- 17 'İlmüne şöyle 'ayandur hey'et-i eflâk kim Tob-ı zâtü'l-kürsî olmışdur semavât u zemîn
- 18 Bûy-ı hulkun şemmesine bir nefes olsun karîn Zemherîrün çillesinde çekmesün gül erba'în
- 19 Hırz idüp ihlâsunı dergâhun idinen melâz Cevr-i devrândan halâs keyd-i a'dâdan emîn
- İşigün bulup penâh idinen oldı kâm-yâbÂsitânunda gören ihsânun oldı kâm-bîn
- 21 Eylerüm lutfundan istiftâ senün iftâ buyur Sen dururken bî-kes-i eylâda kim olsun mu'în
- 22 Kime itsün ilticâ âl-i Nebî sen var iken Dînine rükn-i rekîn ü şer'ine hısn-ı hasîn
- Halka-i dergâhun ile rişte-i lutfun yeter 'Âşıka hem 'urve-i vuska vü hem hablü'l-metîn
- 24 Nass-ı kâtı' gibi hükm-i sâtı'un fasl eylesün Bana çok telbîs-i da'vâ itdi buht-ı ehl-i kîn
- 25 Hâlümi eyle be-hakk-ı hürmet-i rûh-ı resûl 'Arza-i 'ilm-i vezîr-i a'zâm-ı gerdûn-nişîn
- 26 'Akl-ı evvel Âsaf-ı sânî vü üstâd-ı devum Tîz-fehm ü pâk-'akl u kârdân u hurde-bîn
- 27 Efser-i re'y-ı rasîn nâmındaki iklîl-i râ 'Ukde-i müşkil-küşâ ismindeki dendân-ı sîn
- 28 Zîr-i dest-i tîg-i râyı mülk-i İrân u 'Irâk

- Beste-i çîn-i kemend-i fîkri dârü'l-mülk-i Çîn
- 29 Âyet-i *innâ fetehnâda*³⁷ elifler gibidür Devletünde ser-firâz olmış durur i'lâm-ı dîn
- 30 Görmedi anun gibi çâbük-süvâr darb u harb Eblak-ı bahta uraldan dest-i sun'ullâh zîn
- 31 Tîg-i mihr-i 'adlin itse subh-girdâr âşikâr Zulmet-i şeb gibi nâ-peydâ ide zulmi hemîn
- 32 Tîg-i âteş-tâb u pür-nûrın iderse der-niyâm Subh u şâmı göreler yeksân-ı halk-ı 'âlemîn
- 33 Mansıb-ı 'âlim zemânunda virilmez 'âmile Buldı devründe terakki 'âlimîn ü 'âmilîn
- 34 Çünki her bir şey olur aslına râci' 'âkıbetDil 'Arab mülkine meyl itdi olup âhir güzîn (16b)
- 35 İtdi dil kıble-nümâ-veş gerçi bî-had ıztırâb Oldı semt-i kıbleye sevk-i Hak âhir râh-bîn
- 36 Himmetün feryâd-res olup olursa dest-gîr Evc-i gerdûnda olam mihr-i münîre hem-nişîn
- 37 'Avnün olup her zemân olsun mu'înün müste'ân Ehl-i 'ilm olsun kapundan müstefîz ü müsta'în

13

Mefâ'îlün Mefâ'îlün Mefâ'îlün Mefâ'îlün Pâdişâh-ı 'âlem-penâh hullidet hilâfetuhu hazretlerine virilmişdür

- 1 Sala devletle çün Sultân Süleymân saffın âlâya Melekler 'arş-ı a'lâdan çagırur yagı yagmaya
- Salınur ak sancak serv-i sîm-endâma dönmişdür Çözülmiş tug-ı şâhî benzeyüp zülf-i mutarrâya

³⁷ Sana açık bir fetih nasip ettik. Feth 1.

- 3 Kime salarsa sâye bir diyâra şehriyâr eyler O sancakdur eger var ise dünyâda hümâ-sâye
- 4 Nişân-ı mîh-ı na'lün lâle-zârı geh ide menzil Yiridür gökde ta'n itse şafak birle süreyyâya
- 5 Gubâr-ı 'askerün mihriyle cenge çarhaya çıkmış Kemendün çînîdür hâle atılmış gökdeki aya
- 6 Melekler mihr ü mâhun revzenine geldi cem' oldı Gürûh-ı pür-şükûh-ı ceyş-i mansûrun temâşâya
- 7 Çü şâh-ı bahr u berri tutdı çadır çiçegi yiri Habâb-âsâ açıldı bâd-banlar rûy-ı deryâya
- 8 Gazâ yolında her toz ki kopar atun ayagından Melekler gözlerine kuhl idinür hûr-ı pîrâya
- 9 Sana ol 'asker-i Mansûrı verdi Hakk Te'âlâ kim Müyesser olmamışdur ne Ferîdûna ne Dârâya
- 10 Atarlar mihr-i mehden kumbara burc-ı semevâta Kurarlar kehkeşândan nerdibân evreng-i bî-pâya
- 11 Karavul feth (...)³⁸ fevz ü nusret oldı tundârun Yüri fırsat senündür kıl tevekkül Hakk Te'âlâya
- 12 Hisâr üzre dikilmiş pâdişâhun sancagı sandum Seher gökde nazar kıldukda mihr-i 'âlem-ârâya
- 13 Dikilsün sancak-ı İslâm sîb-i Müslümî yensün Salup eyvânı ehl-i nâza 'azm ide Kızıl Elmaya
- 14 Gırîv-i tob-ı kahrun çanına ot tıkdı Rîm-pâpun Kakar nâkûs anun çün tahta erbâb-ı çelîpâya (17a)
- 15 Der-i deyr üzre subh u şâm çanlar çalınur sanman Bilüp yıkılacagın mâtem eylerler kilisâya

³⁸ Kelime okunamamıştır.

- 16 Kaşun çîn eyleyüp bir göz ucıyla egri bakmışdur Yıkılsun kal'a-i Egri el urma hiç ok u yâya
- 17 Siketvârun segidür varsa serdârını segbânun Küleh-dârunla havfun ile derdin kime aglaya
- 18 Sakızun kâfirün çekmişler agzından dil almışlar Ne Kıbrıs u ne Malta döyerimiş bu tonanmaya
- 19 Gerek himmet ki Câbülkâ vü Câbülsâ ola râmun Ne minnet kal'a-i Peç fethine teshîr-i Maltaya
- 20 Gele Hüdhüdlük ide 'askerinde sen Süleymânun Kebuterler eger nâme uçursan Kâfa 'Ankâya
- 21 Süleymân-ı zemânsın yanuna haşr-ı cünûd oldı O cündün ben de pâyânında bir mûr-ı fürû-mâye
- Başumda sebz destâr u dilümde şekkerîn güftâr Cünûdun içre döndüm ben de bir tûtî-i gûyâya
- Du'â nâmıyle geldi yüz süre dergâhuna 'Âşık Süleymân 'askerinde sözle girsin mûr araya
- 24 Şehâdet birle dünyâsın degişmek kasdına geldi Dem-i nakd-ı hayât ile seridür elde sermâye
- Dirigâ bana itdi zulm bir zâlim had atâşınBu zulme şâhidümdür Hak ki Hakdur cümle eşyâya
- 26 İki 'âlemde mücrim olanı gözsüz kopar yâ Rab Beni mücrim diyü 'arz eylemiş dergâh-ı a'lâya
- 27 Nebî âlini teşbîh eylemişdür keştî-i Nûha 'Alî Pürtek kapudanına n'ola nehr-i Tunaya
- 28 Sulı segün suda yatar meseldür mâ-tekaddümden 'Alî Pürtek Tunada yüz yumaz sal anı deryâya
- 29 Tebevvül eylemiş sâbıkda biri zemzeme dirler

- 'Ali Pürtek bu yüzden virdi sûret-i (...)³⁹
- 30 Bahâneyle yüzün gördüm atun izine yüz sürdüm Sipâs-ı bâ-sitâyiş şükr ü minnet Hak Te'âlâya
- Bihamdillah sözi kizb oldugı isnâd u bühtânı Bilindi ser-be-ser erkâna vü pâşâya âgâya
- 32 Müfettişlikde sa'y u vâfir irsâliye gönderdüm Yolumı urdı ol yolsuz göreyüm hışma ugraya
- 33 Ölümden öndin öldüm ki ben oldum kahruna mazhar Bu denli kâdı lutfundan terakkıyle bulup vâye (17b)
- Ne haddümdür diyem ben hizmet itdüm cânuma minnet Sana hizmet 'ibâdetdür yarar dünyâya 'ukbâya
- Velîkin gayret-i akrân bir müşkil marazdur ki Cihânda benzemez hîç bir maraz bu derde bu dâye
- 36 Beni nâmerde muhtâc etmedün bir demde sultânum Yine de 'âşık'undur 'Âşık-ı zâr u fürû-mâye
- 37 Yolum yüz otuz ise sen yüz elli ile ihsân kıl Şehâne lutfa çün olmaz bahâne himmete pâye
- 38 Gazâdur bu da başka andan el virür müselmâna Kara kâfir niçe bir hâkim ola Kıratovaya
- 39 Havâle itme kâdı-'askere ahvalümi lutf it Beni süründürür ol haşre dek salmakla ferdâyâ
- 40 Ugurun açık u 'azmün mübârek ola sultânum Hudâ feth ü zaferler sevk ide bî-hadd u bî-gâye

14 Mefâ'ilün Fe'ilâtün Mefâ'ilün Fe'ilün Vele-hu

³⁹ Kelime okunamamıştır.

- 1 Sepîde-dem ki küşâd olmış idi bâb-ı seher Gözini yummış idi h*â*bdan her ehl-i seher
- 2 Meger ki togdı güni mâlik-i seher-gâhun Ki çıkdı çâhda delv ile Yûsuf-ı hâver
- 3 Nihân idüp yüzini çeşm-i şûh-ı encümden Zen-i zemâne bürindi sepîd bir çâder
- 4 Çü oldı çeşme-i hûrşîd-i münfecir fecre Reşâş-ı nûr ile toldı sipihr ser-tâ-ser
- 5 Çıkardı penbe-i subhı sımâh-ı cândan şeb Ki ire gulgul-ı tesbîh-hân vakt-i seher
- 6 Zebân-ı hâl ile tesbîhe eyledi âgâz Semâ vü 'arz u zemîn ü zemân u bahr ile ber
- 7 Açıldı gül gibi ol demde gonce-i ümmîd Görüp nesîm-i hidâyâtı bâg-ı cânda eser
- 8 Pür itdi rişte-i müjgân-ı çeşm-i zârîye Le'âl-i eşk ile göz görmedük niçe gevher
- 9 İdindi sübha-i dest-i niyâz u 'acz u kusûr Bu resme oldı tazarru'-künân u 'özr-âver
- 10 Ki ey münevver-i çeşm-i şuhûd-ı ehl-i basar Fürûg-bahş-ı fetîl-i çerâg-ı 'ilm ü nazar (18a)
- 11 Cilâ-dihende-i âyîne-i 'ukûl u fikr Ûiyâ-künende-i 'ayn'el-yakîn-i çeşm-i 'iber
- 12 Zamîr-i sâni'a her işden intikâl eyler Zamîr-i fâ'il olur taht-ı fi'lde muzmer
- 13 Zuhûr eyledi bir emr-i kün ile bu ef'âl 'Aceb degül mi ki ef'âle emr ola masdar
- 14 Meselde gülşen-i îcâd u kudretüne göre

Sipihr kubbe-i haşhâş içinde dâne beşer

- 15 Müzâhir oldı merâya tecellî-i zâta 'Arûs-ı şâhid-i ma'nâye oldı hacle suver
- 16 Nedür bu 'âlem-i ekvânda ki kazâ vü kader Nedür bu 'âlem-i a'yândaki kavî vü kader
- 17 Nedür bu bahr-i mu'allak ki şeb-çerâg ile pür Nedür bu kulzüm-i nîlîde surh nîlûfer
- 18 Beyân-ı künh-i ilâhîde lâl ehl-i kelâm Sükûtı mantıkının mûsîkî yirine geçer
- 19 Hakîkatine irişmekde dest-i 'ilm eşell Kemâl-i zâta nazar dîde-i nazar a'ver
- 20 Tabî'î olmaya çünki hidâyet-i ezelî Riyâz-ı kesb-i 'ulûm-ı riyâzîden ne biter
- 21 Bu iktizâ-yı kazâ hikmet-i İlâhîdür Hakîm yabane öter felsefî 'abes söyler
- 22 Kör ola dîde-i işrâkiyân çün huffâş Kaçan ki 'âleme hûrşîd-i Kibriyâ sala fer
- 23 Meşiyyet-i ezeliyye çün olmadı hem-râh Reh-i dalâlda meşâyi râhîl ü ebter⁴⁰
- 24 Harîm-i sun'ı mesâhatde 'akl vâlih ü deng Ki hads ana 'amûd olmayan kıyâs-ı veter
- 25 Kalurdı 'öşr-i 'aşîrden beyânda sıfrü'l-yed Rukûm-ı necm ile itse hesâb Ebû Ma'şer
- 26 Sipihr-i 'akl ile çün tob-ı zât-ı kürsîdür Kitâb-ı hey'eti 'ilm-i nücûmı 'akl n'ider
- 27 Olursa hayt hat-ı istivâ zemîn şâkûl

⁴⁰ Vezin bozuktur.

- Olursa çarh suturlâb u sakb şems ü kamer
- 28 Sumût olursa burûc u mukantarât eflâk Çekerse 'akl nice sâl ceyb-i fikrete ser
- 29 Hîç alınur mı gönül irtifâ'-ı şems-i yakîn Murî çü olmaya ser-rişte-i hidâyet eger (18b)
- 30 Verâ'-i hatda kalup 'akl-ı nısf fazla gibi Karîb-i kutb-ı yakîn evliyâya zerre kadar
- 31 Çeh-i devâtda hâme rasad çeküp niçe nîl Gözetse çarh-ı ma'ânîde seyr-i necm-i fikr
- 32 Yakını itmeye pergâr-ı vehm ü zan merkez Devât kutb ola bin yıl eger kalem mihver
- 33 Sutûr-ı fenn-i Mecestî vü 'ilm-i Öklidîs Olursa pâye-i mi'râc 'akl-ı dûr-nazar
- 34 Çıkarmaz âb-ı nizâ'î serây-ı tahkîka Kusûr u 'aczde kalur mühendisân-ı fikr
- 35 Tabîb eger ola cân-bahş u muhyî-i mevtî Dem-i Mesîhden i'câzda ura dem eger
- 36 Tefekkür ile olup mâlihulyâ 'ârız Kala 'ilâc kusûrında 'âciz ü ebter
- 37 Sipihri itse tasavvur dimâgı tola sider Zemîni kılsa tefekkür vücûdı bula hazer
- 38 Kelâm-ı hâlika yine kelâmıdur şâhid Degül mi âyete î'câz bunca ay u süver
- 39 Cenâb-ı Hakkı ne bilsün basîret ü fîkret Umûr-ı bâtınayı derk ider mi hiss ü basar
- 40 Fezâ-yı tîh-i tehayyürde kaldı dil güm-reh Meger ki menzîl-i maksûda 'acz ola rehber

- 41 Semât-ı kıble-geh-i 'acze togrulur âhir Egerçi kıble-nümâ gibi dil olur muztarr
- 42 'Arûs-ı bikr-i fikir hacle-gâh-ı noksanda İdindi perde-i ikrâr-ı 'aczini mi'cer
- 43 Nu'ût-ı zâtını 'ad itmeye hatîb-i lisân İderse dâne-i dendânı pâye-i müneyyer
- 44 Harîm-i sâhat-ı sun'a nezâre kılmagiçün Konıldı kasr-ı yücûdunda bu iki manzar
- 45 Çıra budagı degildür gözün aç itme çerâ Cihâna 'ibret ile sal nazar bakar da bakar
- 46 Murâdun ise şühûd-ı ruh-ı murâd eyle Cilâ-yı eşk ile mir'ât-ı çeşmi rûşen-ter
- 47 Ya câm-ı Cem yâhûd âyîne-i Sikenderdür Nazar idersen eger 'ibret ile seng ü meder
- 48 Zihî cemâl-i cihân-sûz u cân u dil-efrûz Ki lem'asıyle hacer nâr u nûr oldı şecer (19a)
- 49 Harîm-i sun'a ne lâzım delîl-i şem'-i nücûm Zuhûr-ı pertev-i kudret çü şemsden azher
- 50 Meşâmm-ı ehl-i şühûdı mu'attar itse n'ola Serây-ı sun'a felek tob-ı zer-nişân micmer
- 51 Anun irâdeti te'sîridür esîriyyât
 Anun meşiyyetine oldı cümle fermân-ber
- 52 Bahâr irse reyâhîn-i sahâ'if-i çemene Kemâl-i sun'unı isbât içün yazar mahzar
- 53 Şitâ yetişse cemed müncemid olup çü cemâd Cemâl-i kahruna mir'ât olup olur mazhar

- 54 Habâb-ı sun'da mahbûs 'unsur-ı bâdî Gören hevâyı ne vech ile kevne bâdî der
- 55 Kaçup şerâr-ı celâlinden âteş-i ser-keş Hisâr-ı sengi vü hısn-ı hadîdi itdi makarr
- 56 Şeh-i şinâba virür bir salâbet ü savlet Ki şîşe-i cemedde dîv âbı habs eyler⁴¹
- Riyâz-ı merhametün berg-i terresi cennet 57 Zülâl-i 'âtifetün feyz-i katresi kevser
- 'Azâb-ı âteş-i hırmân rahmetünden dûr Cehennem âteşi sûziyle yanmaz ehl-i makarr
- 59 Nesîm-i subh-ı celâl esse bâd-ı kahrun ile Eger sürâdık-ı zâtü'l-imâd ise sarsar
- 60 Zalâl u küfr-i 'adûdan cenâbı müstagnî Ne naks-ı mihre nazar görmez anı çün seb-per
- 61 Seb-i dalâlde irsâde nev'-i insânı İrişdi şem'-i hidâyetle bunca peygamber
- Söyündi şem'i vü tagıldı cem'i her birinün Çü tünd-bâd-ı havâdis cihâna virdi keder
- O şem'-i cem-i hidâyet çerâg-ı bezm-i rüsül Çerâg-ı dînin uyandurdı tâ dem-i mahşer
- 64 Güzîn-i halk-ı beşerdür rüsül güzîn-i beşer Güzîn-i zübde-i mahlûka ol durur server
- Tecellî-i leme'ât-ı cemâle meclâdur 65 Zuhûr-ı pertev-i nûr-ı İlâhîye mazhar
- Serây-ı sümme denâ vü serîr-i ev ednâ⁴² 'Uluvv-ı kadrine mi'râc pâye-i kem-ter (19b)

⁴¹ Vezin bozuktur.

⁴² Yayın iki ucu kadar, belki de daha fazla yaklaştı. Necm 8,9.

- 67 Duhûl eyledi ol bâr-gâh-ı kurbe ki ol Degül bu çenber-i eflâk anda halka-i der
- 68 Şu bezm-i ünse harîf oldı dönmese Cibrîl Yakardı şem'ine pervâne-var bâl ile per
- 69 Zihî celâl ki tâvûs-ı bâg-ı kuddûsı Harîm-i vahyine cârûb eyledi şeh-per
- 70 Vücûdı olmasa ser-nâme-i sahâyif-i halk Kalurdı nüsha-i tekvîn-i kâ'inât ebter
- 71 Kemâl-i mu'cizesin halka eyleyüp isbât Dünîm oldı ki tâ iki şâhid ola kamer
- 72 Kemân idüp ana Hak sundı *kâbe kavseyni Ve mâ remeyte* hadünün ana *izrameyte*⁴³ veter
- 73 Münâfık anlamasa n'ola kadr-i gerd-i rehen Virür mi dîde-i a'mâya tûtîyâ zîver
- 74 Nedür bu mu'cize dâyim ki haşre dek ümmet Kerâmet eylese izhâr-ı mu'cize dirler
- 75 Bilinmez evveli mi âhiri mi hayrludur Buyurdı ümmeti hakkında çünki misl-i matar
- 76 Şu resme eyledi tertîb gülşen-i dîni Ki haşre dek ana virmez hazân-ı devr-i keder
- 77 Nesîm-i sıdk-ı 'atik esdi ol gülistâna Virüp cedîd tarâvet misâl-i bâd-ı seher
- 78 Nihâl-i devr-i 'Ömer kad çeküp olup ser-sebz O bâga 'adli idi sâye-i safâ-güster
- 79 Tereşşuh eyledi ebr-i hayâ-yı Zi'n-nûreyn Şükûfe-zârını ol dînün itdi tâze vü ter

⁴³ O toprağı sen atmadın Allah attı. Enfâl 17.

- 80 Nesîm-i feyz ile ser-sebz oldı gülşen-i âl Açıldı gül gibi devr-i hilâfet-i Haydar
- 81 Hasandur ol güle jâle Hüseyn ana gonce Ki oldı revnak-ı bâg anlarunla efzûn-ter
- 82 O bâga iki nihâl ol nihâlde iki gül O gülbüne iki gonce o şâha iki semer
- 83 O postda iki bâdâm o pisteye iki magz O hâteme iki fass ol nigîne iki güher
- 84 O tîgde iki bend ol niyâmda iki tîg O dürce iki dür ol burcda iki ahter (20a)
- 85 Dirîg ü hasret ü derdâ vü sad-hezâr efsûsO gülde böyle imiş hikmet-i kazâ vü kader
- 86 Ki ola sadmet-i bâd-ı hazân ile pâ-mâl Ki ire şevket-i bî-dâd-ı hâr ile hançer
- 87 Ten ü kabâsı ola zahm-hûrde vü sad çâk Dehân u çihresi âguşte ola hûn-ı ciger
- 88 Gül-i dehân-ı hasen tolmadı mı jâle-i zehr Bu gülşene ol iken jâle-i gül-i ezher
- 89 Dilinde çıkmadı mı gonce gibi zahm ile baş Hüseyn iken o gülistânda gonce-i âhmer
- 90 Vücûd-ı pâkını bir nahl-i gül gibi itdi Nihâl-i kâmeti üstinde zahm-ı tîr ü teber
- 91 O gülşenün güliyem ol çemen giyâhiyem Bu çekdigüm gam u endûh ana delîl yeter
- 92 Figân ki şâh-ı emel itse kasd neşv ü nemâ Matar yirine felek zehr-i mâr feyz eyler

- 93 Yir anı kirm-i sitem niteki ten-i Eyyûb Nesîm-i lutf ile bir berg zâhir olsa eger
- 94 Açılsa gonce-i ümmîd bir seher nâ-gâh Semûm-ı kahr anı pejmürde vü füsûrde ider
- 95 Gül-i murâd olur ise şüküfte vü handân İder vücûdunı ber-bâd tünd-bâd-ı keder
- 96 Belî bu gûnedür etvâr-ı gerdiş-i akdâr Lebîb-i cevre le'îm ola rıf'ata mazhar
- 97 Meger ki 'aksine döndi ezelde kutb-ı felek Bu yıkılası felek-dûn üzerlerine döner
- 98 'Aceb mi meyl ider ise denîlere dünyâ Ki şer'de zene vâcib ki küfv ola şevher
- 99 Zühal gibi yiri sadr-ı semâda her nahsun Hilâl gibi ehâliye saff-ı na'l makar
- 100 Kelâm-ı vahy gelür kavli her Ebû Cehlün Kelâm-ı elken i'câz-ı sırrına mazhar
- 101 Ko câhile ululanmagı kadri çün artmaz Hacimde olsa sadef-pâre lü'lü'den ekber (20b)
- 102 Alur mı boynuna zer minnetini 'âkıl olan Degül mi 'âr ola zencîr fi'l-mesel ger zer
- 103 Olur mı devlet ile ehl-i lutf her nâ-cins Bahâr ile ola mı şâh-ı huşk bâr-âver
- 104 Resûl didi ki câhil *yefûr sümme yegûr*⁴⁴ Habâb gibi denî çarha çıksa yine iner
- 105 Cibilletinde ki olmaya siflenün devlet Döner sege k'ola boynında tavk-ı pür-gevher

⁴⁴ Kaynar, taşar. (Cahiller kıskanır ve kızarlar).

- 106 Peder har olsa dem urur şerefde m\u00e4derden Ki at tayısı olmak ile fahr ider ester
- 107 Olur mı hîç dil-i sâd ile bir derûn-ı tehî Meyân-ı nâzüke benzer mi renc ide lâgar
- 108 Bilür mi derd-i dili olmayan derûn ehli Kişi ki bilmeye teşrîh ider mi şerh-i ciger
- 109 İder mi beyza-ı tûtî-i zâg perverde Olur mı hîç le'îm ü denî hüner-perver
- 110 Çerâ vü çünde çerâ eyleme gönül har-vâr Tahammül eyle ki har-vâr 'arza oldun har
- 111 Ferâg-ı bâli degişme kuyûd-ı dünyâya Virürler ise cihân begligin eger ser-ber
- 112 Gınâ-yı kalb ile şol kîmyâya mâlik ol Ki ola 'izzet-i dünyâ yanunda müstahkar
- 113 Meşâmm-ı cânı ide 'ıtr-nâk bûy-ı fenâ Gele revâyih -i gül-zâr-ı dehr müstakzer
- 114 Firâz-ı küngür-i 'arşa çıkardı murg-i revân Ger olmasaydı giriftâr-ı dâm-ı vasf-ı beşer
- 115 Varur mı ünse kişi geçmeyince gerdûndan Felekler oldı seg-i nefse geçmege çenber
- 116 Libâs-ı zühd-i zemânîden ol gönül 'ârî Ki oldı anda tırâz u 'alem riyâ vü batar
- 117 Kerîme halka be-gûş ol le'îme çekme kulak Kulaguna küpe eyle sözüm ki söz gevher
- 118 Girer mi gûşuna bâng-ı dirâ-yı mahmil-i mevt Kulagun arduna tut dinle ger degülsen ker
- 119 Güzeşte şehleri fikr it der-i Hakka togrul

Ki Tugrul oldı serencâm-ı Sencere müncer

- 120 Dirîg her olur olmaz kişi onup bitti Bu onmadık başımun zahmı ne onar ne biter (21a)
- 121 Le'îme feyzde pervîzin sipihr-i denî Komaz dakîka bana geldigince ince eler
- 122 Müsâfîr-i reh-i derd ü belâ olaldan dil Mukîm-ı kûşe-i râhat görinür ehl-i dübür
- 123 Nüh-i mihmân-ı fuzûlî olur 'aceb gam ki Gelince tîgini çak sadr-ı kasr-ı cânda asar
- 124 Meselde levh-i debistâna döndi safha-i dil Emel ne harfî ki sebt ide tâli' anı siler
- 125 Kebâb olmada dil nâr-ı fakr ile eflâk Duhân-ı âh ile dönmekde çarhdur nüh-per
- 126 Kemâl-i ma'rifetüm yirümi od itdi benüm Ki bûy içün yanar odlara 'ûd ile 'anber
- 127 Hezâr sâl döner ise bu tob âyîne Cihâna bir dahı göstermeye bana benzer
- 128 Kalâyid-i suhanum tavk-ı gerden-i havrâ Zülâl-i ma'rifetüm âb-ı rû ider kevser
- 129 Nişân virür mi benüm gibi dâvere gerdûn Her âsitîne egerçi nişân virür dâver
- 130 Sen ögme kendüni zevk eyleyen bilür sözüni Ki kendünün ne bilür n'eydügini ney-şekker
- 131 Benümle bir midür andan kemâl u 'irfânda Benüm gibisine erâzil n'ola kazâda eger
- 132 Bulur mı Düldül-i Haydar makâmını her har Şagâl-ı mâde olur mı 'adîl-i şîr-i ner

- 133 Kişi ki kâdı iken kendi zulm-dîde ola Şu ac müflise benzer ki ol ola zerger
- 134 'Adâlet iline Ye'cûc-ı fitne itdi hücûm Diyâr-ı Hakka zer-i surh olup Benî-asgar
- 135 Meger cihâna vire i'tidâl 'adl ileCenâb-ı şâh-ı Ferîdûn celâl-i Ferrûh-fer
- 136 Tarâvet-i katarât-ı sehâb-ı 'adl ile Şükûfe-zâr-ı şerî'at hemîşe tâze vü ter
- 137 'Aceb mi zevk idüp olsa zemâne şîrîn-kâm Karışdı şer' ile çün 'adli hemçü şîr ü şeker
- 138 Kemend-i satveti zencîr-i 'adl-i Nûşîrevân Sinân ü seyf-i 'adû-gîri sedd-i İskender (21b)
- 139 Serây-ı şehde tokuz tâkdur bu nüh-eflâk Serîr-i mülke yedi pâyedür yedi kişver
- 140 'Arabda biri emîr ü 'Acemde birisi hân Duhunda var iki begler begisi İskender
- 141 Gubâr-ı merkebi ceyşi irişdi eflâke Olursa hâtır-ı kevkeb 'aceb midür mugber
- 142 Gören didi Kızıl Elmada mehçe-i 'alemin Bu sîb-i müslimi ayvâ-yı 'adından bihter
- 143 Hırâş-cân idüp erbâb-ı sâza mızrâbı Şarâbı eyledi ashâb-ı fıska hûn-ı ciger
- 144 Olursa devleti ecdâdına n'ola gâlib Sadefden olsa ziyâde ne tan bahâda dürer
- 145 Yemîn-i 'adli şimâl-i hevâya hükm ideli Giceyle efser-i zerrînle şem'-i seyr çıkar

- 146 Cihânı tutdı ise n'ola 'adl u dâd ile Ki iki şâhid ile kal'a alınur dirler
- 147 Hevâya agdı meh-i nev bölündi mikdârı Hilâli na'l-i semendünle vezne çekdi nazar
- 148 Olursa hükmüne baş egmeyen gül-i sûrî Kulagı denlü ide pâresin nesîm-i seher
- 149 Dilinde itmeye mihrün şu kim ki mühr-i nigîn Hemîşe başına taş olur ise hâtem-i zer
- 150 Yaparsa şâh n'ola gönlümi silüp yaşum Ki bir mutî'dür emrine bahr-i fermân-ber
- 151 Nesîm-i terbîyetün esdi gülşen-i şerefe Nem-i sehâb-ı nevâlünle buldı behcet ü fer
- 152 Serinde sebz 'alâmet idindi gonce-i âl Dem urdı Haydar-ı Kerrârdan gül-i ahmer
- 153 Revâ mıdur ki ola mazhar-ı cefâ evlâd Cihâna zıll-ı Hudâ ola hep safâ-güster
- 154 Virilse bir çanak aş ola zehr ile mahlût Sunulsa bir kadeh âb ola çogı hûn-ı ciger
- 155 Resûl hürmetine âle merhamet eyle Kemük atar itine kim ki ıssın agırlar
- 156 İdersem âh-ı şerer-nâk n'ola gam irdi Başuma od yakıben irdi gussadan 'asker
- 157 Ne gam eger ki olup himmet-i şeh-i 'âdil İre 'inâyet-i destûr-ı âsâf-ı saf-der
- 158 Vezîr-i a'zam-'alî cenâb-ı zıllu'l-lâh Ki dehre ma'deleti sâye-i safâ-güster
- 159 Savâb-ı fikri 'azîmetde hezârân ceyş

- Huceste rây-ı kilîd-i fütûh-ı sad-kişver
- 160 Sevâd-ı hâme-i tedbîri hâl-i çehre-i feth Zuhûr-ı fikr-i münîri nüvîd-i ceyş-i zafer
- 161 'Arûs-ı saltanata fikr-i pâki meşşâta Cemâl-i ma'delete zihn-i sâfı âyine-ger
- 162 Kemend-i himmeti zencîr-i gerden-i hûrşîd Sürâdıkât-ı celâli sipihrden ber-ter
- 163 Ruhâm-ı hâme ferâsetle bir nigâh itse Olurdı sâgar-ı Cemşîd ü câm-ı İskender
- 164 Behişte döndi anun sa'yi ile beytü'l-mâl Ki oldı hep der ü dîvârı hışt-ı sîm ü zer
- 165 Cihâna 'avdeti hulk-ı cemîl-i neşr itdi Yuferrihu rîhahû ke'l-miski küllemâ kurrir⁴⁵
- 166 Vezir idindi anı çünki Hüsrev-i devrân Sürûş-ı gayb didi hayru men kad istevzer⁴⁶
- 167 Şeh ü vezîr idüp ittifâk-ı hürmet-i âl Şeref zemânıdur oldı kırân-ı şems ü kamer
- 168 Velî ki sûret-i terbî'iyle bir nahsun Rücû'-ı şems ü mehâk-ı kamer zuhûr eyler
- 169 Bu hâl derd ü melâli vü hayret-i bâli Der-i müşîre gerek yaraşır işâret ider
- 170 'Aceb mi Hızr irişüp bana reh-nümâ olsa Murâda himmet-i Hızr ile irdi İskender
- 171 'Âyâl idindi hep eytâm-ı ehl-i beyti bugün Sitem gören varup ol bâba ya baba dirler

 $^{^{\}rm 45}$ Her defasında koku tekrarlandıkça. $^{\rm 46}$ En hayırlı vezir.

- 172 'Âceb mi ola kerem 'arsasında şîrâne Ki lutf-ı şîrîni bûstân-ı Bermekîden emr
- 173 Velî ki derd-i dili şi'r ile iden iş'âr Cenâb-ı zât-ı şerîfe hemân ana benzer
- 174 Sifâl pâresini ilte câm-ı Cemşîde Zücâc-ı kıt'asını âfitâba 'arz eyler
- 175 Erenler er bunı ire yetincedür dirler Ne bâk ana ki yüz sürüyü kapuna irer (22b)
- 176 Görüp sirişkümi sal mihr-i pertevin dilüme Şu'â'-ı şems ile ol ka'r-ı yemdedür perver
- 177 Nesîm-i himmet ile gonce-i murâdumı aç Nem-i nevâlün eger ter ide diger bihter
- 178 Sürüp cenâb-ı harîmünde mûy-ı jûlîde Yemînler eyledi çün senün âsitânuna ser
- 179 Bir özge kapuya varmaz koyup senün işigün *Ki Rubbe eş'ase ve agbere lev akseme lâber*⁴⁷
- 180 Hevâ-yı gülşenün ile meşâm-ı cân hürrem Gubâr-ı hâk-i der-i devletün gözümde uçar
- 181 Hatîm-i Ka'be-i ikbâl oldı dergâhun Ayagun öpmege yüz süriyenden el mi deger
- 182 Irakdan eyleyelüm istilâm secde idüp Irak yakın idinür kıble Ka'beyi yek-ser
- 183 Beni koyup yanuna alma 'izz ü nâz ehlin Nişâne varımaz olursa tîr ney-şekker
- 184 Yüzüm kara ise yanunda sen 'alîlük kıl Kara yüzi ile makbûl-ı şâh idi Kanber

⁴⁷ Saçı başı dağınık nice fakir vardır. Allah katında muteberdir. Allah istediklerini yapar.

- 185 Kalursa rîşte-i ümmîd târ-ı mû denli Tasavvur eyleme bin tîg-i ye's anı keser
- 186 Var ise kullarun içinde yine 'Âşıkdur Kapunda zerreden ednâ gubârdan kemter
- 187 Zuhûr-ı pertev-i mihrün durur viren ammâ Ana hayât ki ol da'vâ-yı vücûd eyler
- 188 Kayurmam öldigüme çünki bildüm olmazmış Kitâb-ı 'ışkda hûn-ı şehîd-i zulm heder
- 189 Yanayum aglayayum şem' gibi sûz dilüm Ya subha ire şeb-i gam virem pâ yanmada ser
- 190 Sevâd-ı dîdedür ekvân u merdümi insân İçinde merdümün âl-i Resûl nûr-ı basar
- 191 Hudâ buyurdı duhûl-ı büyûtı bâbından Serây-ı 'ilme giren oldı bende-i Haydar
- 192 Cefâ-yı âle tahammül ider mi rûh-ı Resûl Degül mi dâg-ı derûn-ı peder cefâ-yı püser
- 193 'Aceb mi gölgesi gökcekler itse bana sitem Dil-i nebâta irer çûb-ı bîdden hançer
- 194 Akârib itse sitem gam degül ki irmişdür Çerâg-ı Ahmede nâr-ı Ebî Leheble şerer
- 195 İder mi âl cefâ ki nihâl-i bâg-ı nebî Revâ mıdur ki vire Bû Cehil hantalını semer
- 196 Semûm-ı kahrun ile âl hep yüzin düşdi Zemân-ı devlet-i âle efendi bu mı düşer
- 197 Belâ vü derd ile devrinde il Ebû Derdâ Zemân-ı ma'deletinde degül yiri Bû Zer

- 198 Livâ'-ı âli zemânında ser-nigûn itdi Ki ya'ni eyledi rıf'atda tûbâya hem-ser
- 199 Var i'timâdı meger kuvvet-i siyâdetüme Ne denlü var ise heb cevri bana nezr eyler
- 200 Nisâbdan bilür evlâdun oldugın mecrûm Virürse lutfi zekûtın harâm olsun eger
- 201 İdindi anı Çivî-zâdeye bedel dünyâ Ki zen yanında zeker yirini tutar sa'ter
- 202 Olurken ecr-i hidâyet mahabbet-i kurbı Efendi şimdi bize iltifâta ücret umar
- 203 'Aceb mi ger ola gencûr-ı künc-i beytü'l-mâl Gerek tılısm ile elbette gonce bir ejder
- 204 Egerçi kalb-i 'adû seng oldı kasvetde Kiminde katre-i bârân-ı eşk eyler eser
- 205 'Aceb mi itmese kalbinde ba'zınun te'sîr Enîn-i nîm-i şeb ü nâle-i zemân-ı seher
- 206 Dinür mi her hacer-i esvede yemînu'llâh Olur mı zer meheki her yatan siyâh hacer
- 207 Keremlü olmasa âdem beşer degül hardur Sadef hazefdür içinde ger olmasa gevher
- 208 Benümle taşlaşur ana n'ola disem Mecnûn Ki sengdür tolu ceybüm benüm o mînâ-ger
- 209 Gönül ki câm-ı Cem âyîne-i Sikenderdür 'Amûd urup ol ana şekl-i kuvvetini dener
- 210 Yanumda Hazret-i Hak kibriyâsı hakkı içün Çü berg-i terre degüldür bu kendir-i ahzar
- 211 Olur mı gerd ile bahr-i muhît âlûde

Gubâr-ı 'âlem-i gayr ile gönül mugber

- 212 Getürdigümce şühûd itdi bana inkârı Şehâdet ide meger ki Nekîr ile Münker (23b)
- 213 Ne oldı şâfi'î Ahmed ne mezheb-i Hanefî Dil-i 'adûye disem n'ola Mâlikî mermer
- 214 Ben agladukca ol igmâz-ı 'aynı itdi ziyâd İşidirüz ki virür izdiyâd-ı h*â*b matar
- 215 Ne denlü baş açup itdüm tazarru' ü zârı Ziyâde eyledi her zahm-ı tîge bir neşter
- 216 Ne ser ü serkeş olur kadd-i yâr yâ Rab kim Anılmaz âhum egerçi menâr-ı sengi eger
- 217 Ne mîvesiyle temettu' ne sâyesinde huzûr Ne fâyide tutalum kadd-i yâr ola 'ar'ar
- 218 Terahhum eyle diyü diyü agzum egildi Ne nef'i var bana yâr olmadan perî peyker
- 219 Ferişte ise de yâd eylemen bana nâmın Bilişlük eylemedi çünki ol melek-manzar
- 220 Küdûret-i dil ile rûy-hande benzer ana Ki haşvi hâr ile ola vü per-niyân ola pister
- 221 Cihânı âteş-i kibr ile yakma çün Nemrûd Halîlüm âdeme âzârı azar it azar
- 222 Toludur azer-i gamla derûn-ı dil hazer it Yakup beni n'ola ger eyledünse hâkister
- İgende cevr idüp bana satma istignâZemâne Yûsuf-ı Ken'ânı gâh olur ki satar
- 224 Çelikle başuna berk itse efser-i zerrîn Gurûrı ko anı bir lu'b ile sipihr çalar

- 225 Gurûr itme elündeyse n'ola hâsıl-ı dehr Niçe senün gibi rûzgâr harca sürer
- Niçe senün gibi kazıdı bu defterden'Aceb mi bir iki gün oldun ise ser-defter
- 227 Makâmı oldı ser-i dâr niçe serdârun Nihâyet olasın evc-i 'alîde İskender
- 228 Tutalum eyledi ceng-i gamunda 'ûd beni Seni bir iki gün itdi bu bezme hînâger
- 229 Nevâ yirine revân itme her rekimden hûn Havâle eyleme mızrâb yirine neşter
- 230 Sadâmı dâye virür çeşm-i kûdekî h*â*ba Sakın ki hufte ider bahtunı nefîr-i nefr
- 231 Nifâk-ı düşmene te'sîr eylemez girye Söyinmez âb ile seng içre âteş-i muzmer (24a)
- 232 Dem ola yakmaga kasr-ı 'adûyı lâzım ola Gözüm sirişküni hûn-ı cigerle besle becer
- 233 İrerse berk gibi âh hâyil olmaz câh İrince tîg-i kazâ n'itsün âhenîn migfer
- 234 Dil-i 'adû demir ise kulun da 'Âşıkdur Kılıc da hâşimidür n'ola âhen ise siper
- 235 Du'â-ı seyf gibi bu kasidemi okuyup 'Adû-yı saht-dilün cânına uram hançer
- 236 'Alî-misâl alup Zülfekar-ı şi'rüm ele Dil-i 'adûyı alam hemçü kal'a-i Hayber
- 237 Helâk-ı düşmene her beyt bir Ebû'l-Müslim Elünde kâfiye-i râ bir iki yüzlü teber

- 238 'Aceb mi alsa diyâr-ı murâdı 'asker-i eşk Ki her dem âh livâsını burc-ı çarha diker
- 239 Şeb-i sitemdeyüm itsem sözüm dırâz n'ola Gice uzunlugı çok söyledür kişiye semer
- 240 Ko mâ-sivâyı gönül hep umûrı Hakdan bil Ko şirk-i gayrı ki şirk âdemi ider kâfir
- 241 İlâhî cümle senündür tasarruf u kudret Bahânedür arada fi'l-i hâce vü çâker
- 242 Hîç âsitîn-i tehî kabz u bast eyler mi İçinde olmayıcak zinde sâ'id-i bâ-fer
- 243 Cemâd-veş hacer-i lâ-yemis olur sâ'id Çü 'ırk u cild ü 'asabdan biri ola kemter
- 244 Ne fâyide 'asab u ırk u lahm u 'azm ile cild 'Amel ki eylemeye emr ile kavî vü kader
- 245 Kavî vü kudrete mebde meşiyyet-i Hakdur Zihî celâl u 'uluvv 'izz-i şâne el-ekber
- 246 Çü oldı merci'-i cümle umûr hikmet-i Hak Neden ki ehl-i hıred gamdan âh u nâle ider
- 247 Cenâb-ı Hazret-i Bî-çüne eyle 'arz-ı niyâz Anun yanında çü ehl-i niyâz nâzı geçer
- 248 İlâhî Ka'bede tasvîr ü büt revâ olmaz Neçeye dek tola dil nakş-ı sûret-i dilber
- 249 İderdi bâl-i ricâ yile murg-ı cân pervâz Ger olmasaydı giriftâr dâm-ı hafv u hazer (24b)
- 250 Hevâ-yı gamze vü sevdâ-yı zülf-i dilberdür Cihânda yoksa beni gayrı ne eyler ne çeker
- 251 Bagalde kîse-i zer dilde hubb-ı dünyâ yok

- Surâhî der-bagal u 'ışk-ı dil-rubâ der-ber
- 252 Hevâ-yı câm benüm de başumda efserdür Ulularun n'ola destârı var ise sâgar
- 253 Nevâ-yı sâz ile dil her terâneye rakkâs Sürûr-ı mutrib işitdükde çalgısuz oynar
- 254 Semâ'-hâne gibi dil tolar semâ' ü safâ Kulaguma çalına çün sürûd-ı râmiş-ger
- 255 Sevâd-ı şi'ri gönül hâmeden ider seyrân Ki ya'ni masra delügünden ola Mısra nazar
- 256 Degüldür âh depemden çıkan dütünümdür Ki oldı ahker-i dâg-ı cigerle dil micmer
- 257 İrişdi şeyb agarup ser döküldi gözden nûr Şeb-i şitâda tan agarıcak togar Ülker
- 258 Sevâdı mûy-ı siyâhun beyâza çıkmadadur 'Amel muhâsebesin eyle mû-be-mû defter
- 259 Yüzün karalarını surh-ı hûn-ı dille yazup Sahâyif-i ruha çek târ-ı eşkden mıstar
- 260 Sepîd-i mûyı görelden agardı dîdelerüm Degül mi dîdeye mûy-ı sepîd 'ayn-ı zarar
- 261 Geçerdi lahzada sûfâf-ı sûzen-i mühre Şu resme inceyidi rişte-i şu'â'-ı basar
- 262 Şebinde zülf-i siyâhun nişân-ı mûr hattı Görürdi dikkat ile hüsn-i yâre kılsa nazar
- 263 Karîb oldı çü vakt-i tulû'-ı fecr mesîb Dem urdı âh-ı nedâmet misâl-i bâd-i seher
- 264 Bi-'aynihi yini oldı mürde pervâne Çerâg-ı hufte gibi kaldı gözlerüm bî-fer

- 265 Nazarda dir idi gördügine hep der-men Dirüm yüzin göre bilmekde şimdi var nazar
- 266 Şikâr kanda ide murg-ı hâbı şâhin-i çeşm Ki al rişte ile gözlerini eşk diker
- 267 Yazardı hâfızaya hiss-i müşterek anı Götürse zihne berîd-i hayâl her ne haber
- 268 'Arûs-ı ma'nâda sûret-pezîr olmaz hîç Sıdı dil âyinesin şimdi seng-i jeng-i keder (25a)
- 269 Çü oldı rahne niçe yirde sûr-ı dendânda 'Aceb mi derd-i ecel genc-i câna bulsa zafer
- 270 İcâbet eyle du'âmı mücîb-i muztare sen İlâhî derd ü belâ içre kalmışam muztar
- 271 İlâhî saht ise pûlâd-veş n'ola gönlüm 'Aceb mi bulup anı ûstâd-ı feyzün eger
- 272 Virüp nümâyiş ana saykal-ı hidâyet ile Olam cemâlüne âyîne nûruna mazhar
- 273 Çün eyledün beni ehl-i kemâl ü 'ilm ü hüner Şekûr ile bi-hakkı men a'ta vü şekker
- 274 Çün eyledün beni a'da sitemlerine hedef Sabûr eyle bi-hakk-ı men ibtilâ vü sabr
- 275 İlâhî eylemedin dünyeden celâ-yı vatan Müyesser eyle kazâdan bana kazâ-yı vatar
- 276 İlâhî tübtü rec'atü enebtü fâgfirl⁴⁸i Mine'l-kelâmî lisânî bihi hezî vü hezer⁴⁹
- 277 Fetüb 'aleyye lakad tübtüke ileyke metâb⁵⁰

⁴⁹ Dilini kötü kelimelerden koru!

⁴⁸ Tövbe ettim, beni affet.

Veleyse gayrüke tevvabü min hayye ve vezer⁵¹

- 278 Ve inni eşhedü ennâ ileke illâllâh⁵² 'Aleyke eşhedü men âmene bihi ve kefer⁵³
- 279 Çü lokmam âhir ola 'âlem-i şehâdetde Halâvet ile bu şehdün sun agzuma şekker
- 280 İlâhî nûr-ı cebîn-i Resûl hürmetine Fürûg-ı tevbe vü tevfîki kıl bana rehber
- 281 Reh-i bekâya gidem dâg-ı sûz-ı 'ışkun ile Yanumda hâzır u âmâde ola nân-ı sefer
- 282 Serîr-i gaslda şol ehl-i beyt kıl beni ki Recesden anları tathîrün eyledi athar
- 283 Şu dem ki ola ecel teknesi bana tâbût Kenâr-ı bahr-ı fenâda ecel ola ma'ber
- 284 Hübûb eyleyüp oldum riyâh-ı rahmete rûh Sehûlet ile idem sâhil-i necâtı makarr
- 285 Günâh-bâr-ı girânından it beni tahfîf Cenâzemi tuta tâ eller üstüne iller
- 286 Reh-i fenâda çü der-bend-i kabr ola menzil Hücûm ide şeb-i vahşetde düzd-i havf u hatar
- 287 Bana refîk olup şevk u zevk-i insu'llah Huzûr üzre yatam arkam üzre tâ mahşer (25b)
- 288 Mezâruma benüm ilmâm-ı zayfçün geleler Na'îm-i rahmetün ile Nekîr ile Münker
- 289 O hâbde bana kıl rûyetün senün rûyâ

⁵⁰ Sana tövbe ettim. Yalnız sana tövbe edilir. Senden başka tövbeyi kabul eden yoktur. Nisâ 18, Rad 30.

51 Günahlarımdan tövbe ettim. Kıyamet 11.

52 Allah'tan başka Tanrı yoktur.

⁵³ O'na birçokları inanmasa da ben inandım.

- Şu dem ki seng ü lahd ola bâliş ü pister
- 290 Çü hâkden getürem sebze gibi haşrda baş Livâ'-ı sebz-i Nebî servi sâyesinde kopar
- 291 Nesîm-i merhametün hâkden götürse tozum Çü gird-bâd semâ' ide şevkden yekser
- 292 İlâhî kıl bana necm-i hidâyeti merdüm-i 'ayn Şeb-i kıyâmet irüp çünki oldı berk-i basar
- 293 Tola dilümde benüm şevk Hak velâ-yı Resûl Kaçan ki mahşer olup ola cem' şems ü kamer
- 294 Hümâ-yı rahmetün it ben garîbe yine penâh Şu dem ki bîm-i celâlünle dîne eyn-meferr
- 295 Haşirde ben çekeyüm ehl-i 'ışk sancagın Yanumca kâfile-i 'ışk-ı pâk olup 'asker
- 296 Çü ola merhametün dest-gîr ü râh-nümâ Sırât geçmede cân bâk itmez ol da geçer
- 297 İlâhî zümre-i âl ile cennete sevk it Şu dem ki sevk oluna dûzeh ü cinâne zümer
- 298 Yaşuma bak dil-i pür-zenbî âteşe salma Kuru yanınca egerçi ki yaş da bile yanar
- 299 Seni gerek seni bana beni kıl ehlu'llâh Cinân u kevser ü gılmân u hûrî ehline vir
- 300 Zülâl-i 'atıfetün eylesün beni sîr-âb Ki reşkden akıda agzı suyunı kevser
- 301 Cinân-ı kâkül ü hûr olmaz ana dâne vü dâm Gönül hevâ-yı likâ-yı Hudâda yüksek uçar
- 302 Şühûdun eyleye 'ayne'l-yakînimi pür-nûr O 'ayne nûr-ı tecellün ola şu'â'-ı basar

303 İlâhî hatm-i hayr 'Âşıka müyesser kıl Be-hakk-ı hatmi nebiyyîn be-hakk-ı hayr-ı beşer (26a)

FÎ-GAZELİYYÂT

1

Fâ'ilâtün Fâ'ilâtün Fâ'ilün

- 1 Yâr işüginden dinildi 'âşık-ı şeydâ bana Hak dimişler *tenzinü'l-elkâbu min savm bi's-semâ*⁵⁴
- 2 Hâkümi ide sifâl-i sünbül ü reyhân felek Gitmeye başdan hevâ-yı bûy-ı zülf-i dil-rübâ
- 3 Mülk-i '1yş u 'işretün olsak n'ola İskenderi Oldı elde câmımuz âyîne-i 'âlem-nümâ
- 4 'Aynuma almam zer-i hûrşîdi dürr-i encümi Feth olaldan bana bâb-ı genc-i iksîr-i fenâ
- 5 Şi'r ü inşâdan murâdı 'Âşık-ı bî-çârenün 'Arz-ı ihlâs eylemekdür yâre bâkî ve'd-du'â

2

Fâ'ilâtün Fâ'ilâtün Fâ'ilün

- Hâr u hâşak-ı der-i yâri getürdükce sabâKabrüm üstinde bulur serv ü semen neşv ü nemâ
- 2 Hâyil olsa hüsnüne zülfün tolar 'anber cihân Tâb-ı hûrşîd olmasa olur beli sünbül hevâ
- 3 Kuşca cânum sîne-i kabrine cevr âzâd kıl Küşte-i 'ışka buyurmaz mezheb-i gam kan-behâ
- 4 Oklarun bana irişüp kol kanad olmış durur Murg-ı cânum talbınur uçmaga kûyundan yana

_

⁵⁴ Lakaplar gökten iner.

5 Başa varılmaz imiş gîsû-yı 'anber-sây ile Rîze rîze olmayınca şâne gibi 'Âşıkâ

3

Fe'ilâtün Fe'ilâtün Fe'ilâtün Fe'ilün

- Yitmiş iki dereden su getürürse deryâ
 Mâcerâ-yı yem-i eşkümle ne nisbet sanemâ
- 2 Kişver-i hüsn ü cemâle n'ola sultân olsan Sâye salmış iki zülf üstüne mânend-i hümâ
- 3 Lem'a-i mihr-i ruhun irişe ana kapunda Gökde istedügini yirde bulurdı 'Îsâ
- 4 Söyledür ıssını mâl eski meseldür dilde Beni 'ışkundur iden şi'r ile böyle gûyâ
- 5 Bildürür kişiye eflâk-ı cenâb-ı Hakkı Taraf-ı Ka'beyi 'Âşık nitekim kıble-nümâ (26b)

4

Mefâ'îlün Mefâ'îlün Mefâ'îlün

- Habâb-âsâ olaldan 'ışk ile dilde hevâ peydâ Sunar mey yirine sâkî-i gam bana pey-â-pey dâ
- 2 Gözümde v'ey eger olmaya hûrşîd-i ruhun rahşân Felekde mihr-i 'âlem yâ ola yâ olmaya peydâ
- 3 Beni hâk itdi pâ-bûsun hevâsı irmedi destüm Gubârum oldı gitdi 'âkıbet yollarda nâ-peydâ
- 4 İripdür behre 'ışkumdan benüm Ferhâd u Mecnûna Meseldür söylenür olur er erden dil-berâ peydâ
- 5 Revân-ı Hüsrev ü Hâfız 'Acemde şâd olmışdur Olupdur 'Âşık adlu Rûmda bir hoş-edâ peydâ

Fâ'ilâtün Fâ'ilâtün Fâ'ilün

- 1 Ruhlarun âyînedür bakdukca ehl-i hâl ana Merdüm-i çeşmün görüp 'aksin dimişler hâl ana
- 2 Alnun üzre hâl san rûhu'l-emîndür sidrede Zer varaklı kaşlarun olmış murassa' bâl ana⁵⁵
- Zülfüne dil virdigümde gerdenün oldı boyun Güm idüp girdi vebâle ol vebâli sal ana
- 4 Bezm-i mahşerde yazar ancak humârın mest-i 'ışk Olur İsrâfîl sûrı nagme-i kavval ana
- 5 Atlas-ı çarha baş egmez oldı 'Âşık dostum Giydirelden pâdişâh-ı 'ışk köhne şâl ana

6 Fâ'ilâtün Fâ'ilâtün Fâ'ilün

- Ben ne hâkem ni'met-i vuslat ola himmet bana Ölicek yâdunla cân virmek yeter devlet bana
- 2 Leylâ vü Mecnûn gibi nakkâşlar bir safhada İkimüz nakş eylemek şâhum yeter vuslat bana
- 3 Yine cûyâ-yı zülâlün vaslı kim gark-âb iken N'ola dinse âşinâ-yı kulzüm-i vahdet bana
- 4 Şol kadar müstagrakam nûr-ı tecellün ile kim Yâr u agyâr adını anmak gelür gayret bana
- 5 'Âşıkâ mestâne olsa n'ola eş'ârum benüm Cür'a-ı Câmîden irdi neş'e vü hâlet bana

7
Mefâ'îlün Mefâ'îlün Mefâ'îlün

⁵⁵ Yazmanın kenarına şu mısra da yazılmıştır: Olmış ebrû-yı 'arâk-rîzün murassa' bâl ana

1 Nedür ki yâd ola dünyâ vü mâfîhâya istignâ Fenâ ehli odur ki ide istignâya istignâ⁵⁶ (27a)

8

Mefâ'îlün Mefâ'îlün Mefâ'îlün

- 1 Serin seng-i binâ itsün salanlar 'ışka bünyâdı Bu erkân ile resm itmiş ezelden anun üstâdı
- 2 Dahi tarh itmeden 'âlem esâsın bânî-i kudret Gönülde üstüvâr idi muhabbet mihnet âbâdı
- 3 Ten-i hâki viren âba egerçi eşk-i çeşmümdür Mahabbet nârına ammâ hevâ-yı 'ışkdur bâdi
- 4 Dökerse dâne encümden iderse kehkeşândan dâm Gönül murgın şikâr itmek ne mümkün dehr sayyâdı
- 5 Cibâli himmet ile kal' iden 'âşıklaruz 'Âşık Bu yolda yardan uçurmak olur nice Ferhâdı

g

Fe'ilâtün Fe'ilâtün Fe'ilün

- Heves-i sohbet-i cânân ile öldüm gitdüm
 İrmedüm vuslata hicrân ile öldüm gitdüm
- Nâlişüm işide rahm eyleye öldüre diyü Âh kim nâle vü efgân ile öldüm gitdüm
- 3 Bir yana ta'ne-i agyâr ile cânum çıkdı Bir yana mihnet-i devrân ile öldüm gitdüm
- 4 Ne sorar derdümi ne hâlüme rahm eyler var Dostlar hasret-i dermân ile öldüm gitdüm
- 5 Segler âsûde eşigünde vü 'Âşık mehcûr Âh kim gayret-i akrân ile öldüm gitdüm

⁵⁶ Bu kısımda varak kopuk olduğu için bu şiirin sadece matla beyti vardır.

Mefâ'îlün Mefâ'îlün Mefâ'îlün

- 1 Dilâ gerd-i ruh-ı yârı hat-ı 'anber-feşân tutdı Diyâr-ı Rûmı tevkî'-ı Süleymân-ı zemân tutdı
- 2 Hevâ-yı kaddün ile serv iderdi bâgdan reftâr Çeküp zencîre anı yetişüp âb-ı revân tutdı
- Degül şeb ey kamer-ruh sen güneş yüzli firâkından Bir âh-ı sûz-nâk itdüm ki âfâkı duhân tutdı
- 4 Harâret irmesün tâb-ı cemâlünden diyü hûrşîd Yüzine günlük eyleyüp sehâbı sâyebân tutdı
- 5 Hümâ-yı zülfî reşkinden o mâhun 'Âşıkâ 'ankâ Görüp başın alup mülk-i 'ademde âşiyân tutdı

11 Fâ'ilâtün Fâ'ilâtün Fâ'ilâtün Fâ'ilün

- 1 Kaldı çeşmümde hayâlün ey melekler manzarı Gerçek imiş cây idinür cûyı dirlerdi perî (27b)
- 2 Sanma nergis üzre şebnemdür görinen gülsitân Âfitâb-ı hüsnüni gördi yaşardı gözleri
- 3 Kân-ı la'l olmış durur kan aglamakdan gözlerüm Kirpügine asmaz oldı degme dürr ü gevheri
- 4 Çarh döner 'ömr akar cân öykünür biz muntazır Âsiyâb-ı dehrün âdem oldı nevbet bekleri
- 5 Gördi uçurdı huzûrın murg-ı cânun tıfl-ı eşk Âşiyânın bozdı 'Âşık terk idüp çeşm-i teri

12

Fâ'ilâtün Fâ'ilâtün Fâ'ilün

1 Ey meh-i ruhsâruna hûrşîd ü keyvân müşteri

- Kangı dürcün gevherisin kangı burcun ahteri
- 2 Handen olmışdur görür reftârun âdem öldürür Kangı gülbün goncesisin kangı gülşen 'ar'arı
- 3 Hey kıyâmet kandasın kim reh-güzârundan yana Çeşm-i hasretdür mezârum hâkinün nergisleri
- 4 Çokdan isterdüm zen-i dünyâya ben virmek talâk Himmet-i 'ışk irdi oldum sözümün bu gün eri
- 5 Mâl ıssın söyledür 'Âşık meseldür söylenür Dilde 'ışkıdur didürden bana bu şi'r-i teri

13 Fâ'ilâtün Fâ'ilâtün Fâ'ilün

- 1 Sorma 'ışkında bana geçdügi cânân işleri Geçdi gamze hurdeler itdi o müjgân işleri
- 2 Bitmedi kapunda yaram dinmedi yaşum benüm Bitmez iş olmaz biter gerçi nice kan işleri
- 3 'Ârifâne sohbeti itsek gerek yârân ile Şem'-i pervîn ile gel gör bu gice yanışları
- 4 Bagrumı deldi bedende tîg-i gamzen yâresi Cânuma geçdi cigerde tîr-i hicrân işleri
- 5 Gitdügince girüye gitmekde 'Âşık devr-i çarh İlerü gelmez anunçün ehl-i 'irfân işleri

- 1 Âh kim bir serv-kad sevdüm yine adı 'Alî Vird idindüm anı teshîr itmege nâd-ı 'Alî
- 2 Dilde nâmun nakş idüp etrâfin itdüm dâg-ı 'ışk Vasluna irem mi diyü eyledüm remel-i 'Alî (28a)

- 3 Gel ki jeng-i intizâr ile mükedderdür gönül Ey gubâr-ı makdemün âyîne-i cân saykalı
- 4 Kadre irsem zülfüne bend olmak eylerdüm taleb Müstecâbü'd-da'vet olsam 'ışkun isterdüm velî
- 5 Hep yirinde çeşm ü ebrû kadd ü pehlû reng-i rû Sevmiyen ol hûbı 'Âşık yâ velîdür yâ velî

15

Mefâ'îlün Mefâ'îlün Mefâ'îlün

- 1 Ne açar var bana zahm-ı hadeng-i yârdan gayrı Ne aglar bulunur bu dîde-i bî-dârdan gayrı
- Döner yok üstüme nergiz duhân-ı âhdan özge Yanar yok hâlüme hîç âh-ı âteş-bârdan gayrı
- 3 Beni zindân-ı hicrâna salup habs eyledün şâhum Günâhum n'eydi bilsem sevdügüm ikrârdan gayrı
- 4 Hücûm itdi dile gam 'askeri dergâh-ı cânâna Varur feryâda kim ola figân u zârdan gayrı
- 5 Cihânda buldıgun cevri ana eylersin ey gerdûn Belâ-keş yok mı yoksa 'Âşık-ı gam-hârdan gayrı

16

Fe'ilâtün Fe'ilâtün Fe'ilün

- 1 Âl ile istedüm öpmek o 'ızârı alı Kızarup şermden oldı ruhı gül-şeftâli
- 2 Ser-i zülf ile gönül çıkmak olurdı başa Benleri fitneden ammâ ki degüldür hâlî
- Nûş-ı câm-ı mey ile gûş-ı ney-i dil-keşdür Bezm-i devrânun eger var ise dâdı dâlı

- 4 Delükanlulugın arturdı 'aceb hikmetdür Puhte olup meyün oldukça ziyâde sâli
- 5 Hattınun karaları görinür oldı 'Âşık Kıyılayı gör eyü gelmedi Kur'ân fâlı

17 Mefâ'îlün Mefâ'îlün Mefâ'îlün

- 1 Hevâ-yı vasl-ı pehlûsı nesîm-i zülf-i reyhânı Birisi hazz-ı cismânî gıdâdur biri rûhânî
- 2 Sürinür sâye-veş yanınca üftâde olup cânum Yürise serv-i âzâdum hırâmânî hırâmânî
- 3 Mahabbet ehli virmez zevk-i vasla şûr-ı hicrânun Semender nâr-ı sûzâna degişmez âb-ı hayvânı (28b)
- 4 Seherlerde kabûl olan du'âlar hakkı Allâhum İrişdür subh-ı rûz-ı vasl-ı yâre şâm-ı hicrânı
- 5 Çemende sâye-i şimşâd san nat'-ı pelengîdür Güzeller 'Âşıkâ 'ıyş itmek içün sâye sultânı

18 Mef'ûlü Fâ'ilâtü Mefâ''lü Fâ'ilün

- Rindân getürür ayagı sıngun çeri gibi
 Bekler surâhi yöreni meydân eri gibi
- 2 Kanda kızındı su gibi her dem döküp saçar 'Uşşâk hûnî tîginün alnı deri gibi
- 3 'Arz eyler agzına zer alup âfitâbdan Ol yâr-i zühre-rûya felek müşterî gibi
- 4 Kanı o dem ki mülk-i şehâdetde şâh olup Oklarun ola başda hümâ yünleri gibi
- 5 'Âşık iderse sîm ü zerin kim ki der-miyân

Pehlû-keş olur ol saneme hançeri gibi

19

Fe'ilâtün Fe'ilâtün Fe'ilûn

- Berf-mânend agarmış kara günlü sakalun Giceyi güne katup irdi şitâ-yı ecelün
- 2 Ey kemân-saht sen ebrûsı gamını çekdün Yâ hadeng-i müjesi hasreti mi bükdi belün
- 3 Esmesün hîç kavak yili başunda 'ar'ar Göklere degse başun irmez ayagına elün
- 4 Kakma şeyhün kapusın isteme himmet andan Kara başına tokınurdı emi olsa kelin
- 5 Vasf-ı la'linde olup tûtî-i gûyâ 'Âşık Hak budur kim şekerini çıkarursın gazelün

20

Fe'ilâtün Fe'ilâtün Fe'ilâtün Fe'ilün

- Bilünür 'âşık u agyâr işigünde ne şekk
 Ki dimişler sanemâ Ka'beyi merdâna mihek
- 2 Gördügi dilber ile 'âşık oyunın oynar Çok oldukca yaşı merdüm-i çeşm oldı bebek
- 3 Bu kadar dâg-ı cefâ şûr-ı sirişk andandur 'Işklar çokdur aramızda hak-ı nân u nemek
- 4 Bana besdür ruh-ı zîbâ ile gîsû-yı nigâr Bâgbânâ suya ur sen güli reyhânı ek (29a)
- 5 Katlanur cevrüne 'Âşık sen anı sanma tekîn Ana ümmîd virüp va'de-i ferdâyı ko tek

21

Mefâ'ilün Fe'ilâtün Mefâ'ilün Fe'ilün

- İletdi san'atı fenninde çün kemâle kaşun'Aceb mi başın eger egmese hilâle kaşun
- 2 Nezâre eylemek ister cemâl-i dil-keşüne Egildi tâk-ı cebînden olup havâle kaşun
- 3 İkisi bir yire baş çatdı yine kim bilsün Ne fitneye dürişür nice mekr ü âle kaşun
- 4 Hilâl pertev-i mihr ile mâh-ı bedr olur Fürûg-ı hüsnün ile irişür kemâle kaşun
- 5 Mu'anven oldı virelden berât-ı serdârı Kemîne 'Âşık-ı pür-derd ü pür-melâle kaşun

- 1 Çeşmimün agzında ıslanmazdı gerçi mercümek Nâfe-veş şimdi hayâl-i hâlün oldı merdümek
- Çarh agladur beni gark olur âhir yaşuma
 Bu meseldür dostum suda yatar sulu sinek
- 3 Gamzesiyle zülfi ucından ne gamlar çekdigüm Sorsa yâre 'arz iderdüm igneden iplige dek
- 4 Cennet-i kûyunla dîdârun durur maksûdumuz Virmek Allâhun hele bizden nigârâ istemek
- 5 Kalb-i düşmen bildirür 'ışkında hâliş oldugum Zer 'ayârına beli seng-i siyâh olur mihek
- 6 Hâle sanma mâhda hüsn ile ilzâm eyleyüp Gerdeni tavkı nigârun boynına asdı elek
- 7 Kaldı zulmetde saçun hattun kenâr itdi lîk Çekdi İskender emek Hızra nasîb oldı yemek

8 Kâf-ı istignâyı 'Âşık âşiyân idüp gönül Peşşe dimez püşte-i eflâke sîmurga sinek

23

Mefâ'îlün Mefâ'îlün Mefâ'îlün

- Elinden yir yüzünde çünki mûr incinmedi anun 'Aceb mi gökde tahtın yil götürdiyse Süleymânun
- 2 Şu resme virdi sahbâ ile sâkî zîb ü fer bezme Ki görse sabrı kalmazdı Süheyb ü Şeyh San'ânun (29b)
- Tolu sür 'ışk ehline içülsün dost-kâmiler Cihânda sâkîyâ sürülmedin mey gibi devrânun
- 4 Perî-rûlarla destünden komayup hâtem-i câmı Gönül devrinde 'ıyş u 'işret it Sultân Süleymânun
- 5 Kelâm-ı rûh-bahş-ı yâr-i cân-perver edâlarla Bize 'Âşık hikâyet itdi hâlin Cân-bin-cânun

24

- 1 Dinlemez çün cân kulagıyla figânın bülbülün Kulagına kurşun aksa jâleden tan mı gülün
- Niçe dil cânbâzı her târında cân per-tâb ider Câna kalmaz rîsmânîdür meger ki kâkülün
- 3 Gerçi kokdum gül gibi rûyun benâgûşun senün Cümle burnumdan getürdi yine hâl-i fülfülün
- 4 Neş'e-i mey gözüme câm-ı zücâcîden gelür Cilve-gâhıdur bu ev sırça serâyıdur mülün
- 5 Niçe bir cân u dil-i 'Âşıkda ceng ey tîg tîz Götürün gavgâyı bâri ortadan iki bölün

Fe'ilâtün Fe'ilâtün Fe'ilün

- 1 Lebüne benzemege goncede güftâr gerek Servde kaddüne öykünmege reftâr gerek
- 2 'Azm-i kûy-ı 'adem itdüm n'ideyim cân u dili Sâlik-i râh-ı Nebî yolda sebük-bâr gerek
- 3 Kişi zevk eylemege lezzet-i 'ışkı cândan Kendi pür-sıdk u safâ yârı cefâ-kâr gerek
- 4 Dûd-ı dil penbe-i dâg ile yeter dâg u kabâ 'Işk abdâlına ne câme ne destâr gerek
- 5 'Âşıkâ tâze cünun u yeni cânânun var Yine mecmû'a-i 'ışka bize astâr gerek

26 Mef'ûlü Fâ'ilâtü Mefâ'îlü Fâ'ilün

- 1 Gelse nigâr ayaguna başdan şarâba çek Def'-i hicâb eyle su'âl u cevâba çek
- Dök karşusında akça yirine sirişküni İtdükleri cefâları bir bir hesâba çek
- 3 Kadd-i nigâr gibi bülend eyle himmetün Âhun 'alemlerin felek-i nüh-kıbâba çek (30a)
- 4 Germi fürûşa kesb-i takarrüb murâd ise Deyr-i mugâneye niçe yıllar kırâba çek
- 5 Feth-i tılısm genc-i bekâ 'Âşık andadur Yab yab raht u bahtunı künc-i harâba çek

27 Fâ'ilâtün Fâ'ilâtün Fâ'ilün

1 Ey gül-i bâg-ı İrem mest-i 'araknâk-ı gülün Lâle-i gülzâr-ı cennetde 'ızâr-ı sünbülün

- 2 Ol 'arakdan cur'a irüp mest olup eyler figân Gül şarâbı neş'esinden sanma cûşân bülbülün
- 3 Yâ Resûla'l-lâh ruhun subh-ı tecellî mihridür Leyle-i Mi'râca zulmetdür sevâd-ı kâkülün
- 4 'Arş cevlân-gâhıdur meydân semend-i seyrine Ey Burâk-ı kurbetine kabe kavseyn öndülün
- 5 Ehl-i beyt işügine evden gelem dirsen eger Gerd-i mîhin kuhl-ı merdüm eyle 'Âşık Düldülün

28 Fâ'ilâtün Fâ'ilâtün Fâ'ilün

- 1 Her tolusi bedr olur her cur'asıdur bir hilâl Bezmine cânlar virür ol âfitâbun ehl-i hâl
- 2 Ger günâh ise mahabbet dostum kanum sebîl Cürm ise vaslun temennâsı begüm katlüm helâl
- 3 Bir yabana atdıgun tırnagına degmez senün Kangı kec-râdur diyen kim kaşuna benzer hilâl
- 4 Gitdi başdan 'akl u dilden sabr u elden ihtiyâr Kaldı cismüm haste cânum nâ-tüvân dil bî-mecâl
- Kellimînî yâ humeyrâ⁵⁷ zevk-i la'lündür dile 5 Câna zülfünden irer bûy-1 *erihnî yâ Bilâl*⁵⁸
- 'Âşık-ı üftâdeden 'âr itme kim derd ü gamun 6 Anı bir şekl itdi ki görsen dahi bilmek muhâl

29 Fâ'ilâtün Fâ'ilâtün Fâ'ilün

1 Yok binâ-yı 'ışka seyl-i pend-i nâsıhdan halel

⁵⁷ Ey Humeyra, benimle konuş! ⁵⁸ Ey Bilâl beni rahatlat! Tirmizî, Salat 126.

Kim ana seng-i melâmetle urılmışdur temel

- 2 Rûh-ı hayvânîye dâg-ı 'ışkdur hayrü'l-halef La'lün efkârı gıdâ-yı rûhadur ni'me'l-bedel
- 3 Söylenen her bezmde destân-ı 'ışkumdur benüm Bana urılan melâmet sengidür darb-ı mesel (30b)
- 4 Bunca müddetler ki yandum haste künc-i hecrde Gelmedi kimse 'ıyâdet itmege illâ ecel
- 5 Karşuna şükrâne cânı tenden âzâd ideyin İntizârun 'Âşıkı öldürmeden rahm eyle gel

30

Fâ'ilâtün Fâ'ilâtün Fâ'ilün

- Evc-i burc-ı nâzda peydâ olaldan bedr-i tâm Bildi mâh eksüklügin bedrün işi oldı temâm
- 2 Hâle-i dâm-ı nücûmı dâne itmiş âsumân Sayda kasd itmiş seni benzer eyâ kebk-i hırâm
- 3 Mâh-ı tâbân ile gögsin görmez olmışdur felek Yir yüzinde gün gibi peydâ olaldan bedr-i tâm
- 4 Kimseye baş egmemek ister o serv-i ser-firâz Anun içün 'Âşık-ı üftâdeye virmez selâm
- 5 Tev'emân iki karındaşdur sirişk ü hûn-ı dil İki kardeş kanıdur meyle o la'l-i lâle-fâm

31

Fâ'ilâtün Mefâ'ilün Fâ'ilün

- Dilde 'ışkunla dâg yandurdum
 Yine ben bir çerâg uyandurdum
- 2 Yâr sevmez dimiş beni cândan Cân virüp yolına inandurdum

- 3 Hecr ile çökmiş idi hâne-i dil Tîr-i yâr irişüp tayandurdum
- 4 Şemmesin nakd-i cân ile aldum Zülf-i yâri 'aceb tolandurdum
- 5 Medh idüp şekkerîn lebin 'Âşık Tûtînün agzını sulandurdum

32 Fe'ilâtün Fe'ilâtün Fe'ilâtün Fe'ilün

- 1 Hat belürse n'ola ol lâle-'ızârumda benüm Sebze-i ter yaraşur tâze bahârumda benüm
- Öldüm ol servün ayagına yüzüm süremedüm Serv dikün başum ucında mezârumda benüm
- 3 Sûzen-i gamzelerün itdi ser-â-ser pür-zahm Yir yok igne basacak cism-i figârumda benüm
- 4 Sû-be-sû cûlar olup oldı gözüm yaşı revân Görmedüm servümi bir lahza kenârumda benüm (31a)
- 5 Nakş-ı bî-cân gibi hayrân kala 'Âşık Mânî Görse bu anı eger nakş-ı nigârumda benüm

33 Fe'ilâtün Fe'ilâtün Fe'ilün

- Bir nazar kılsa bana ger o meh-i çâr-dehüm Mâh-ı nev tarf-ı felekde ola tarf-ı külehüm
- 2 Kimseye egmez idüm başı gönül 'âlemde Eger olsa kaşı mihrâbı benüm secde-gehüm
- 3 Topragum sürme ola çeşm-i ulu'l-ebsâra Dise cânâne bu pâ-mâl-i gama gerd-i rehüm

- 4 Yanmışuz mihrün ile lutf idüp sâye gibi Yirlere çalma bizi hay begüm pâdişehüm
- 5 Koma erbâb-ı fenâ yolını elden 'Âşık Rahima'llâhu li'abdin seleke meslekehum⁵⁹

34

Fâ'ilâtün Fâ'ilâtün Fâ'ilün

- 1 Şem' gibi dilde dâg u başda âteş gözde nem Şâm-ı hecrün subhı yok ki nâr-ı gamdan dinlenem
- 2 Seyr-i gülşende surûd-ı neyle herkes pür-tarab Pür-hazân-ı harîk feryâd-ı dilden n'eyleyem
- 3 Devletünde kişver-i 'ışkı müsahhar eyleyüp Eşkümi subaşım'itdi âhumı mîr-i 'alem
- 4 Onmaduk başumda yâ bu kara yazular nedür Kankı Mecnûndur diyen dîvâneye yokdur kalem
- Nâle kılsa gökde Zühre yirde kûh-ı Bî-sütûn 'Âşıka dem-sâz olup âheng iderler zîr ü bem

35

Mef'ûlü Fâ'ilâtü Mefâ'îlü Fâ'ilün

- 1 Sürdüm şu denlü reh-güzer-i esbüne yüzüm Ebrum nakşını gören anlar nişân-ı sümm
- Zülfün gamıyla hâlümi anlar şu kimse kim Der-bend içinde kala şeb ire reh ide güm
- 3 Dil tîg-i gamze küştesidür çîn idüp kaşun Terk eyle yaykarayı begüm bir olur ölüm
- 4 Pâ-bend-i ahmakdan idüp sûfî rîşini İtdi har-ı riyâya ridâsını pâldüm

⁵⁹ Onların yolundan giden kula Allah rahmet etsin!

5 Hâlî gamın unut hatı irişdi 'Âşıkâ Hâb-ı ecel irişdi meges virmez üştülüm

36 Fâ'ilâtün Fâ'ilâtün Fâ'ilün

- 1 Kûh-ı endûh-ı 'ınâdur görinen baş degül Ebr-i bârân-ı belâdur karadan kaş degül
- 2 Ko elünden leb-i câm agzuna düşmez sûfî Mey-i gülgûn didigün sen yiyecek aş degül
- 3 Bir el önürdi 'adem deştine götürdi ayaà Gördi Mecnûn bana 'ışkunda ayakdaş degül
- 4 Cân eridür şeb-i zülfünde yanan 'âşıklar Gözlerinden bu revân olup akan yaş degül
- 5 Gerd-i râhunla cilâ vireli 'Âşık gözine Künbed-i çarh ana dâne-i haşhâş degül

37 Mef'ûlü Fâ'ilâtü Mefâ'îlü Fâ'ilün

- Göster yüzün ki matla'-ı mihr-i vefâdur ol Âyîne-i cemâl-nümâ-yı Hudâdur ol
- 2 Taşlarla sînemi dögerem kim görürse dir Bir seng-dil mahabbetine mübtelâdur ol
- 3 Ka'b'örtüsi dir ehl-i nazar gerçi zülfüne Hey nice Ka'be örtisi dâm-ı belâdur ol
- 4 Bilmez kimesne kıymetüni bu zemânede Deryâ-yı ma'rifetde gerekse dilâdur ol
- 5 Hâşâ ki 'Âşık eyliye senden recâ-yı vasl Ey şâh kendi haddini bilür gedâdur ol

Mefâ'îlün Mefâ'îlün Mefâ'îlün

- Gönül ma'mûre-i genc-i hayâl-i hüsn-i cânân ol Degül gam sûretâ derd ü gam-ı 'ışk ile vîrân ol
- 2 Sürinsün der peyünce sâye-veş üftâde 'âşıklar Benüm serv-i revânum sûy-ı gülzâre hırâmân ol
- 3 Beni Ya'kûb-veş beytü'l hazende ko melûl u zâr Yüri ey Yûsuf-ı gül-çehre var sen Mısra sultân ol
- 4 İrer her bed-güherden tîşe-i derd ü gam u endûh Gerekse ma'rifetle sen gönül ma'den gerek kân ol (32a)
- 5 Dimişler kim ferâgat itdi 'ışk u meşkden 'Âşık Gelüp gonce-dehenler nâz ile dimişler andan ol

39 Fâ'ilâtün Fâ'ilâtün Fâ'ilün

- Baht uyansun çeşm-i mestün hâbdan bî-dâr kıl Göz yumup açınca bâg-ı dehri nergis-zâr kıl
- 2 Tâ ki hurrem-bâl u mâl-â-mâl ide şehd-i şifâ Hâne-i zenbûr gibi sîneni efgâr kıl
- Gözi açıklardan olam dir isen 'ışk ehlinün Gerdini kuhl-ı cilâ-yı dîde-i pindâr kıl
- 4 Oyna ezgiye ki dem-sâz ide mızrâb-ı kaza Çeng-i teslîm-i zimâm-ı ihtiyârı târ kıl
- 5 Bu vücûd-ı müste'ârı bir libâs-ı bezledür Mest-i câm-ı müste'âr olmakdan âhir 'âr kıl
- War idüp yokdan cihânı cân viren Hakkı meded 'Âşıka bir bûse agzundan ne var ikrâr kıl

40

- 1 'Anberîne kıl saçundan boynuna pîrâye sal Hâle-i müşgîn-i gerd-i mâh-ı dehr-ârâya sal
- Öldügümden sonra da şâh-ı şehîdân olayum Ey hümâ bir kez mezârum üstine gel sâye sal
- 3 Gulgulundan tabl-veş âhir tehî olur felek Şimdi ger kûsun hurûşın kubbe-i mînâya sal
- 4 Gün bu gündür biz bu günümüz komazuz yarına Zâhid ibnü'l -vaktdür vâ'iz anı ferdâya sal
- 5 Saldı çün seccâde 'Aşık zülfi bahr-i eşküne Hırka-ı sâlûsi var şimden girü deryâya sal

41

Mefâ'îlün Mefâ'îlün Mefâ'îlün

- 1 Cihân seyl-i fenâ yolında bî-bünyâdmış bildüm Zemân-ı Nûhdan kalmış harâb-âbâdmış bildüm
- 2 Felekden nâlede ney 'asr elinden zâr ney-şekker Cihânun dâd u dâli dâdmış feryâdmış bildüm
- 3 Habâb-âsâ esâsı yogimiş evreng-i şâhînün Eger taht-ı Süleymân ise de ber-bâdmış bildüm
- 4 Öninde girye-i tıfl u sonında şîven-i mâtem Öni sonı cihânun girye vü feryâdmış bildüm (32b)
- 5 Götürdi ka'beteyn-i cân u dille nakş-ı 'ışk u derd Muhabbet şeşderinde 'Âşıkı nerrâdmış bildüm

42

Mefâ'îlün Mefâ'îlün Mefâ'îlün

Nesîm-i 'ışk ile deryâ gibi ben çünki cûş itdüm Niçe leffâf-ı ehl-i kâli cû gibi hamûş itdüm

- 2 Lebün vasfında tûmârum idüp ta'vîz-i sâk-ı 'arş Dür-i şehvâr-ı şi'rüm kurta-ı gûş-ı sürûş itdüm
- 3 Ecel peygâmın iblâg itdi çünki peyk-i peykânun Savup cân u dili halvet-serây-ı kalbi boş itdüm
- 4 Ten-i çâküm tonatdı penbe-i dâg u fetîl-i zahm Gören sanur gönül abdâlını peşmîne-pûş itdüm
- Degüldür gûş-vâr jâle gûş-ı gülde ey 'Âşık Ögüp hüsnün güli bir bende-i halka be-gûş itdüm

43

Fâ'ilâtün Fâ'ilâtün Fâ'ilün

- 1 Her gören bir dem ferah yellerle gam-nâk oldugum Gussa vü şâdî gamından bildi bî-bâk oldugum
- Hey öninde öldügüm yolında kurbân oldugum
 Dâmen-efşân olma kapunda görüp hâk oldugum
- 3 Lâle-veş dâg-ı dilüm mihrünle eyler âşikâr Tîg-i şevk ile seher gül gibi sad-çâk oldugum
- 4 Dest-bûsun el virüp irem mi ola ol deme Ser-firâz olup yanunda sayd-ı fitrâk oldugum
- 5 Mihr-i 'ışkun feyzi birdür hikmet isti'dâdıdur Tanlama a'dâya zehr-i ahbâba tiryâk oldugum
- 6 Bahr-ı şûr-ı pür-nemekdür 'ışk ana düşmemledür Mâsivâ âlâyişinden 'Âşıkâ pâk oldugum

44

- İtlerün yâr u enîsüm âsitânun meskenümDevletünde şimdi şâhum begligüm vardur benüm
- 2 Saglıgumda kon beni hâlüme kan aglayayum

Bir garîbem mâtemüm idüp kılayum şîvenüm

- Cism-i 'uryân âteş-i 'ışka semender olalı
 Oldı oddan gönlek egnümde benüm pîrâhenüm
- 4 Künc-i gam tîr ü fetîl zahm u dâg-ı sînedür Bag u râgum serv-i şimşâdum gül ile sûsenüm (33a)
- 5 'Âşıkâ dâmânına yüz sürmege yok dest-res Âsitânında meger anun gubâr ola tenüm

45

Mef'ûlü Fâ'ilâtü Mefâ'îlü Fâ'ilün

- Göz merdümi benünden alur renk iki gözüm Meşhûrdur üzüme göre kararur üzüm
- İtdüm yolunda karşı ruhum basmadun kadem İller içinde yirlere düşdi benüm yüzüm
- 3 Cild ide hâfiz ana revâk-ı revânını Vasf-ı lebünde ger ura şîrâze her çözüm
- 4 Ortada güm dinilse miyânı belî dirüm Yokdur dehân-ı yâre gelicek benüm sözüm
- 5 Görse ten-i hilâlüm ider 'av'avın füzûn Barışmadı segünle sitâremde yıldızum
- 6 Şöyle tozıtdı hâkümi zülfün hevâsı kim Bin yıl yelerse bâd-ı sabâ görmeye tozum
- 7 'Âşık gibi gubârun ider midi tûtiyâGörmedük olsa ehl-i nazar olmasa gözüm

46

Mefâ'îlün Mefâ'îlün Mefâ'îlün

Geçüp tenden letâfet kesb idüp 'ışkunla cân oldum Anunçün çeşm-i insândan perî gibi nihân oldum

- 2 Dehânında güm oldı cân gönül zülfinde yol azdı Tecerrüd 'âlemine ben tek ü tenhâ revân oldum
- 3 Cemâlün feyz-bahş ise celâlün hayret-efzâdur Anunçün 'ayb-dânî iken bu resme bî-zebân oldum
- 4 Yük iken boynuma başdan vücûdum minnetin tîgün Alup üstine ser-ber kendüme bâr-ı girân oldum
- 5 Lebün yâdiyle sırr-ı 'ışkı rûh-efzâ edâ itdüm Dem-i 'Îsâya hem-dem sırr-ı kudse tercemân oldum
- 6 Sirişk-i al u rûy-ı zerd ile destâr-ı sebz ile Mahabbet bâgına 'Âşık emîr-i 'âşıkân oldum

47 Mefâ'îlün Mefâ'îlün Mefâ'îlün

- Figân kim dest-i mihnetden alınmadı girîbânum Dirîgâ kim ilişdi kaldı hâr-ı hicre dâmânum
- 2 Dirîgâ ben gedâ-yı nâ-tüvân ol şâh-ı 'âlemdür Bülend eyvânına irmez kemend-i âh u efgânum (33b)
- Belâ-yı fakr ile ben agladukca çeşm-i gam-dîdem Pür eyler rahm idüp bana dür ü gevherle dâmânum
- 4 Gehî gamzenle bîmâr olana handenle tîmâr it Yazıkdur kullara kıyma igende hey güzel hânum
- 5 Görinen 'Âşıkâ sanma şafakdur âsuman üzre Beni zulmiyle öldürdi düşüpdür boynuna kanum

48 Fâ'ilâtün Fâ'ilâtün Fâ'ilâtün Fâ'ilün

1 La'lüne hattuna hatt reyhânı yazmışdur temam Hâl-i Hızr u çeşme-i hayvânı yazmışdur temâm

- 2 Bir şebistândur saçun etrâfına sebz ile hatt Hâşiye idüp Nigâristânı yazmışdur temâm
- 3 Âferîn üstâdına ki devr-i câm-ı la'lüne Dâstân-ı devr-i kavm-i cânî yazmışdur temâm
- 4 Kaşlarından iki bismillahı ser-meşk eyleyüp Sûre-i Nemli hat-ı reyhânı yazmışdur temâm
- 5 Dilde 'Âşık fikr-i hattun nakş kılmış gûyiyâ Cevher-i ferd üstine Kur'ânı yazmışdur temâm

49

Fe'ilâtün Mefâ'ilün Fe'ilün

- Seni öldürmek istese cânân
 Eyle şükrâne cânunı kurbân
- İhtiyâr eyledüm gedâlugınıBana ta'n eylemen gönül sultân
- 3 Ursa çengâl Hindû-yı zülfiBî-mecâl olur idi pîl-i demân
- 4 Ma'kal-ı hatt ile hatun vasfın Yazdı evrâk-ı bâgda reyhân
- 5 Cism-i vîrândadur defîne-i 'ışk Dâg yetmez mi 'Âşık ana nişân

50

- 1 Heykel-i rûh-ı musavver oldı gûyâ ol dehân Hatt-ı reyhân ile yâkût ana yazmış hırz-ı cân
- 2 Altûn igneyle çıkarmak kasd idüp dilber gözüm Eylemiş peykân-ı tîr-i cân-sitânın zer-nişân
- 3 Öldürüp agyârı reşk ile beni itdün helâk

İtdün ey hûnî yine bir demde kan üstine kan (34a)

- 4 Serv-i bâga ceyş-i ezhârun hücûmın bildirüp Lâle sanma yir yir âteşler yakupdur bâgbân
- 5 Dikdi zülfün dilde sancak urdı gamzen câna zahm 'Âşıka şimden gerü kıyma emân dilber emân

51 Mef'ûlü Fâ'ilâtü Mefâ'îlü Fâ'ilün

- Besdür sirişk-i çeşm ile dâg-ı şerer-feşânDa'vâya ma'ni lâzım ise 'âşıka nişân
- Şemşîr-i yâr belde durur bir harâmîdür Kurtulmaz anda eylemeyen varı der-miyân
- 3 Kuhsâr-ı serde dîde-i giryânlarum görüp Dilber didi *hunâlike 'aynâni tecriyân*⁶⁰
- 4 Pehlûya çekmek olur idi tîg-i dilberi Hançer araya girüp ana basmasaydı yan
- 5 Feth itmeyen tılısm-ı vücûdını 'Âşıkâ Bulmaz visâl-i yâre irüp Genc-i Şây-gân

- 1 Kabrüm üstinde olup her sebze gûyâ bir zebân Ehl-i derde hâl diliyle ider hâlüm beyân
- 2 Ben şehîd-i tîg-i 'ışk oldıguma şâhid yeter Lâleler kanlu kefenlerle mezârumda 'ıyân
- 3 Dostlar sûsen degüldür kabrüm üzre görinen Sîneme hançerler urmışdur sipihr-i bî-emân
- 4 Çıkdı yakdı sînemün sûz-ı giyâhı kabrümi

⁶⁰ Orada cennetlerden akan iki kaynak vardır. Rahman 50.

Yoksa itmez kabr-i 'uşşâka zarar bâd-ı hazân

- 5 Bir du'â eyle yolun düşerse ey 'Îsâ-nefes Dâg-ı hasretdür mezârumda olan yir yir nişân
- 6 Zâhir olup mu'ciz-i 'Îsâ bulur cân mürdeler Ol kıyâmet serv-kâmet olsa bu suya revân
- 7 Kangı gülşenden güzer ide diyü sen serv-kad Kabrümün nergisleri etrâfa olmış dîde-bân
- 8 Hâşeli'llâh kim gam-ı 'ışkun ile cân viren ola Belki ey 'Îsâ-dehen bulur hayât-ı câvidân
- 9 Şâddur rûhı mekânı şübhesiz firdevsdür Yoluna 'Âşık çü kurbân eyledi rûh itdi revân (34b)

53 Mefâ'îlün Mefâ'îlün Mefâ'îlün

- Niçe demdür ölümlük dirilür bir derd-nâkem ben Beni kor öldürürsin gayriyi ana helâkem ben
- 2 Gubârum irgüren dâmânuna 'ışkun hevâsıdur Benüm yolında toprak oldıgum yoksa ne hâkem ben
- 3 Fetîlüm penbe-i hûnîn-i dâgumdur şafak gibi Çerâgı subh-ı sâdıkdan yakar bir sîne-çâkem ben
- 4 Has u hâr-ı sivâ vü seyl-i a'dâ cîfe-i dünyâ Keder virmez bana bir bahr-ı bî-pâyân-ı pâkem ben
- 5 Gören hâmem sanur kaknûs minkârıdur ey 'Âşık Sözüm odlar saçar âfâka şöyle sûz-nâkem ben

54 Mef'ûlü Fâ'ilâtü Mefâ'îlü Fâ'ilün

Ölmekden özge çâre mi var derd-i yârdan Âsân ne ola 'âşıka terk-i diyârdan

- 2 Ben âdemem hevân ile cûş eylesem n'ola Deryâ temevvüc eyler imiş rûzgârdan
- 3 Yâreye ibrîşîm götürmezdi dil ezel Deng oldı şimdi bâr-ı gam-ı zülf-i yârdan
- 4 Reşk-i kadünle sînesine çekdi bin elif Emvâc zâhir oldı sanurlar bihârdan
- 5 Gördi ki fehm olınmadı 'Âşık rümûz-ı 'ışk Cedvel kitâbda kıyı çizdi kenârdan

55 Fâ'ilâtün Fâ'ilâtün Fâ'ilün

- Haymen etrâfin dil artık devr ider câsûsdanTaşra kalmış sanki bir pervânedür fânûsdan
- 2 Haste-i 'ışkı uşandursa hayâl-i hâl-i dost 'Aks-i zülf olur meges-rân şehper-i tâvûsdan
- 3 Bâ-yı ma'kûsıdur ebrûsı yazılmış rûyda Şekl gösterdi mir'ât-ı ruh ol ma'kûsdan
- 4 Kûşe-i kûy-ı harâbât u şikest olmış sifâl Yegdür iklîm-i Kubâd Evreng-i Keykâvûsdan
- 5 Cây-ı emn ey dil melâmet kûyıdur irmez ana Geçmeyen der-bend-i nâm u varta-i nâmûsdan
- 6 Umaram hâkisterümden ide bir 'âşık zuhûr Olmayam gayretde eksük 'Âşıkâ kaknûsdan (35a)

56 Mef'ûlü Fâ'ilâtü Mefâ'îlü Fâ'ilün

1 Terk it bekâ hevâsını bu nüh-kıbâbdan Kıl i'tibâr câm-ı mey üzre habâbdan

- 2 Bir pence vü tâb olsa 'ızârunda n'ola zülf Mû-penç ü tâb-bîn olur âteşde tâbdan
- 3 Âyât-ı hüsni keşf ide tefsîr-i hat meger Esrâr-ı 'ışk yoksa bilinmez kitâbdan
- 4 Sırr-ı cemâl u zevk-i lebün eyleyüp gönül Geçdi şarâbdan gözini yumdı h*â*bdan
- 5 Didüm zekât-i hüsnüni vir 'Âşıka didi Olmaz nasîb âl-i Resûle nisâbdan

57 Fe'ilâtün Fe'ilâtün Fe'ilûn

- Günde bin kez ölürem firkat-ı cânân ile ben Ey ecel ölmek ile kurtaramazsın beni sen
- 2 Nâle-i bülbül ile sahn-ı çemen pür oldı Tutdı pîrâmen-i serv-i çemen-i zâg u zegan
- 3 İşiginde tozumuz hâtırına virdi gubâr Ber-taraf eyle sabâ bizi götür toprakdan
- 4 Çeng-veş kaddümi ham itmegi kânûn itdün Dögeyüm def gibi sînem diyeyüm vây be-men
- 5 Sînede âteş-i 'ışk ile yanan dâglarum 'Âşıkâ her biri mihrine delîl-i rûşen

58 Mefâ'îlün Mefâ'îlün Mefâ'îlün

- 1 Ta'accüb itme bu dünyâda zâhid baş u cân terkin Göresin anda da dîdâr olmazsa cinân terkin
- Nişânı gerçi yokdur nâmı âfâkı pür itmişdür Gönül 'ankâyı bul ta'lîm kıl nâm u nişân terkin
- 3 Biz ol tecrîd -i merdüz bî-ser ü sâmân cihân içre

- Bulup bir yâr-ı cânı eyledük iki cihân terkin
- 4 Dilersen mülk-i 'ışkun tâc-dârı serveri olmak Ser-i tecrîd-i istignâya tâc it cism ü cân terkin
- Fenâ deştinde ey 'Âşık bekâ saydına kasd eyle Sakın terkiye asma yalınuz kevn ü mekân terkin

59

Mefâ'îlün Mefâ'îlün Mefâ'îlün

- 1 Murâdum mîvesi bitmez ne hâsıl nev-bahârumdan Vefâdan şemme yok andan ne bitdi lâle-zârumdan (35b)
- 2 Ne toz kopardı bâd-ı âh kim eşk itmese teskîn Felekler raks iderdi gird-bâd-âsâ gubârumdan
- 3 Bana yolumda ölmezsin didi gayretden öldüm ben Eger yarılsa yir yire girerdüm şerm ü 'ârumdan
- 4 Belâ künci vü derd-i 'ışk u zârı mihnet ü gamdur Sorarsan hânumân u mülk ü mâl kâr u bârumdan
- 5 Gam-ı cevriyle 'Âşık hâk olursam reh-güzârında Okına kıssa-ı Mihr ü Vefâ levh-i mezârumdan

60

- 1 Cism-i sad-çâküm görinmez oldı yâre yâreden Yaradupdur yaradan ben zârı benzer yâreden
- 2 Keştî-i cânı salup deryâ-yı 'ışka şimdi dil Sâhil-i zülfe çıkup âlet onarur karadan
- 3 Sana hercâyî disem tan mı ki gördüm ben seni Her şikest içre bu mir'ât-ı dil-i sad-pâreden
- 4 'Aks-i şem' ü şâhid ile câm-ı pür-mey pür-habâb Fârig itdi bezmümüz mihr ü meh ü seyyâreden

- 5 Döymiye peykân-ı 'ışk u tîşe-i derd ü gama Ten olup pûlâddan cân olsa seng-i hâreden
- 6 Tutmaga 'Âşık seg-i kûyı dehânın cân u dil 'Ârifâne virdiler cismi çıkarup aradan

61 Fâ'ilâtün Fâ'ilâtün Fâ'ilün

- 1 Küşte-i gamze tutupdur kûy-ı cânân yolların Bir celâlîdür ki çeşmi kesdi sultân yolların
- 2 Çîn ü Mâçîni kesâda virdi bûy-ı kâkülün Sürme-i gerd-i rehün kesdi Sıfâhân yolların
- 3 Şöyle benzer yâr sûy-ı gülşene eyler hırâm Servler saf baglayup tutmış gülistân yolların
- 4 Çekmeyen hattun gamın irmez leb-i nûşînüne Hızr ile buldı Sikender âb-ı hayvân yolların
- 5 Ol kul oglı 'Âşıkâ şol denlü itdi cevri kim Ehl-i 'ışkun dâd-h*â*hı tutdı dîvân yolların

- 1 Cûşum andum 'ışk ile girdâb dönderdi yüzin Bahse çekdüm nâlede dolâb dönderdi yüzin (36a)
- Na'lçen mihrâb idindi âsitânun secde-gâh Âsumândan mihr-i 'âlem-tâb dönderdi yüzin
- 3 'Asker-i hâb iricek çeşme şebîhun kasdına Çıkdı ceyş-i eşk-i pür-hûn-âb dönderdi yüzin
- 4 Tâk-ı ebrûn eyleyüp fârîg salât u kıbleden Her imâmun nitekim mihrâb dönderdi yüzin

- 5 İki yüzlü olma mânend-i gül-i nesrîn didüm Ver-hem idüp ol gül-i sîr-âb dönderdi yüzin
- 6 Geldi gerçi cism-i sad-çâke çalındı pâreye Üstühânda tîg-i âteş-tâb dönderdi yüzin
- 7 Üzül eksik göreyüm didüm rakîb-i nâ-kese 'Âşıkâ ol düşmene ahbâb dönderdi yüzin

Fâ'ilâtün Fâ'ilâtün Fâ'ilün

- Zülfünün bâd-ı sabâ görmeye tozın karasın Yel yöpük olup gerek Çîn ü Hıtâyı arasın
- 2 Yâr müstagnî benüm derdümden anun derdi yok Derdi sen virdün İlâhî yine sen kıl çâresin
- 3 Eşk-i hûn-rîzini Ferhâd al ibirîşim idüp Sûzen-i tîşeyle kûhun dikdi bagrı yâresin
- 4 Vâdî-i mihnetde yir yir lâle-i hasret bite Öldürüp şol dem ki kanum kara yire karasın
- 5 Cenge düşdi hançerünçün birbiriyle cân-ı dil Tîgüni gönder gelüp kessün nigârâ arasın
- 6 Bana düşnâm eyleyüp şâyed revânum şâd ide Reh-güzâr-ı yârda eylen dil-i bî-mâresin
- 7 Bezm-i gamda oynadur destinde bir elma gibi Dûd-ı âhum dehr-i dûnun künbed-i devvâresin
- 8 Âh-ı 'Âşık âh kim kâr eylemez hergiz sana Ey dil-i dildâr sen benzer ki seng-i hâresin

64

Fâ'ilâtün Fâ'ilâtün Fâ'ilün

1 Jâledür dimiş dür-i dendânun ey gonce-dehen

- Gonceye incinme ana agzına oldur düşen
- 2 Dûd-ı âhum her gice âfâkı deycûr itmese Yanmaz idi kubbe-i gerdûnda kandîl-i peren
- 3 Kime boynum uzadam koyup kemend-i zülfüni Ey perî kime varup agız egem sen var iken (36b)
- 4 Şol kadar peykânlar urmışdur ten-i sad-çâküme Kim gören sanur beni giydüm bir âhen pîrehen
- 5 Kılıc ile almasaydı ten hisârın şâh-ı 'ışk Kanlu başlar tolmaz idi 'Âşıkâ burc-ı beden

Mefâ'ilün Fe'ilâtün Mefâ'ilün Fe'ilün

- 1 Fünûn-ı 'ışk ile dil oldı *zû-fünûn-ı cünûn* Tabîb n'ola cünûn dirse *el-cünûn-ı fünûn*
- 2 Sirişk ü âh beni mîr-i 'âşıkân itdi Sipihr-i bukelamûn geçdi reng-i gûnâ-gûn
- 3 Denî vü siflenün üstine böyle dönmezdi Gönül bir gerdiş-i gerdûn olmasa ger dûn
- 4 Tılısm-ı şi'r açılup genc-i 'ışk olalı 'ayân Utandı yirlere geçdi defîne-i Kârûn
- 5 Akıtdı penbe-i dâg ile eşkin agzına su Ecel çü 'Âşık'ı künc-i belâda gördi zebûn

66

Mefâ'îlün Mefâ'îlün Mefâ'îlün

- 1 Tevakkuf idelüm hammâmdan cânânımız çıksun Kayırmaz intizâr ile ölürsek cânımuz çıksun
- 2 Şebîhûn itmek ister h*â*b geldi merdüm-i çeşme Sımaga anı eşk-i dîde-i giryânumuz çıksun

- 3 Tururlar sâye-i dîvârlarda muntazır 'uşşâk Sehâb-ı hâneden tâ mihr-i nûr-efşânumuz çıksun
- 4 Seher çâk-ı girîbân idelüm şevk ile gül gibi Lihâf-ı sebzeden tek gonce-i handânumuz çıksun
- 5 Ölicek kabrümüz etrâfını zeyn itmege 'Âşık Duhânî lâle-veş dûd-ı dil-i sûzânumuz çıksun

Mefâ'îlün Mefâ'îlün Mefâ'îlün

- İlâhî dâg-ı 'ışkun isterüm dilde çerâg olsunBu kül öksüzi anunla uyansun od ocâg olsun
- Ölicek zeyn idün nergisle gülle kabrüm etrâfınO servün reh-güzârından yana tâ göz kulag olsun
- 3 Tecellî-i cemâl-i dilbere hep cilve-gâh olsun Ser-â-ser cân u dil âyîne-âsâ dâg dâg olsun
- 4 Sunup bir câm-ı zehr-âlûd-ı hecri telh-kâm itdi Lebünden dâdumı alur benüm hünkâr sag olsun (37a)
- 5 Belâ kûhına saldı berg-veş bâd-ı hazân-ı gam Bahâr-ı hüsnüni 'arz it ana tag üsti bâg olsun
- 6 Yürürken fârig ü âzâde vü âsûde ey 'Âşık Bir özge derde düşdüm işidenlerden ırag olsun

68

Fe'ilâtün Fe'ilâtün Fe'ilün

- 1 Bir agız dimedi ben hasteye tîmâr olsun Agzınun zerrece yok mihri hemîn var olsun
- 2 Her ki Mansûr gibi zülfüne ber-dâr oldı Şühedâ hayline mahşerde 'alemdâr olsun

- 3 'Işk isbâtına besdür iki 'âdil şâhid Sûz-ı âh ile hemân hâlet-i eş'âr olsun
- 4 'Işk tarhânlarıyuz olmaz o yükde bize bac Sûfî alsun gam ile zühdi 'amel-dâr olsun
- 5 Direm ey mâh cihân içre nazîrün yokdur Didi ahsente bih⁶¹ 'Âşık nazarun varolsun

Mefâ'îlün Mefâ'îlün Mefâ'îlün

- 1 İlâhî isterüm gözde gönülde eşk ü âh olsun Hemîşe münkir-i 'ışka iki sâdık güvâh olsun
- 2 Hevâ-dârum benüm âhumdur ancak gitmesün benden Elifle âh ile cismüm ser-â-ser âh âh olsun
- 3 N'ola ol şâha bende oldı ise gönül sultane Bizi terk itdi çün varsun başına pâdişâh olsun
- 4 Elifler kes bedende ac gönül mülkin kılıcunla Açılsun deşt-i gam 'ışk illerine şâh-râh olsun
- 5 Ne gam bârân gibi yagarsa tîr-i ta'n ey 'Âşık Bana tek sâye-i serv-i hırâmânum penâh olsun

70

Mef'ûlü Fâ'ilâtü Mefâ'îlü Fâ'ilün

- 1 Her zerrenün çü behresi var âfitâbdan Arzun nasîbi cür'a-i câm-ı şarâbdan
- 2 Bâd oldı zinde nefh-i dem-i nev-bahârla Hâk itdi hande reşha-i feyz-i sehâbdan
- 3 İrse 'aceb mi bendeye de lutf-ı âsafî Gerçi ki zerreden kemem ednâ türâbdan

_

⁶¹ Onu beğendim.

- 4 Müstagni kıldı terbiyeti Şâh Kâbilî Feyz-i sehâb u mihr eser-i bâd u âbdan (37b)
- Sıyt u sadâsı eyledi fârig halâyıkıMedh ü senâ-yı Rüstem ü Efrâsîyâbdan
- 6 Zerre irer mi terbiyet-i mihre irmese Ana meded efendi eger nûr u tâbdan
- 7 Takrîb-i 'ışk u şevk-i kazâ zikr-i âl ile An 'Âşıkı ki hâli degüldür sevâbdan

71 Fâ'ilâtün Fâ'ilâtün Fâ'ilün

- 1 Gerçi açmadı kapu dilber rakîbe nâzdan Bana bir mihr itdi ma'nâda yine açmazdan
- 2 Sîne-i pür-dâgı çeng-i 'ışka yakı eylerüm Tâ ki hâlî olmayam bir lahza söz ü sâzdan
- 3 Mihr ü mehden gözlerine 'aynek idüp pîr-i çarh Dikkat eyler hüsnüne sonra gelür igmâzdan
- 4 Şöyle çıkdı evc-i istignâya dil şehbâzı kim Beftere olsa dü 'âlem dönmeye pervâzdan
- 5 Hâl virmez hâlden hâlî olıcak rûy-ı yâr Gerçi 'Âşık hazz olur dirler sineksüz yazdan

- Başına efser iden şah işiginün minnetin Çekmeye yirden göge çarh-ı berînün minnetin
- 2 Öldügümden sonra tek irgür gubârum kûyına Ey sabâ yüklet bana rûy-ı zemînün minnetin
- 3 'Iyd-ı vasluna irüp birgün nisâr idem dirüm

- Çekdügüm yıllarla 'ömr-i nâzenînün minnetin
- 4 Dürr dişün vasfında görse şi'rümi kulak çeker Kulagına asmayan dürr-i semînün minnetin
- 5 Gerd-i dergâhun umar çeşm-i emel yüz milden Göze göstermez Sıfâhân sürmesinün minnetin
- 6 Seglerünle hem-sifâl olmış iken kapunda dil Cân yedürse çekmeye fagfûr-ı Çînün minnetin
- Ah kim her kapuya yüz süridüm yüz bulmadum Gerçi yüz dünyâca çekdüm her birinün minnetin
- 8 Himmetün 'Âşık bülend it dergeh-i 'âlîye var Mansıb içün çekme dünyâ-yı denînün minnetin (38a)

73 Mef'ûlü Mefâ'îlü Mefâ'îlü Fe'ûlün

- 1 Cânına koyar bulsa gönül tîg-i nigârın Yeg bilür efendi kişi kendüye çıkarın
- 2 'Ârifdür o ki mihrün ile bâgda her subh Şebnem gibi koyup kadehe yog ide varın
- 3 Tutdı yüküni şahne-i bâd alsa n'ola bac Konup çemene hâce-i subh açdı bahârın
- 4 Asdı müjeme rişte-i gîsûsı hayâlin Teb baglayıcak çeşme sanup gözi bınarın
- 5 Altında kalur mıydı anun 'Âşık eger yâr Atsa bir avuç hâk gelüp görse mezârın

74 Mefâ'îlün Mefâ'îlün Mefâ'îlün

1 Cemâlün mihri her yirde olurken gün gibi tâli'
Tulû' itmez benüm külbemde hîç birgün 'aceb tâli'

- 2 Ne kara baht u bed-ahter sitârem var ki zulmetle Fürûg-ı pertev-i hûrşîd-i rahşâna olur mâni'
- 3 Şeb-i târîk-i bahtum bulmaya bir zerrece pertev Eger her necm bir mihr olup envârı ola lâmi'
- 4 Teveccüh itse tâ ki ben zelîl ü zâre bir devlet Çagırur her tarafdan tâli'-i şûmum ki yâ Dâfi'
- 5 Benem ol 'Âşık-ı nâ-çâr ki 'âlemde bulımadum Ne bir muhlis ne bir mesned ne bir melce ne bir sâfi'

75 Fe'ilâtün Fe'ilâtün Fe'ilün

- Asumânda görinen vakt-i seher sanma şafak Yolına geldi gice itdügi hûn-ı nâ-hak
- 2 Sanma herkes asılup zülfüne Mansûr olur Ehl-i 'ışk içre de az bulunur ipe uracak
- 3 Nice teşbîh ideyüm ben sana mihr ü mâhı Mihr irişdürür ey nûr-beden-i mâh-ı be-hak
- 4 Arasın kesmege sal tîgüni yâ gönder okun Hançer-i gamzen ile çak sünüge irdi bıçak
- 5 Gördi keyfiyyet-i la'l-i leb ü tâb-ı ruhunı Bâde kan derledi şermende olup sanma 'arak
- Şat gibi tolanurak kûyına iletdi yaşı'Âşıkâ olmaz imiş 'âşıka Bagdâd ırak (38b)

76 Mefâ'îlün Mefâ'îlün Mefâ'îlün

1 Müsellem oldı bana tîg-i âhumla diyâr-ı 'ışk Ben oldum devletünde pâdişâhum şehriyâr-ı 'ışk

- 2 Bana hâr-ı cerâhat pister-i râhat berâberdür Birûnum çâk çâk-ı gam derûnum hârhâr-ı 'ışk
- 3 Çü gördi hem-dem ü hem-derd yok Ferhâd-ı bî-çâre Eliyle Bî-sütûnda kendüye kazdı mezâr-ı 'ışk
- 4 Karâr u 'akl u sabrum raht u bahtın itdi gam târâc Gönülde dâg-ı mihnet kaldı ancak yâdigâr-ı 'ışk
- 5 Habâbı nüh kıbâb u katresi 'ummânken anun Karâr itdi dil-i 'âşık da bahr-i bî-kenâr-ı 'ışk
- 6 Ko Mecnûn ile Ferhâdı iki zen-pâre bâtıldur Bana gel ister isen hizmet-i pîr ihtiyâr-ı 'ışk
- 7 Mahabbet câmın içdüm derd-i ser virdüm bana hestî Meger bezm-i 'ademde def' ola 'Âşık humâr-ı 'ışk

77 Mefâ'îlün Mefâ'îlün Mefâ'îlün

- İşigün taşını yasdanmaz olmayan sana 'âşıkMeseldür kim tabîbâ sag olan baş istemez yasdık
- 2 Kanı ol bî-tekellüf bezm-gâhda oturup rindân Surahî tura sâgar yüriye yanın yata yatık
- 3 N'ola kanlu yaşumdan deşt ü sahrâ lâle-zâr olsa Bahâr oldı yine Tuna aka başladı bulanık
- 4 Dögündügüm cefâ taşı vü halkun seng-i ta'nıyle Benüm sahrâ-yı sînem şimdi olmışdur temâşâlık
- Nefes gör gel ruhun âyînesiyle diyü âl itdüm Ölürken dahi 'Âşık bûse aldum cânuna lâyık

78 Fâ'ilâtün Fâ'ilâtün Fâ'ilûn

1 'Âşıka şeydâyıluk rüsvâyıluk bed-nâmlık

- Pâdişâh-ı 'ışkdan teşrîfdür bayrâmlık
- 2 Sizlere 'ıyş u neşât u şâdî ey ehl-i visâl 'Âşıka bî-çâralık dermândaluk nâ-kâmlık
- 3 Bâgda gamz eyledi bâde benefşe hattunı Ensesinden çekdürür anun dilin nemmâmlık
- 4 Gerçi eylersen hevâ-yı vasl ey dil râstî Serv-i sîmînden ümîd-i mîve gâyet hâmlık (39a)
- 5 'Âşıkuz 'Âşık melâmetde selâmet bulmışuz Kârumuz bî-kârlıkdur fahrumuz bed-nâmlık

Fe'ilâtün Mefâ'ilün Fe'ilün

- 1 Kimsenün hîç dehânuna sözi yok La'lün anılsa sükkerün tuzı yok
- Öykünelden berü kad-ı yâre Nergisün servi görecek gözi yok
- 3 Devr-i la'lünde kaldı zulmetde Âb-ı Hızrun görinmege yüzi yok
- 4 Hüsnün ayı güneş gibi togalı Kamerün çarhı batdı yıldızı yok
- 5 Subh-ı ümmîde irmedi 'Âşık Şâm-ı hecrün dirîg gündüzi yok

80

Mef'ûlü Fâ'ilâtü Mefâ'îlü Fâ'ilün

- Basdı ruhuna çün hat-ı 'anber-nisâr ayak Gülzârdan götürdi nesîm-i bahâr ayak
- 2 Dil sındı câm-ı dîdeden akarsa n'ola yaş Çün baş gidicek olmaz imiş pâyidâr ayak

- 3 Ebrûsı çîni gerden-i câna salar kemend Kayd-ı hevâ-yı kâküli akla tolar ayak
- 4 Ayak karada kodı yüze gelmez oldı hîç Saldurmadı saçuna hat-ı müşk-bâr ayak
- 5 Engüşt-i zerd ü câm-ı mey ü 'aks-ı rûy-ı zerd San elde zerturuncalı bir zer-nigâr ayak
- 6 Bülbüller oldı cem' ser-i serve 'Âşıkâ Haşr oldı turdı bir ayak üzre hezâr ayak

81 Fe'ilâtün Fe'ilâtün Fe'ilün

- 1 Şem'-i bezm itmege sâkî aramakdan 'Âşık Mey gibi çıkdı bu devrânda ayakdan 'Âşık
- Virmezüz gülşenüne bâd-ı sabâ gibi gubâr Olmışuz gül gibi biz sana kulakdan 'âşık
- 3 Hürmet-i beyt-i harâm-ı haremün müşkildür Ka'be-mânend olalum sana ırakdan 'âşık
- 4 Geleli nâmun alup mihr ü mahabbet sebakın Okur ihlâs-ı du'ânı o varakdan 'âşık (39b)
- 5 Gökden inmiş yaraşur kâmetüne hil'at-ı câh Lakab olmış nitekim bendene Hakdan 'Âşık

- 1 Subh-dem bâd-ı seher eyler demâgum müşk-bâr Sünbül-i ruhsâr-ı yâr olmış meger ki târumâr
- 2 Gülşen-i sîne hayâl-i sünbül-i cânân ile Bir gülistândur tolu şeb-bû ile zülf-i nigâr

- 3 Şâm-ı hicrânunda olur dûd-ı âhum pür-şerer Kim şeb-i rûze kanâdil ile zeyn olur menâr
- 4 Hâr-ı nâ-mahremle n'eylersin diyü kasr-ı güli Gice şebnem taşladı sanma şükûfe jâle-bâr
- 5 Hûblar teshîrine 'Âşık mücerreb görmedüm Sîm ü zer gibi gerek ammâ hezârândur hezâr

Mefâ'îlün Mefâ'îlün Mefâ'îlün

- 1 Cigerde âteş-i 'ışkunla yanmış tâze dâgum var Er ocagı gibi dâyim söyinmez bir çerâgum var
- 2 Der-i meyhâne oldı na'l-i bî-pâyân ile sînem Bu iki çeşm-i pür-hûn-âbdan iki kabâgum var
- 3 'Aceb mi hançerün mâhîlerin her dem şikâr itsem Müşebbek sîne-i sad-çâk u efkârumdan agum var
- 4 Okınur hutbe-i nâlem kazılur sikke-i dâgum Otag u tâc u tahtum yog ise külhen bucagum var
- Hırâş-ı nâhun-ı derdiyle hûn-âlûddur dâgum
 Ne gam şimden gerü bana benüm dâg üzre bâgum var
- 6 Gönül nûr-ı tecellî ile 'Âşık Tûra dönmişdür Fürûg-ı âfitâb-ı 'âlem-ârâdan ferâgum var

84

Mef'ûlü Fâ'ilâtü Mefâ'îlü Fâ'ilün

- Her şeb ruhun gibi bize bir vech ile togar
 Bu şîveyi kamer de güneşden alur satar
- 2 Resm-i cefâ vü cevri niçe mahv ide sirişk Sengîn-dilünde olmış o *ke'n-nakşı fi'l-hacer*⁶²

⁶² Taşa hakketmek gibidir.

- 3 Geldün çü bâga rûy-ı 'arak-rîz ile seher Reng aldı lâle gül alınup jâle düşdi ter
- 4 Hattun irişeliden olupdur füzûn yaşum Agıllanıcak ay ziyâde olur matar (40a)
- 5 Urdukça seng 'Âşıka eyler du'â senâ Taşlanmaz ol dıraht ki ol virmeye semer

Fe'ilâtün Fe'ilâtün Fe'ilün

- 1 Yir ider nâz ile çeşmümde o müjgân batar Gûyiyâ san'at ile şîşeye peykân batar
- 2 Gayriye göndericek tîr-i müjen reşkümden Cânuma acı gelür cismüme ey cân batar
- 3 İtse dendân-ı segünden n'ola agyârun ile Batar eylük kişiye ey meh-i tâbân batar
- 4 Tolunur hüsni gözümden tolıcak yaş gözüm Âşikâr olsa süreyyâ meh-i tâbân batar
- 5 İrmeden vaslına 'Âşık hatı olur peydâ Varmadın menzile hûrşîd-i dırahşân batar

86

Mefâ'îlün Mefâ'îlün Mefâ'îlün Mefâ'îlün

- Gönül mâl ü menâli terk idüp fakr u fenâ ister Geçüp ma'mûre-i âfâkdan vîrân serâ ister
- 2 Tılısm-ı ejdehâ timsâlidür hüsni bozar anı Şu kim feth-i der-i gencîne-i mülk-i bekâ ister
- 3 Yüri pîrâmen-i kûh-ı melâmetde karâr eyle Gel ey âsâyiş-i hâtır-ı dil emn üzre câ ister

- 4 Gönül gark-âb-ı girdâb-ı mahabbet oldı yâd elde Der-i yâre niyâzın 'arz ider bir âşinâ ister
- 5 Komaz dâmânını pîr-i mugânun elden ey 'Âşık Şu kim ârâm-gâh-ı râh-ı 'ışka reh-nümâ ister

Mefâ'îlün Mefâ'îlün Mefâ'îlün

- 1 Ne mâlum var ne câhum var ne zevkum ne sürûrum var Cihânı hîçe satdum şimdi yoklugla huzûrum var
- 2 Güneş sensin hilâl eksükli kem benden kerem senden Temâm it feyz-i mihrünle egerçi bin kusûrum var
- 3 Güneş gibi senün tutdıysa n'ola hüsnün âfâkı Benüm de zerre-veş mihr-i cemâlünle zuhûrum var
- 4 Fetîli şem'e zünnâr itdün ey tersâ-beçe benzer Girüp dûd-ı siyâha mug gibidür nâr-ı nûrum var
- 5 Cünûn-ı 'ışk u câm-ı şevk ile lâ-ya'kılem 'Âşık Ne 'âlemden haberdârum ne kendümden şu'ûrum var (40b)

88

Mefâ'îlün Mefâ'îlün Mefâ'îlün

- 1 Dimâg-ı cânı müşk-âsâ pür eyler bûy ser-tâ-ser Kesilmişdür göbegi nâfe ile zülfünün benzer
- 2 Yeter zülf-i 'arak-rîzün devâ-yı ser gıdâ-yı rûh Gül-âb itsün sudâ'ı ref' götürsün kokı 'anber
- 3 Çıkar Ye'cûc-ı hat virür harâba 'âlem-i hüsnün Gerek kıl ana tîg-i âheninden sedd-i İskender
- 4 Yine 'ıyd oldı rindâne saladur 'işret ü 'ıyşa Meh-i nevden felek meyhânesine asdılar çenber
- 5 Kıyâmet de koparsa mest-i câm-ı 'ışk ayılmaz

Sürûd-ı nefh-i sûr ana gelür bir nagme cân-perver

6 Başum boynumda 'Âşık başdan bâr-ı girân iken Ne yükdür âşiyân-ı bûm-ı zillet başuma ser-ber

89

Mefâ'îlün Mefâ'îlün Mefâ'îlün

- 1 Cihândan fârigüm gam 'âleminde hoş demüm vardur Degişmem on sekiz bin 'âleme bir 'âlemüm vardur
- 2 N'ola bâzû-yı sa'y-ı gerden-i ümmîde salarsam Kolumda dâg-ı 'ışkun gibi hırz-ı a'zamum vardur
- 3 Gönül hercâyîdür cân 'âriyetdür geçdüm anlardan Sirişküm gibi dem-sâz âh gibi hem-demüm vardur
- 4 N'ola dîvân-ı şi'rüm sakınursam yâdlardan ben İçinde niçe ebkâr-ı ma'ânî mahremüm vardur
- Ne gam cümle cihân bed-h*â*h u düşmen olsa ey 'Âşık Benümdür mülk-i istignâ cihânda ne gamum vardur

90

Fe'ilâtün Fe'ilâtün Fe'ilûn

- 1 Başda sevdâ-yı ruhun efser-i ikbâlümdür Dilde teşvîş-i hatun nâme-i a'mâlümdür
- 2 Levh-i cismümde hadeng-i müjenün zahmları Alnum üzre yazılan sûret-i ahvâlümdür
- 3 Çekerüm zülf-i dırâzun gamın ölinceye dek Dâr-ı dünyâda benüm itdigüm âmâlümdür
- 4 Ser-fürû eylemege atlas-ı çarha komayın Beni bu delk-i fenâ ile kara şâlumdur
- 5 Kâmet ü çeşm ü fem ü zülfi hevâsı 'Âşık Benden ayrılmaz ölürsem dahı a'mâlümdür (41a)

Mefâ'îlün Mefâ'îlün Mefâ'îlün

- Onulmaz yârelerle sîne mihnet lâle-zârıdur Açılmış gülşen-i 'ışkun yine evvel bahârıdur
- 2 Bedende zahm-ı tîg-i hecr-i dilber şâhlardur kim Yanında her taraf peykân u hançer berg ü bârıdur
- 3 Bana göynüklü bagrum pâresiyle gögsümün dâgı Sana katmer karanfil vakti geldi gül bahârıdur
- 4 Bedende nâhun-ı dest-i gam u hasret-hırâşıdur Cigerde hâr-ı endûh u melâmet hârhârıdur
- 5 Erenler himmetine geldi 'Âşık tekye-i 'ışka Seri sebz ile elde berg-i sebz ü ber-güzârıdur

92 Fâ'ilâtün Fâ'ilâtün Fâ'ilün

- 1 Giceler 'ışk ehlinün dûd-ı siyâhı gibidür Keh-keşân üstinde anun medd-i âhı gibidür
- 2 Güç gören kaşun kemânından sıgınur zülfüne Mülk-i Rûm-ı hüsnde zıll-ı İlâhî gibidür
- 3 Gamze sâhirdür saman altında sular yüridür Yaşum anun cûyı müjgân berg-i kâhı gibidür
- 4 Gözi açuklar gubârın tûtîyâ-yı çeşm ider Her kim erbâb-ı tarîkün gerd-i râhı gibidür
- 5 Sûz-ı Hüsrevden yakar 'Âşık çerâgı nazmda Cûr'ayı Câmîden içer kendi Şâhî gibidür

93

Mef'ûlü Mefâ'îlü Mefâ'îlü Fe'ûlün

- Girdâb-ı muhabbet ki cihân reh-güzeridür
 Âvâre habâb anda fenâ ehli serîdür
- 2 Agyâra çeküp döke yüzi suyunı tîgün Taşdan çıkarupdur ol anun alnı derîdür
- 3 Kesbî degül idügi benüm seyl-i sirişküm Kimine bedîhi kimisine nazarîdür
- 4 Göz boncugına saymaz o dil-dâr dirîgâ Çeşmüm gam-ı la'li ile dirler ki dürîdür
- 5 Tîgında anun katre-i hûn-ı dil-i 'Âşık Düşmiş durur âb üstine gül-berg-i tarîdür (41b)

94 Fâ'ilâtün Fâ'ilâtün Fâ'ilün

- 1 Sîne pür-dâg olsa dil derd ü gam-ı cânân arar Etmegin tenhâ yimez elbetde bir mihmân arar
- Okıdı hüsnün kitâbın hattunı görmek diler Dil Gülistânı temâm itdi Bahâristân arar
- 3 Zahmımun yaprakdur agzı şerh-i hâl ide diyü Dil sokup hançer ana agzın gelüp peykân arar
- 4 Kebkebün izine yaş döküp hamîrün bilmege Nokta-ı âb ile hâki dîde-i giryân arar
- 5 Anası koynında arar yitigin 'Âşık kişi Ceyb-i gülde bûy-ı yârı gonce-i handân arar

- Dikkate döymez güneş ey mâh hüsnüne nazar Bunı günden rûşen anlar kimde kim ola nazar
- 2 Şöyle benzer hizmete tutdun gün ile ay ile

Mihr ü meh gitmez kapundan gice gündüz bir nazar

- 3 Tûtiyâ gelse 'aceb mi gerd-i râhun çeşmüme Cevherün kadrin bilür 'aynum olan ehl-i nazar
- 4 Herkes alur behre nergis-zâr-ı çeşmünden senün Gamze-i hışm u cefâ degdi bize Hakk-ı nazar
- 5 Aglamakdan tîre oldı gözlerüm 'Âşık benüm Bir dahi rûşen olıcagında var anun nazar

96

Fe'ilâtün Fe'ilâtün Fe'ilün

- 1 Tîr-i dil-dûz-ı müje cisme gelicek begler Sarılur boynına cân gitmege komaz egler
- 2 Geçürür tîrüni cân yirine gönlüm nitekim Kal'adan taşra müsâfir bulup eller bekler
- 3 Benler olsa güzelüm n'ola benâgûşunda Rûm ilidür ruhun uç ilini begler bekler
- 4 Buna âdem nice katlana ki her Ehremeni O perî yüzli melek göz göre bizden yegler
- 5 Dâr-ı dünyâda bir ilüp çekerüm yok 'Âşık Bir iki günlüge ol zülf-i dil-âvîz egler

97

Fe'ilâtün Fe'ilâtün Fe'ilûn

- Benzedür gerçi güneş yüzüne mâhı lekeler Olmasun hüsnine magrûr sakınsun lekeler (42a)
- Öykünürler hat u zülfüne dimezler mi 'aceb Yolalar sünbüli reyhânı çemende ekeler
- 3 Âşiyân eyleyeli canda kazâ-yı tende Kebk-mânend okun gâh uçar geh sekeler

- 4 'Aks-i zülfün diseler n'ola ruhunda hatta Mâhda şeh-per-i Cibrîl yiridür lekeler
- 5 Gerden-i münkire 'Âşık elek asarsa n'ola Tab'ı pervîzini ma'nâ-yı dakîki pek eler

Fâ'ilâtün Fâ'ilâtün Fâ'ilün

- 1 Tîg-i müjgânunla bagrumdan kopan per-gâleler Gözlerümden çıkdı vâdîlerde oldı lâleler
- Yakası açılmaduk bir söz işitdüm dün gice Gerdenün tavkına öykünmek dilermiş hâleler
- 3 Dâg-ı hasretdür ki ben dil-hastenün cânındadur La'l-i nâb-ı yârda yir yir olan teb-hâleler
- 4 Çirk-i gam basdı karardı gerd-i mihnetden gönül Sun pey-â-pey sâkiyâ câm-ı mey-i gassâleler
- 5 Cür'a-i câm-ı muhabbet virdügi keyfiyyeti Kim dimezdi görse 'Âşık zâhid-i sad-sâleler

99

- 1 Sanmanuz aglar müselmân hâlüme kâfir güler Kâfir aglar böyle kalursam bana itler güler
- N'ola gülsem âhiretde dünyede çok agladum Düşde âglayan kişi uyanıcak dirler güler
- 3 Şöyle rüsvây eyledi 'ışkun beni 'âlemde kim Bana güler sanurum 'âlemde görsem her güler
- 4 Diş sırıtmaz agız açmaz gonce gibi bana yâr Salınur gül gibi ammâ hâr ile oynar güler

5 Bâgdan gitmez bahâr u dîde mîr-i 'âşıkân 'Işkunı 'Âşık da terk itmez ger aglar ger güler

100

Mef'ûlü Mefâ'ilün Fe'ûlün

- Meclisde piyâle çarh-ı devvâr
 Üstinde habâbı necm-i seyyâr
- Dil-dâre gönül perî dimişsin
 Benzer gözüne görünecek var (42b)
- 3 Cânâna tahammül eyler idük Ser-ber gam-ı rûzgâr her bâr
- 4 Baglandı kapu küşâde yir yok Dil şeş-der-i gamda olalı zâr
- 5 Resm itmege nakş-ı hüsn-i yâri Gül safhalarını igneler hâr
- 6 Çün kâkül-i yâre öykünür tûg Olursa 'aceb midür nigûn-sâr
- 7 'Âşık olalı tuyıldı râzumAlışmaz imiş mey ile esrâr

101

Mef'ûlü Fâ'ilâtü Mefâ'îlü Fâ'ilün

- 1 Gönlümi yıkmış idi irişdi hat-ı gubâr Meşhûrdur ki yar yıkıldugı gün tozar
- 2 Dil zîr-i bâd-ı derdde ham oldı dâl-veş Gitdükce yâr yine yükin yukarı yıgar
- 3 Sordum lugaz idüp dil-i dil-dârı kendüye Diyver ne didi senün olsun Demirhisar
- 4 Düşdi za'îf oldı yolunda gubâr-ı ten

Varmaga işigüne gerek niçe rûzgâr

5 Ben gülşen içre aglayıcak 'Âşıkâ seher Çaglan geçerdi gerçi seke düşdi cûy-bâr

> 102 Mefâ'îlün Mefâ'îlün Mefâ'îlün

- 1 Cihânun şimdi âhum bâd-pâ reh-vâr ulagıdur Biri şark u biri garb ana menzil at konagıdur
- 2 Çeküp ebrûsına vesme varakdan zer nişân itmiş O şemşîrün birisi cevheridür biri zâgıdur
- 3 Seg-i ger-gîtiyem kehf-i fenâ erbâbınun ben kim Yanında kâse-i tâc-i Keyâni it yalagıdur
- 4 Enine uzınına boyamışdur diyü deryâyı Sirişküm n'ola gâfil çaglar ise şimdi çagıdur
- 5 Keser geh tîg-i gam benden yıkar geh hecr-i seylâbı Benüm gönlüm muhabbet âsiyâbınun suvagıdur
- 6 Şeb-i hicrân irüp 'Âşık fenâ der-bendine gitse Yanınca şu'le-i âhı bile yalun yaragıdur (43a)

103 Mef'ûlü Fâ'ilâtü Mefâ'îlü Fâ'ilün

- Dâgum derûn-ı dilde benüm gûne gûnedür Sînemde kanlu dâg hemân bir nümûnedür
- 2 Taşdı bulandı 'ışk ile yine deli gönül Evvel bahârda sanasın cûy-ı Tunadur
- 3 Yelkenlilerle şayka tonat Tuna seyrin it Göster bu bahr-i ahzara yelken toru nedür
- 4 Bir togrı râhdur her elif tende 'ışkuna Ammâ tenümde na'llerüm bâz-gûnedür

5 'Âşık görince Tunada sîmîn bedenleri Sal 'ırzı sen de suya ki tune'l-betûnedür

104

Mef'ûlü Fâ'ilâtü Mefâ'îlü Fâ'ilün

- Kaşına vesme çekdi yine yaykarası var
 Gözine sürme çekdi 'aceb kime yası var
- 2 Turmaz söger kulagına tolduru tolduru Câmun surâhî ile 'aceb mâcerâsı var
- 3 Zülfüne cîm ü kaşuna râ dimez ehl-nazm Kimün senün cemâlüne çûn u çirâsı var
- 4 Kandaysa Ka'be-i derine togrıdur yolın Kimün ki sıdk-ı dil gibi kıble-nümâsı var
- 5 Hakkâ budur ki câna degerdi metâ'-ı 'ömr 'Âşık hemân bu 'aybı sonında fenâsı var

105

Mefâ'îlün Mefâ'îlün Mefâ'îlün

- 1 Beni sanman ki dilber 'ışkı böyle mübtelâ eyler Beni böyle ezel bezmindeki kavl-i belâ eyler
- 2 Semâ' idüp 'aceb mi raksa girsem şevk-i şâdîden O meh 'uşşâka kasd-ı rahm idüp zikr-i vefâ eyler
- 3 Degül seng-i mezâr i'câz-ı la'lünle şehîd-i 'ışk Dirilüp yine ölmege elin açup du'â eyler
- 4 Salınur 'Âşık ile 'ıydda her ser ol bî-rahm Benümle el yüzine el ucuyla merhabâ eyler
- 5 Bu hâlet 'ışkdan yetmez mi ey sûfî-i zâhir-bîn Seni cânân ile bî-gâne iken âşinâ eyler

6 Bilür 'Âşık bilür cevr ü cefânun kıymet ü kadrin Anunçün ol perî cevr ü cefâyı hep bana eyler (43b)

106

Mefâ'îlün Mefâ'îlün Mefâ'îlün

- 1 Ruhında gerçi kim zülfi niçe diller helâk eyler Düşenler âteş-i sûzâna dûdından ne bâk eyler
- 2 Ferîd iken melâhat 'arsasında hâl-i yekdânun Senünle kim ola 'âlemde bahs-i iştirâk eyler
- 3 Sebû ile refîkâ lutf idüp bir hûb sâkîye Şu dem ki cism-i efsürdem felek ser-cümle hâk eyler
- 4 Nice şûr oldugın bile ser-i 'âşıkda şol dem ki Mezârumda biten şâh-ı güli sûfî süvâk eyler
- 5 Tecellî-i cemâl-i yâre bî-tâkat olur benzer Seher geh Tûr-ı Sînâ gibi 'Âşık sîne çâk eyler

107

Mefâ'îlün Mefâ'îlün Mefâ'îlün

- Bahâr oldı yine bülbül çemende güft-gû eyler Benüm dîvâne gönlüm deşt ü sahrâ ârzû eyler
- Elüm alup yabana atma billâhi benüm sâkî Şu vaktin kim felek destünde hâkümden sebû eyler
- 3 Meh öykinmiş sana çarh anun içün âfîtâb ile Yüzine urmaga eksüklügini rû-be-rû eyler
- 4 Nişân bulmaz hırâm-ı kâmetünden serv ü 'ar'arda Sirişküm sû-be-sû her bâgı gerçi cüst u cû eyler
- 5 N'ola boynına salınursa tîgün 'Âşıkun her dem Anı hûn-ı cigerle dem-be-dem ol surh-rû eyler

Mefâ'îlün Mefâ'îlün Mefâ'îlün

- Olup her zahm agız her fetîl anda zebân yir yir Derûnum çâkin eyler 'âleme şerh ü beyân yir yir
- 2 Bu âh-ı âteş-efşânum benüm bir kilk-i zerrîndür Yazar ta'vîz-i sâk-ı 'arş içün nûr-ı duhân yir yir
- 3 Kızarmış tâb-ı mülden gül gül olmış 'ârız-ı dilber Melâhat şâh-sârında açılmış erguvân yir yir
- 4 Egerçi ney-şikâf olsa sadâ itmez velî nâlüm Füzûn oldı olaldan çâk-i cism-i nâ-tüvân yir yir
- 5 Degüldür dâg-ı âteş-nâklar cism-i figârumda Kül oldı yandı cismüm oldı ahkerler 'ıyân yir yir
- 6 Şikenc-i zülf-i pür-çînün olupdur pîç-ender-pîç İder murg-ı dil-i 'uşşâk anda âşiyân yir yir
- 7 Ney-i nâlân olup gitdükce gönlüm bezm-i cânâna Tolaşur rişte-i cânum ana çün rîsmân yir yir (44a)
- 8 Hayâl-i ebruvân ile gönül her nâvek endâzun Hemân ta'lîm-hânedür ki asılmış kemân yir yir
- 9 Hat u ruhsârun anup agladukca 'Âşık-ı şeydâ Biter tarf-ı gülistânunda mîr-i 'âşıkân yir yir

- 1 Kim durur dirsen serîr-i hüsne şâh-ı bî-nazîr Ol beşer-sûret melek-sîmâ perî-peyker Nezîr
- 2 Bu nihâl u bu cemâl u hatt u hâl u rûy-ı âl Dil-rubâ vü dil-güşâ vü dil-firîb ü dil-pezîr
- 3 Haste-i hicrâna tîg-i gamzen irişünce dir Tîr-i dil-dûz-ı müjen zahm-ı firâka bire bir

- 4 Rûyuna 'azm itmiş iken kaldı zülfünde gönül Ka'beye 'azm itdi oldı kâfiristânda esîr
- 5 Bîm-i hecrün 'ıyd-ı vaslun 'Âşıka havf u recâ Handen ile gamzen olmışdur Beşîr ile Nezîr

Fâ'ilâtün Fâ'ilâtün Fâ'ilün

- 1 Al eline gönlin mûrun Süleymânluk budur Hoş geçe sâyende 'âlem zıll-ı Yezdânluk budur
- 2 Bir kulun dîvâne olsa gayret-i akrân ile Bende çek zencîr-i ihsânunla Lokmânluk budur
- 3 Kıl cihânı ehl ile ma'mûr u ehli lutf ile Ey cihân-gîr ü cihân-ârâ cihân-bânluk budur
- 4 Şâne ilüp çekme de bir yana bir yana nesîm Var ise zülf-i semen-sâda perîşânluk budur
- 5 Dîdi bir dânâ-yı kâmil bend idüp 'Âşık bana Şâhı koyup bendeden lutf umma nâ-dânluk budur

111

- Bî-sütûn-ı gamda urdum taşa başı başa taş Kûh-kenden kalmadum girü bu ben âvâre baş
- 2 Âşiyân-ı 'ışk bozmadı serümden seng-i ta'n Gerçi dirler ki yırak gider elün atdıgı taş
- 3 Hattun irdi çîn-i ebrûlar ider pey-vestegîn Şâm irişüp âh kim tolındı gün karardı kaş
- 4 Olıcak fasl-ı hazân dehrün fenâsın fehm idüp Taglar hep soyunup oldı çiçekler hep tırâş (44b)

5 'Işk hânını ider miydi gıdâ-yı rûh eger Olmasaydı 'Âşık-ı dîvânede 'akl-ı ma'âş

112

Mefâ'îlün Mefâ'îlün Mefâ'îlün

- 1 Rakîb ol âfitâba karşu kendüye mekân itmiş Gören dir mihr-i rahşân ile Mirrîh ıktırân itmiş
- Yazarken hâşiye âyât-ı hüsnünden hat-ı müşgîn Komışsun noktasın hâlünden agzunda kemân itmiş
- 3 Dil-i sûzânum içre tîr-i dil-dûzun gören eydür Semenderdür miyân-ı âteş içre âşiyân itmiş
- 4 Yolında öldügüm hâk oldugum görüp işigünde Kilâb-ı kûyun alup üstühânum sürmedân itmiş
- 5 Şeb-i zülfünde gönlin güm idüp sezmiş dehânundan Lebün gülmiş kızarmış 'Âşıka anı 'ayân itmiş

113

- Noktası sır fenn-i 'ışkun bir kitâbı var imiş Surh-ı hûn-ı 'âşık ile fasl u bâbı var imiş
- 2 Hîçe sayılur ser-i 'uşşâk anda sıfr-veş Defter-i 'ışkun da başka bir hisâbı var imiş
- 3 Hâyil olmazmış fürûgına bu yetmiş bin hicâb Âfitâb-ı 'ışkun Allâh nice tâbı var imiş
- 4 Nûş iden ancak ecel câmıyle def' eyler humâr Bezm-i 'ışkun bir 'aceb kanlu şarâbı var imiş
- 5 Tavf-ı kûy-ı yârda 'Âşık fedâ kıl cânunı Hacda kurbân itmenün gâyet sevâbı var imiş
- 6 Her kişi bir intisâb ile şerefden dem urur

'Âşıkun da 'ışk-ı pâke intisâbı var imiş

114

Fâ'ilâtün Fâ'ilâtün Fâ'ilün

- Zâhidâ 'ayb eyleme oldumsa mest-i mey-perest Sâgar-ı serde boyanmış yazılan rûz-ı elest
- 2 Hâbı terk it gâfil olma gözün aç ey müdde'î Nâm-ı 'ışkun eyleme câm-ı zücâci sen şikest
- 3 Katresi tokındugi yirler kevâkib oldılar Câm-ı 'ışk içüp sipihre cur'a saçdı cân-ı mest
- 4 Uyan âvâre hevâya bâde vardı çün habâb Dürd-âsâ bekleyen yirin olur ehl-i nişest (45a)
- 5 Kebkebün seyrini gözler gam rasad-gâhında dil Himmeti 'âlî dirîgâ rütbesi gâyet de pest
- 6 N'ola 'Âşık bursa beş beyt ile hamse pençesin Düz degil beş barmak elde dest-ber-bâlâ-yı dest

115

- Niçe bir esrâr-ı gamla olalum hayrân ogat İçelüm câm-ı mey-i gülfâm olalum kan ogat
- 2 Cur'a-dân-ı 'ışkını bana vasiyyet eyleyüp Didi Mecnûn 'aklı var ise ola her an ogat
- 3 Lâle vü nergisle servi bâgda gördüm seher Biri kanzil biri kör bengi biri hayrân ogat
- 4 Kim vire keyfiyyet-i esrâr-ı 'ışkundan haber Müftî hayrân şeyh lâ-ya'kıl dede sultân ogat
- 5 Gitdiler Ferhâd ü Mecnûn gam çeker 'Âşık henüz 'Işk bezmidür kimi geçdi kimi el'ân ogat

Mef'ûlü Fâ'ilâtü Mefâ'îlü Fâ'ilün

- 1 Cânâ 'arakla olmaz o la'l-i müzâb telh Çog olsa gerçi şerbeti eyler gül-âb telh
- 2 Rûyundan ayrılan 'arak acı gelür bana Ayrılmag ile gülden olurmış gül-âb telh
- 3 Sensüz behişt ehline kevser hamîm olur Şevkünle ehl-i dûzehe gelmez 'azab telh
- 4 Milh ücâcı 'azb-ı Fırât ide şevk-i vasl Bîm-i fırâkun ile ola şehd-i nâb telh
- 5 Yok meyl acı yaşuma cânânda 'Âşıkâ Gerçi ki mu'teber olur olsa şarâb telh

117 Fâ'ilâtün Fâ'ilâtün Fâ'ilün

- Nat'-ı hüsne beydak-ı hâlün salup ferzâne at Sâmirî sihrin yehûdî-hâne içre itdi mât
- 2 Çîn idüp ebrûların baksa Mogol-çîn gözlerün Şâhine benzer şikâre süzülüp bükmiş kanat
- Wasf-ı hüsnün fikr iderken hâme alsam agzuma Leb tolar diş diş nebât u kilk olur çûb-ı nebât
- 4 Lem'a-i nûr-ı Muhammed olmasa hüsn-i habîb Dehri tutmazdı görindükce sadâ-yı es-salât
- 5 'Unfuvân-ı 'ömri zâyi' eyledi 'Âşık hevâ Bâkîyi sarf it salâha bâkiyât-ı sâlihât

Fİ'T-TERCÎ'ÂT U VE'T-TAHMÎSÂT

Fe'ilâtün Fe'ilâtün Fe'ilün

- 1 Yar kim rûz-ı şeb agyâr ile seyrân eyler 'Ayş u 'işretler ider lutf-ı firâvân eyler
- 2 Gâh yazup yanılup çün beni handân eyler Ya'ni âgâz-ı vefâ niyyet-i ihsân eyler
- 3 Bir elem irişüp ol cem'i perîşân eyler Seng-i gam hâne-i ümmîdümi vîrân eyler
- 4 'Âlemi 'ayn-ı elem gülşeni zindân eyler Sûrumı şîven ü elhânumı efgân eyler
- 5 Bana bu cevri dimen ol meh-i tâbân eyler Baht-ı gaddâr bu cevri bana her an eyler
- 6 Her kaçan yâr vefâ itmege peymân eyler Tâli'-i nahsum anı yine peşîmân eyler

- Pertev-i mihr ü muhabbet ki dile lâmi' olur
 Gün gibi mihrüm o meh-rûya benüm şâyi' olur
- 2 Derd çekdükce gönül 'ışka dahı tâmi' olur Bana rahm itmege kasd eylese bir mâni' olur
- 3 Gerdiş-i çarh yâ ifsâd-ı 'adû vâki' olur Baht-ı tîre anı n'eylerse ider dâfi' olur
- 4 Ara yirde gam u gussayla gönül zâyi' olur 'Âkıbet 'ışk yolında eleme kâni' olur
- Mihr-i ümmîd sehâb-ı gam ile tâli' olur Geçdi günüm şeb-i mihnetde bu ne tâli' olur
- 6 Her kaçan yâr vefâ itmege peymân eyler Tâli'-i nahsum anı yine peşîmân eyler

- Kime yanam yakılam ben ne kılam vâ-veylâGördigüm dem dil ü cân ile gönül virdüm ana
- 2 Kâkül ile kad-ı bâlâsı belâ üzre belâ Ugradum derde ki olmaz ana 'âlemde devâ
- 3 Dügüne varmalu bu derde göre Bû-Derdâ Yazmamışlar ana kânûn-ı muhabbetde şifâ
- 4 Vasl-ı yâri ana dermân dimiş İbn-i Sînâ Vasl-ı yâr ise vefâyise eger çâre ana (46a)
- 5 Yog imiş ölmeden özge bana dermân kat'â Nîce dermân ola bu derde dirîgâ derdâ
- 6 Her kaçan yâr vefâ itmege peymân eyler Tâli'-i nahsum anı yine peşîmân eyler

- 1 Tâli' itdi beni ser-geşte-i 'ışk-ı cânân Tâli' itdi beni meftûn-ı belâ-yı hicrân
- 2 Tâli' itdi gam-ı 'ışk ile beni ser-gerdân Tâli' itdi beni hicrân elemiyle nâlân
- 3 Bana tâli'den irer her ne irerse yârân Gam-ı cânân elem-i 'ışk u belâ-yı hicrân
- 4 Anı tâli'dür iden ser-keş ü tünd ü fettân Beni tâli'dür iden böyle nicitsün cânân
- N'ola kan aglayup eylersem eger âh u figân
 Dâd u feryâd bu tâli'den amân el-âmân
- 6 Her kaçan yâr vefâ itmege peymân eyler Tâli'-i nahsum anı yine peşîmân eyler

5

Gerçi kim hûblara 'işve vü nâz oldı şümâr'Âşıka sûz u güdâz ile niyâz olur kâr

- 2 Ger cefâyise eger gâh vefâ olsa ne var Sen esirge beni baht oldugi yeter gaddâr
- 3 Âh kim olmada günden güne hâlüm düşvâr Öldürür bu gam u endûh beni âhir-i kâr
- 4 Baht-ı serkeş olıcak n'eylesün ana dil-dâr Şeş-der-i gamda beni baht-ı siyâh eyler zâr
- 5 Yâr cevvâr diyü aglama 'Âşık her bâr Tutalum terk-i cefâ ide vefâdâr ola yâr
- 6 Her kaçan yâr vefâ itmege peymân eyler Tâli'-i nahsum anı yine peşîmân eyler

II 1

Mefâ'îlün Mefâ'îlün Mefâ'îlün

- Bahâr oldı müzeyyen oldı gülşen gonce-femlerle Benefşe tutdı bir yanını bâgun zülfi hamlarla (46b)
- 2 Şükûfeyle şeh-i gül bâga 'azm itdi 'alemlerle Safâ bahşın ider zerrîn kadehler câm-ı Cemlerle
- Pür itdi kîsesini gonce şebnemden diremlerle Hesâb ider anı nokta döküp jâle rakamlarla
- 4 Yüzin yazdı şu'â-ı mihr-i bâgın kıl kalemlerle Pür itdi bu sadâya bülbül âfâkı negamlara
- 5 Yazıkdur kalmasun 'Âşık belâ küncinde gamlarla Helâk oldı hazân-ı hüzn ile derd ü elemlerle
- 6 Seni gözler dü çeşm-i hûn-feşânum niçe demlerle Gel ey nûr-ı basar merdümlük it demler kademlerle

2

1 Gülistân içre sultân-ı rebî'i itmege ârâm

- Çemen-zârı tonatdı ak haymeyle gül-i badâm
- 2 Ana gülgûnî gönlek tutdı şeftâlû-yı la'l-fâm Benefşeyle gül-efsûn içmege ey serv-i gül-endâm
- 3 Surâhî hâzır itdi lâleler zerrîn kadehler câm Safâ-yı hâtır ile ol gülistân içre dürd-âşâm
- 4 Bilürsin 'âkıbet devr-i sipihre câmdur encâm Olup her lâle bir hûnbâr-ı çeşm-i 'Âşık-ı nâ-kâm
- 5 Göz açup nergis izün tozını gözler sabâh-ı şâm Zebân-ı hâl iledür sûsen ü sebze idüp i'lâm
- 6 Seni gözler dü çeşm-i hûn feşânum nice demlerle gel ey nûr-ı basar merdümlük it demler kademlerle

- Olaldan bezm-i cânda sâkî-i hicrân kadeh gerdân Mey-i gül-gûn ile pür-câma döndi çeşm-i hûn-efşân
- 2 Ecel peymânesin pür itmeden ol sâki-i devrân Demîdür cür'a-i vaslundan ire 'ömr-i câvîdân
- 3 Beden haste gönül hayrân u vâlih cân sad-çendân İlige irdi geçdi üstühâne hançer-i hicrân
- 4 Yolunı beklemekden hîre oldı dîde-i giryân Demidür tûtîyâ-yı gerd-i râhundan ire dermân
- 5 Niçe bir diyeyüm kan aglayup efgân idüp her an Gel ey ârâm-ı ten âsâyiş-i dil ârzû-yı cân
- 6 Seni gözler dü çeşm-i hûn-feşânum nice demlerle Gel ey nûr-ı basar merdümlük it demler kademlerle

4

Gözüm sırça serâyın suladı eşk-i ferâvânum Süpürdi mâ-sivâ hâr u hüsın cârûb-ı müjgânum

- Yoluna zerd-i atlas döşedi ruhsâr-ı galtânum Sana şükrâne kurbân itmege hâzırladum cânum
- Nisâr içün ayagun topragına cân-ı nâlânum Pür itdi la'l ü dürle kâse-i çeşm-i dür-efşânum
- 4 Sana karşu çıkup cân agıza geldi güzel hânum Cigerden cûş idüp kanı diyü geldi göze kanum
- Mübârek demde yüzüm basa gel devletlü sultânum Nüzûlün çün müheyyâdur revâk-ı çeşm-i giryânum
- 6 Seni gözler dü çeşm-i hûn-feşânum nice demlerle Gel ey nûr-ı basar merdümlük it demler kademlerle

- Süvâr olup gül-i sûrî gibi bâd-ı bahâr ile Gelürsen bir seher gülzâr-ı vasla rûzigâr ile
- Olup demler kademler devlet-i 'ışk-ı nigâr ile Hayât-ı câvidân el vire 'ömr-i bî-şumâr ile
- 3 Sana cân muntazır olmag içün çeşm-i hezâr ile Göz oldı tende her bir zahm tîg-i intizâr ile
- 4 Beden müstagrak-ı hûn oldı zahm-ı hâr hâr ile Yürek sad-pâre oldı gonce gibi zahm-ı hâr ile
- 5 Hezârân dîde-i hûn-pâş u çeşm-i eşk-bâr ile Demidür ire maksûdına 'Âşık âh u zâr ile
- 6 Seni gözler dü çeşm-i hûn-feşânum niçe demlerle Gel ey nûr-ı basar merdümlük it demler kademlerle

Ш

Fâ'ilâtün Fâ'ilâtün Fâ'ilün

1 Geçdi ezmân-ı safâ vü gitdi devrân-ı vefâ Geldi eyyâm-ı belâ vü irdi hengâm-ı 'anâ Bize sensin eskiden hem-dem kadîmi âşinâ

- Ey felâket 'âlemi ehlen ve sehlen merhabâ
- 2 Magrib-i gamda tolındı rûz-ı râhat günleri İrdi şâm-ı iftirâka zevk u 'işret günleri Geldi eyyâm-ı muharremle musîbet günleri Ey felâket 'âlemi ehlen ve sehlen merhabâ
- 3 Tâ ezelden cânumı anunla mu'tâd eyledün Mihnet ü derd ü gam u gussayla mezâd eyledün Yine ol hem-demlügi andun bizi yâd eyledün Ey felâket 'âlemi ehlen ve sehlen merhabâ (47b)
- 4 Gitdi baştan 'akl u dilden sabr u elden ihtiyâr Kara bahtı ile 'âşık kaldı tenhâ hor u zâr Nakd-ı cânı kaldı ancak yoluna ol da nisâr Ey felâket 'âlemi ehlen ve sehlen merhabâ
- Zevkın itdün gerçi birkaç gün safâ vü 'işretün Çıkmadı bir dem gönülden lîk havf-ı vahşetün İntizârun telh iderdi câna şehdin vuslatun Ey felâket 'âlemi ehlen ve sehlen merhabâ
- 6 Kalb-i 'Âşıkdur yirün şâd u ferahla tolmasun Koma kim agyâr vahdet-hânene yol bulmasun Sen bizümsin biz senün arada nâşî olmasun Ey felâket 'âlemi ehlen ve sehlen merhabâ

IV

- 1 Merhamet kıl ol şeh-i hûbâna sıhhat rûzi kıl Halk-ı 'âlem cânıdur ol câna sıhhat rûzi kıl Öldi gamda 'Âşık-ı nâlâna sıhhat rûzi kıl Yâ İlâhî lutf idüp cânâna sıhhat rûzi kıl
- 2 Kaşları gibi hilâl olan meh-i tâbânuma Çeşm-i fettânı gibi bîmâr olan cânânuma Lutf u ihsân ile dermân eyle kıyma cânuma Yâ İlâhî lutf idüp cânâna sıhhat rûzi kıl

- 3 Eyledüm 'ışkında bin cân ile kurbân cânumı Rahm idüp şâyed süre alnına katre kanumı Ka'be hakkıçün kabûl eyle benüm kurbânumı Yâ İlâhî lutf idüp cânâna sıhhat rûzi kıl
- 4 'İlleti yokdur anun ana ne 'illet yaraşur Gül gibi nâzik mizâcında letâfet yaraşur Cân-ı 'âlemdür ana sıhhat selâmet yaraşur Yâ İlâhî lutf idüp cânâna sıhhat rûzi kıl
- 5 Rûz u şeb 'Âşıkda olan âh u vâlar hakkıçün Âsitânunda kabûl olan du'âlar hakkıçün Ehl-i derde senden irişen devâlar hakkıçün Yâ İlâhî lutf idüp cânâna sıhhat rûzi kıl

V

- Tâ kıyâmet yâd olınsun bir eyü ad eyle gel Ehl-i 'ışkun hâtır-ı vîrânun âbâd eyle gel Öldiler gam çekmeden bî-çâreler şâd eyle gel Lutf u ihsân eyleyüp ol servi âzâd eyle gel (48a)
- 2 Habs içinde çeşm-i bî-mârı gibi olmış 'alîl Boynuma alup olayum zülfine anun kefîl Bir yanar rûşen çerâgun olsun ana ol delîl Lutf u ihsân eyleyüp ol servi âzâd eyle gel
- 3 Ol elif kad râstî togridugina kaddi dâl Keç nazarlar itdiler zülfi gibi yanlış hayâl Dikmen olsun gülşen-i 'âlemde ol nev-res nihâl Lutf u ihsân eyleyüp ol servi âzâd eyle gel
- 4 Dûd-ı âh u dil yeter zindân ile zencîr ana Bend ile zencîr içün lâzım degül tedbîr ana Acıyup kan aglaşur cümle cevân u pîr ana Lutf u ihsân eyleyüp ol servi âzâd eyle gel
- 5 Gamze-i hûn-rîzi gibi girme 'Âşık kanına Çeşm-i cellâdı gibi kıyma garîbün cânına

Gabgabı çahı yeter salma belâ zindânına Lutf u ihsân eyleyüp ol servi âzâd eyle gel

VI

Fâ'ilâtün Fâ'ilâtün Fâ'ilün

- 1 Kuhl-ı insâf it 'atâ dil çeşmini ac eyleme Cânı tîr-i mihnet-i nâdâna omac eyleme Mülk-i 'ırzı 'asker-i zılletle târâc eyleme Yâ İlâhî 'Âşıkı nâ-merde muhtâc eyleme
- Seng-i gam fazl ehlinün dest-i cefâsından bana Yeg gelür nâ-dân olanun merhabâsından bana Behre ihsân it kanâ'at kimyâsından bana Yâ İlâhî 'Âşıkı nâ-merde muhtâc eyleme
- 3 Lutfunı Hızr it kanâ'at çeşme-i hayvanına Âşinâ eyle tevekkül lücce-i 'ummânına Her denînün dökme yüzüm suyını dâmânına Ya İlâhî 'Âşıkı nâ-merde muhtac eyleme
- 4 Himmetüm şâhâne it suretde dervîşâne kıl Merd-i meydân-ı tevekkül olmada merdâne kıl Genc-i istignâya dil ma'mûresin virâne kıl Yâ İlâhî 'Âşıkı nâ-merde muhtâc eyleme
- 5 Sifle-perverdür felek erkân-ı devlet dûn-nevâz Fâyide itmez çok olmak ehl olanda hırs az Bî-Niyâzâ 'Âşıkı gayründen eyle bî-niyâz Yâ İlâhî 'Âşık'ı nâ-merde muhtâc eyleme (48b)

VII MUHAMMES

Fâ'ilâtün Fâ'ilâtün Fâ'ilün

1 Sıhhat-i şâhî hayât-ı 'âleme 'illet gibi Halk sıhhat diyü cân virdügi bu ni'met gibi Kavl-ı şâhî kâdınun da'vâsına hüccet gibi Halk içinde mu'teber bir nesne yok devlet gibi Olmaya devlet cihânda bir nefes sıhhat gibi

- 2 Rûz irişse ehl-i dîvân halkı hûy hâsıdur Gice olsa kûs-ı nevbet gulgul u âvâsıdur Bir yanadan 'Âşıkun feryâd u vâveylâsıdur Saltanat didükleri ancak cihân gavgâsıdur Olmaya baht u sa'âdet dünyede vahdet gibi
- 3 Mâsivânun terkin özge ana vardur 'âkıbet İtme ümmîd-i gınâ şekl-i 'anâdur 'âkıbet Koma istignâyı elden kim gınâdur 'âkıbet Ko bu 'ayş u 'işreti çünkim fenâdur 'âkıbet Yâr-ı bâkî isterisen olmaya tâ'at gibi
- 4 Meskenün sırça serây olsa gey ehl-i hıred Gâh evc ü geh hazîz itse mekânun nîk ü bed Âhir anı sarr idüp zîr ü zeber seng-i lahd Olsa kumlar sagışınca 'ömrüne hadd u 'aded Gelmeye bu şîşe-i çarh içre bir sâ'at gibi
- 5 Şâhdur çün câmi'-i âyât-ı Hak sırr-ı Resûl Nutk-ı Hakdur cân kulagıyle sözin eyle kabûl Nasb u 'azlinden kazânun 'Âşıkâ olma melûl Ger huzûr itmek dilersen ey Muhibbî fârig ol Olmaya vahdet makâmı gûşe-i 'uzlet gibi

VIII MURABBA

- 1 Kurtuluş yok olalı dâmâd elinden kızlarun Bir kulum ki olmadum âzâd elinden kızlarun Kime idem bilmezem bîdâd elinden kızlarun Âh elinden kızlarun feryâd elinden kızlarun (49a)
- Bilmezem ki âgûmı katıldı çölmek aşına Biri togar irmeden kızun birisi yaşına Yir komadılar bana varmaga ocak başına Âh elinden kızlarun feryâd elinden kızlarun
- 3 Biri yüksekden beşikde nâleye âgâz ider Uyar alçakdan ana kundakdagı âvâz ider Bî-usûl eyler felek hakkâ katı nâ-sâz ider

- Âh elinden kızlarun feryâd elinden kızlarun
- 4 Aglamakla merdüm-i çeşmüm n'ola olsa bebek Cübbe vü destârı hep oglân bizi itdi felek Mübtelâ olan bilür bunı ne hâcet ben dimek Âh elinden kızlarun feryâd elinden kızlarun
- 5 Korkarum kaht-ı ricâl olup bula kızlar revâc Erlere nâ-merde kızlar çekdirürler ihtiyâc Bu kadar tutmac yapana kanda bulam bulamac Âh elinden kızlarun feryâd elinden kızlarun
- 6 Ne ocak ma'lûm ne dîvâr belli ne eşik Her yana baksam görinmez gözüme illâ beşik Korkaram ki seyl ala tutdı evi delik deşik Âh elinden kızlarun feryâd elinden kızlarun
- N'ola düzsem ezgiyi şimden gerü aglamaga İre mi âyâ elüm bir çükcegiz ohşamaga 'Âşık oglancuklar ile hasretüm oynamaga Âh elinden kızlarun feryâd elinden kızlarun

IX TERKİB-İ BEND Fâ'ilâtün Fâ'ilâtün Fâ'ilün

- 1 Kaşlarunla ol ruh-ı pür hat u hâl üstindedür Benzer ol ser-meşke ki levh-i misâl üstindedür
- 2 İki gözüm merdümi her lahza rûy-ı yârda San ol iki noktadur ki hatt u hâl üstindedür
- 3 Hat degül sîb-i zenehdânunda olan âşikâr Gerddür gûyâ bih-i pârine sal üstindedür
- 4 Yok ser-i mû hüsnünün eksükligi gerçi ki halk La'line hat geldi diyü kîl u kâl üstindedür
- 5 Mâh-ı nevdür ebr içinde vesmede ebrûlarun Zer varak anda süreyyâdur ki Bilâl üstindedür

- 6 Ol iki ebrun arasında olan hâl-i siyâh Tâk-ı mihrâb-ı haramdur hilâl üstindedür (49b)
- 7 Olsa peyveste kaşı n'ola girihden pür-celâl Gam degül çîn-i cebîni çün cemâl üstindedür
- 8 Gül gül itmiş behcet-i mey'ârız-ı gülgûnını Anma anı ki ne vech reng ü âl üstindedür
- 9 Turren altında kaşun ki rûy-ı al üstindedür Ag içünde mâhîdür âb-ı zülâl üstindedür

- 1 Mâh-ı nev-hûrşîde kem benden kerem senden diyüp Bildi çün eksüklügin kadri kemâl üstindedür
- 2 'Âşık olsa n'ola bülbüller görüp Şîrîn gibi Nakş-ı Hüsrevdür gül asılmış nihâl üstindedür
- 3 Kîn ile çîn-i cebînün görse dir erbâb-ı 'ışk Mevc-i şûr u fitnedür bahr-i cemâl üstindedür
- 4 Dil gam-ı zülfeynün ile daldan dala konar Âşiyân-ı bülbül-i âvâre dal üstindedür
- 5 Gerdiş-i devrânda zâhir olan etvâr u suver Benzer ol eşkâle fânûs-ı hayâl üstindedür
- 6 Fasl-ı nevrûz irdi açıldı gönüller gül gibi Gonce-veş gönlüm benüm dem-beste hâl üstindedür
- 7 Gülsitân gül Câmi'îdür anda hoş-hân 'andelîb Fâhte Hâfız ki kürsî-i nihâl üstindedür
- 8 Ma'reke tutdı sabâ gülşende olup kâse-bâz Kâsedür gûyâ çubukda gül ki dal üstindedür
- 9 Gül degül şebnemle pâyine nisâr içün bahâr Gül tabakdur la'l-i şebnemden le'âl üstindedür

10 Kutb-ı devrân zıll-ı sübhân Şeh Süleymân-ı zemân Sâye-i te'yîd-i Yezdân lâ-yezâl üstindedür

3

- Gülini kodı idüp tesbîh agacın âşîyânGördi bülbül ki salâh-ı şeh kemâl üstindedür
- 2 Degdi sâzun sıklugı kanı kurıdı bâdenün Şem'-i eyvân-ı şerî'at işti'âl üstindedür
- 3 Çeşm-i fitne hâbda 'âlem uyur arkadadur 'Adlün ile gülşen-i dehr i'tidâl üstindedür
- 4 Ayagı altına alsa n'ola dehri 'askerün Himmet-i aktâb u evtâd u ricâl üstindedür
- 5 Künc-i dünyâya müvekkel oldı şemşîrün senün Ejder-i pîçidedür gûyâ ki mâl üstindedür
- 6 Himmetün uc ilde çün Rüstemle Zâl üstindedür Ceyş-i nekbet muttasıl mülk-i kırâl üstindedür

- 1 Kızıl Elmada görenler mehçe-i sancâgunı Sandı sîb-i müslimîdür ki nihâl üstindedür
- 2 Surh-ser oklı şikârundur serinde nâvekün Şâhin-i deşt-i gazâdur ki gazâl üstindedür
- 3 Virse n'ola cân-ı şîrîni gören nîzende baş Her biri bir şekl-i Hüsrevdür nihâl üstindedür
- 4 Kelle-i a'dâda yir yir zahm-ı gürz ü şemşîrün Tâze açılmış karanfildür sifâl üstindedür
- Nâhun-ı peykânun eyler 'ukdesin hal düşmenün Mîm-veş başı girihdür ki melâl üstindedür
- 6 Arasın kessin okun gönder yâhûd tîgini sal

- Cism ü cânı kâfirün ceng ü cidâl üstindedür
- 7 Keff-i cûdun hüsrevâ bir nehr-i sâ'ildür senün Mevclerdür hatları âb-ı zülâl üstindedür
- 8 Elleri seng-i sitemden şimdi taş altındadur Rahm iderdün 'Âşıkı görsen ne hâl üstindedür

- 1 El hilâl-i 'ıyd gözler ol seg-i dîvâne-vâr Atun izine ırakdan rûy-mâl üstindedür
- N'ola ger ölmezden evvel ölse erbâb-ı kaza Müddet eksülmekde vü 'ömr intikâl üstindedür
- 3 Yaşdan akça döküp gün sayup eyler göz hesâb Havf-ı 'azl ile dil ü cân i'tizâl üstindedür
- 4 Bâl ü perrüm yanalı yangında tüyüm düzmedüm Şâh-bâz-ı gam anunçün murg-ı mâl üstindedür
- 5 Şeh buyurmış ben terakkî ile mansıb umdugum 'Âşık-ı divânenün fikri muhâl üstindedür
- 6 Hâşe-lillâh ki ola yanında bu fikr-i muhâl Cün kemâl ehline ihsânı kemâl üstindedür
- 7 Pertev-i mihrünle günden güne artur etmegüm Mâh-ı feyz-i mihr ile kesb-i kemâl üstindedür (50b)
- 8 Pâdişâhum pertev-i mihrün ten-i hâkîye sal Pertev-i hûrşîdi hâk-i derr-i mâl üstindedür
- 9 Cümle 'âlem bana bed-h*â*h u yezîd olsa ne gam Himmetün meddür çekilmiş çünki el üstindedür
- 10 Âfitâbun niçe ki sadr-ı sa'âdetdür yiri Meskeni mâh-ı nevün saff-ı ni'âl üstindedür
- 11 Rişte-i devrân gibi 'ömrün ola dûr u dırâz

Devletün ola o silk-i mâh u sâl üstindedür

6

Fâ'ilâtün Fâ'ilâtün Fâ'ilün

- 1 Gerçi dilber gitdi itdi va'de-i vasl ile lâf Korkarum ol serv-kâmet vâ'deye ide hilâf Rabbenâ ahfeznâ min el-mevt bi-hecr ü ihtilâf⁶³ Yâ giyâse'l-müstagîsîn neccinâ mimmâ nahaf
- 2 Tâ kıyâmet şöyle bâkî ola firkat korkarum Olmaya cânân ile bir dahi vuslat korkarum İrmeye pîr-i mugandan bana himmet korkarum Yâ gıyase'l-müstagîsîn neccinâ mimmâ nahâf
- 3 Va'de-i vasl eyleyüp gitmişdi gerçi ol güzel Eglenürdüm vasl-ı ümmîdiyle idüp tûl-ı emel Şimdi havfum bu ki vâ'de irmeden ire ecel Yâ gıyase'l-müstagîsîn neccinâ mimmâ nahâf
- 4 Va'de irdi itmedi 'ahde vefâ ol pür-cefâ Va'deye küymeye gibi işbu 'ömr-i bi-vefâ Şöyle hecr ile ölem gidem gibi ben mübtelâ *Ya giyase'l-müstagîsîn neccinâ mimmâ nahâf*
- 5 'Âşık u âşufte vü bî-cân u dil tenhâ vü zâr
 'Işk derbendine düşdüm reh-zen oldı çeşm-i yâr
 Kûy-ı vasla irmeden irişe gibi hatt-ı yâr
 Yâ gıyase'l-müstagîsîn neccinâ mimmâ nahâf⁶⁴ (51a)

XI

Mefâ'îlün Mefâ'îlün Fe'ûlün

Sa'âdet rahşı sür meydân senündür Şecâ'at topın ur çevgân senündür Bu gün âyin ile erkân senündür O gün Sultân Selîm devrân senündür

⁶³ Ev Rabbimiz! Bizi ayrılık ve ihtilafla ölümden muhafaza eyle!

⁶⁴ Ey yardıma muhtaçlara yardım edici! Bizi korkyuğumuz bu şeyden koru!

- Sunuldı destüne mühr-i Süleymân
 Mutî'-i emrün oldı ins ile cân
 Melekler kaldı k'ola bende fermân
 O gün Sultân Selîm devrân senündür
- Çün itdün taht-ı şâhîye culûsı
 Önünde itdi şehler câblûsî
 Kapunda kıldı 'âlem hâk-bûsı
 O gün Sultân Selîm devrân senündür
- Nişâne irişüp tîri du'ânun
 Kemânı elde yasıldı kemânun
 Oturdı yirine cânı cihânun
 O gün Sultân Selîm devrân senündür
- Münevver şem'-i eyvân-ı şerefsin
 Dür-i pâkîze-i âlî sadefsin
 Selefden hak bu kim hayrü'l-halefsin
 O gün Sultân Selîm devrân senündür
- 6 Bu gün nakd-i Süleymân-ı zemânsın Nerîmân yâdigârı Kahramânsın Ferîd-i dehrsin sâhib-kırânsın O gün Sultân Selîm devrân senündür
- Melekler hizmetüne varıcıdur
 Hudâ yardımcı tâli' yarıcıdur
 Sana inkâr idenler hâricîdür
 O gün Sultân Selîm devrân senündür
- 8 Gelüp insâfa devrân geçdi becden Niçe Bagdâd yâ gülşen döndi Becden Didi gadr ile kul kapusı geçden O gün Sultân Selîm devrân senündür
- Bir elde câm tut bir elde şemşîr İdüp seyrân-ı 'âlem ol cihângîr Muvâfik oldı tedbîr ile tâkdîr
 O gün Sultân Selîm devrân senündür

- 10 Çü sensin şâh-ı merdân şâh-ı Yezdân Degül rûbeh yanunda genc arslan Kaşanur heybetünden şîr-i ner kan O gün Sultân Selîm devrân senündür
- 11 Elünde tîg-i zer mey câm-ı Cem kıl Senündür Rûm âheng-i 'Acem kıl Kızıl başun vücûdını 'adem kıl O gün Sultân Selîm devrân senündür
- 12 Deden oklı şikârîdür kızıl baş Baban bend urdı 'âlem didi sabaş Hakundur sen idersen küşte bin baş O gün Sultân Selîm devrân senündür
- 13 Çün evvel kâr-ı Kirdârun gazâdur Mukarrer rehberün lutf-ı Hudâdur Libâs-ı şâhî teşrîf-i gazâdur O gün Sultân Selîm devrân senündür
- 14 Çü sensin zıll-ı Hak dâdâr-ı dâver Vücûdun oldı halka sâye-güster N'ola gölgende hoş geçsek gedâlar O gün Sultân Selîm devrân senündür
- Nigîn-i tâc u tahtı Hak tebârekVücûd-ı pâküne ide mübârekGubârun ola çarha tâc-ı târekO gün Sultân Selîm devrân senündür
- 16 Kapunda 'Âşık ser-sebz gûyâ
 Olur medhünle bir tûtî-i gûyâ
 Anı en'âmun ile kıl şeker-hâ
 O gün Sultân Selîm devrân senündür
- Silahdârun agâsı oldı mirrîh
 İde a'danı tâ tîgiyle tevbîh
 Culûs-ı tahta 'Âşık didi târîh
 O gün Sultân Selîm devrân senündür

Zıll-ı ilâh bâdâ 974/1566-1567